igalillia

منبر زخاري

لوجوس

الكتاب: حواديت مصرية

الكاتب: منير زخاري

#### الجمع والإخراج الفني والطباعة

لوجوس سنتر

تليفون / فاكس ٢٩٠٦١٦١ ص. ب. ٢٤٥٥ الحرية هليوبوليس - القاهرة

Email: Logoscenter@ yahoo.com www.logoscenter.net

حقوق الطبع محفوظة

رقم الإيداع: ٢٠٠١ / ٢٠٠١

الترقيم الدولي: 7 - 64 - 5607 - 977

# المحتويات

Y	إهداء
٩	مقدمة
**	تشكيلات سمعية
14	زوجي بلا طموح
*1	أخرة الطموح
*1	أخص على دي الأيام
24	الأمير الفنان
۵۵	أخرة المال الحرام
70	حدث بالفعل
YO	التقرير
AO	العقرب لا ينسى
90	المستهتر
1.4	النداهة
***	جحود جحود
177	الشك يا حبيبي
144	القاضي العادل
127	الدنيا حظوظ

## 

إلى الصديق المخرج الإذاعي الفنيان منصور يوسيف منصور وسيوسي منصور على الفضيات في القتصامي لهيكر فون الإذاعة مؤلفاً وممثلاً ومخرجاً

والى أقرب من لي في الحياة اللابن والصديت والصديت والحبيب شروع مشروع فنان متميز في المستقبل القريب

مع خالص الود منیر زخاری

## مقرمة

يصطفى الله بعض الناس ويهبهم مواهب متميزة. ومن الصعب أن تخطئ التعرف على صاحب الموهبة. منير زخارى صاحب موهبة خاصة حباه الله بها ومن السهل إدراك ذلك. ولو انسقت وراء من يتصورون أن الإنسان يمكن أن يتحلى بأكثر من موهبة، وأن هناك من هم متعددو المواهب، لوضعت منير تحت هذا التصنيف. لكنني أرى أن الموهبة واحدة، قد نتعدد في البعض وسائل التعبير عنها. الموهبة نسمه من الله في الإنسان. تعبر عن نفسها بأساليب متعددة: شعراً أو نثراً، موسيقى أو غناء، نحتاً أو تصويراً.

منير زخارى تتفجر موهبته في الكتابة، هو كاتب واقعي يغرس قلمه في المجتمع ليكتب في صدق وأمانة.

وتتفجر موهبته في الرسم والديكور، فتتراقص ريشته على الورق ساخرة وساحره.

وتتفجر موهبته في التمثيل، فيعبر بصوته وحركاته عما يتقمصـــه مــن شخصيات تضحكنا أحياناً وتبكينا أحيان أخرى.

بكل سعادة أستقبل مع القارئ العربي كتاب منير زخارى الأول، الذي يحتوي جانباً من موهبته، متمنياً أن يتبع هذا الكتاب كتب أخرى تحتاج إلياها المكتبة العربية.

شكراً يا منير على هذا المجهود وإلى الأمام دائماً.

منیر فرج الله دیسمبر ۲۰۰۰

# تشكيلات سمعية

الفن الدرامي الإذاعي من أكثر الفنون صعوبة.. وكتابة الدراما التي تعتمد على استقبال الأذن وحدها كتابة لها شروطها المقيدة، ولا يستطيع أن يتعامل مع القيود إلا العارف بأسرار مفاتيحها. كيف يمكن أن ترى الأذن؟ هذا هو السؤال الذي يبذل الكاتب فيه نصف مجهوده على الأقل وعليه بعد ذلك أن يقطع نفس الشوط الذي يقطعه كاتب الدراما غير الإذاعية.. وهذا هدو قدر كاتب الدراما الإذاعية أن يبذل ضعف الجهد ولكن ومن وجهة نظري لكسي يصل إلى ضعف النتيجة. نعم.. هذا ما أتصور أنه العدل الفني.. لأن وصف تفصيلات الصورة يفسح المجال لتكوين صورتين في نفس الوقت أو بالأحرى محصلة لقاء صورتين: الصورة التي حددها بالكلمات كاتب الدراما الإذاعية.. والصورة التي يصنعها بنفسه المتلقي بعد رص جزيئاتها إلى جدوار بعضها البعض.. وكأن لوحة جدارية يتم إعادة تجميع بالطاتها الفسيفسائية بعد ما تسم البعض.. وكأن لوحة جدارية يتم إعادة تجميع بالطاتها الفسيفسائية بعد ما تسم نقل هذه البلاطات من مكانها الأصيل.

إن المتلقي للدراما الإذاعية هو المتلقي الإيجابي الذي يشارك في صناعة الخيال الدرامي، وذلك على العكس من متلقي الدراما التلفزيونية الذي يستسلم للصورة المفروضة التي تصله عبر الشاشسة الفضيسة. وللوصسول للنتيجة المرجوة من كتابة الدراما الإذاعية فإن كاتبها لابد وأن يتبادل باستمرار موقعه مع المتلقي المفترض. ليتعرف على كفاءة الكلمات وقدرتها علسى الإيحساء فكلمات كاتب الدراما الإذاعية هي الخطوط الأساسية التي يصنع منها الكاتب الجرافيك السمعي المجسم الذي يريده، تاركاً للمستمع الفرصة والحق فسي أن يشكل بدوره ملامح هذه اللوحة الجرافيكية.

ولأن منير زخاري فنان تشكيلي بارع يمتلك أدواته التشكيلية كأحسن ما يكون الامتلاك، ومتمكن من مفردات فنه تمكنا يسمح له بالتعبير الحر عما يسكنه من أفكار ويعتريه من مشاعر،.. فقد استطاع وهو يتقدم إلى مجال الكتابة الدرامية الإذاعية، أن يترجم موهبته التشكيلية إلى لوحات سمعية، لها نفس سمات فنه الأول الذي أشتهر به وتميز فيه. هذا هو منير زخاري، الفنان المرهف الحساسية، والمبدع الأصيل الإبداع، يضع أمامنا أوراق اعتماده وهي كثيرة ومتنوعة وثرية ككاتب محلق الخيال، وفي نفس الوقت ملستزم بإعدة اكتشاف كل القيم الاجتماعية البناءة. وذلك من خلال دأبه ومثابرته وتجويده المستمر في عرض نماذجه وتركيباته الدرامية الواقعية، المستهدفة دفع المجتمع إلى الأرفع في العلاقات بين أفراده والأنفع في نفس الوقت.

إن نماذجه التي يختارها تعيش دائماً بيننا وتمثلنا، وهو يضيئها من داخلها فيضيئنا معها، ويعرفنا على ما غمض علينا ونحن مشغولون بالهرولة في دروب الحياة واللهائ خلف قاطرة تفصيلاتها اليومية.

إن الجانب الأخلاقي الذي يحرص منير زخاري على التأكيد عليه في عرضه لعلاقاتنا الاجتماعية يغيب عن بعض كتاب الدراما، الذين يحرصون أكثر ما يحرصون على البريق الفني. ولكن التوازن المرهف بين القيمة الأخلاقية والقيمة الفنية هو ما يميز دراما منير زخاري، الذي تعد كتابته في هذا المجال إثراء له وإضافة حقيقية وجهدا مشكوراً نتمنى له أن يتواصل ويتكثف ويزدهر.

الشاعر: أحمد تيمور

# حوادیت مصریة

#### (مسمع ۱)

حازم: نوال .. أنتى فين يا نوال..

نوال: بغسل الصحون .. عايز حاجه يا حازم؟

حازم: أه . وحياتك فنجال قهوة سكر زيادة..

نوال: أنا مش لسه عامله لك فنجال نسكافيه.

حازم: دماغي نايمه .. وبصراحة في فيلم أجنبي في التلفزيون جاي في السهرة نفسي أتفرج عليه بمزاج.

نوال: وآيه اللي هايسهرك وأنت عندك شغل الصبح بدري وكل يوم بـــأصحيك بالعافية..

حازم: ما فيش مشكلة .. ما أنا بأروح أنام في الشغل .. الله على نومة المكتب يا نوال الله على النوم وسط الدوسيهات والملفات وشكاوي المواطنين ولو لسه فاضل وقت على ميعاد الانصراف بأقعد أحل الكلمات المتقاطعة..

نوال: وأخر الشهر تقبض مرتبك عادي جداً.

حازم: وهما الكام ملطوش اللي بقبضهم من الحكومة دول بتسميهم مرتب؟

نوال: أحمد ربنا يا أخى . أديك بتقبض وأنت نايم من غير ما تشتغل..

حازم: على الأقل أنا بروح الشغل كل يوم مش زي غيري من زمايلي اللــــي بيمضي حضور وانصراف كل يوم وهو نايم فــــي بيتــهم أو مــزوغ ولابيسلك نفسه في حته تانية.

نوال: معقول؟ طب إزاي؟

حازم: بيتفقوا الزمايل مع بعض الحاضر يمضي للغايب و لا من شاف و لا مــن دري.

نوال: دا يبقى تزوير فى أوراق رسمية.

- حازم: كله ماشي على كده. بس أنا لا يمكن أعمل حاجة زي دي. ضميري ما يسمحليش. أنا بمضي بنفسي حضور وانصراف كل يوم.
- نوال: يا سلام وضميرك ده مش بيأنبك لما بتهمل شغلك وتستغل وقت العمــــل في النوم و لا في حل الكلمات المتقاطعة.
- حازم: أهو على أد فلوسهم يا نوال وبصراحة بقى كله محصل بعضه .. اللي يشتغل زي اللي مابيشتغلش .. كلهم أخر الشهر بيقبضوا . يبقى أشستغل وأتعب وأوجع دماغي على الفاضي ليه مادمت في الآخر أقبض مرتبي على داير مليم . وعلى رأي المثل تشتغل أكتر .. تغلط أكتر . تتجازى أكتر . ماتشتغلش ماتغلطش تترقى وتقديرك يبقى ممتاز .

نوال: يعنى كل اللي يهمك تقبض مرتبك والسلام.

حازم: أمال بأشتغل ليه، طبعاً. ما هو علشان الفلوس.

- نوال: كنت فاكره أنك بتشتغل علشان تحقق ذاتك وتشعر أن ليك قيمه في الدنيا العمل بيدي الإنسان قيمة وثقة بالنفس وبقدراته لما يحس أنه بيعمل حاجة تفيده وتفيد مجتمعه. لكن أنت لا حصلت كده و لا كده .. يا خسارة على شبابك اللي بيضيع هدر.
- حازم: أه حصه الشعارات ابتدأت .. لا أرجوك يا نوال يا حبيبتي .. دماغي مش رايقه للكلام الكبير ده ممكن نأجل الحصه القيمة دي لوقت تاني وأرجوكي عايز أشرب القهوة المظبوط من ايدين مراتي حبيبتي ربنا مايحرمنيش من عطفها وحنانها.
- نوال: أنا حزينة عليك أوي يا حازم. مش ده حازم اللي أنا حبيتـــه واتمنيــت أرتبط به راح فين طموحك.. كل ده انتهى.

حازم: ليه ياختي .. ما أنا زي الفل أهه .. يا خبر أبيض ده الفيلم أبتدأ. (موسيقي)

#### (مسمع۲)

المدير: الله .. الله دي خلاص مابقتش مصلحة حكومية .. دي بقت لوكانده أنت يا أستاذ يللي نايم على مكتبك فز قوم .. أصحى.

حازم: بس يا نوال .. بطلي غلاسه .. عايز أنام ..

المدير: نوال .. نوال .. أنا نوال يا قليل الآدب . اصحى بأقول لك أحسن لك.

حازم: أيه .. مين .. في أيه .. يا نهار .

المدير: صبح النوم. ناموسيتك كحلي يا أستاذ.

حازم: سيادة جناب المدير العام .. صباح الخير ..

المدير: أنت فاكر نفسك فين يا أستاذ . في أوضه نومك .. على سريرك أنا لازم أعلمك ازاي تحترم شغلك والمكان اللي بيقبضك فلوس.

حازم: ليه بس يافندم؟.

العدير: أنت لسه ليك عين تقول لي ليه يابني آدم . أنت موظف مهمل في شغلك وغير أمين في عملك ومعطل مصالح المواطنين. أنت عالم على المجتمع. أنت عماله زايده لابد من التخلص من أمثالك. أنا لازم أتخذ معاك الإجراءات القانونية. أنت متحول للتحقيق يا أستاذ..

(موسیقی)

### (مسمع۲)

حارم: نوال .. أنتي فين يا حبيبتي . نوال . الله ما بترديش ليه .. نــوال مــا عرفتش مش أنا أوقفوني عن العمل يا حبيبتي . بس هايصرفولي نــص مرتبي لحد التحقيق ما يخلص.. إيه يعني كنت نايم على مكتبـــي ومــا خلصتش الشغل المطلوب مني.. إيه يعني، كل موظفين الحكومة بينــاموا على مكاتبهم الشمعنى أنا يعني. أه أكيد علشان أنا... أنا عارفة الأســتاذ عبد الملك المدير العام راجل متعصب ضد المسيحيين.. متعصب إزاي بس ده زيي. آمال ليه عمل في كده.. ما تعرفيش ليه يا نوال .. نــوال سمعانى يا حبيبتى..

نوال: سمعاك من بدري.

حازم: ومابترديش ليه.

نوال: علشان ما عادش عندي غير رد واحد..

حازم: إيه هو يا حبيبتي.. الله إيه الشنطة اللي في أيدك دي؟

نوال: دي شنطة هدومي.

حازم: هدومك؟

نوال: ها أرجع بيت ماما.

حازم: ليه هي حماتي تعبانه ولا حاجه لا سمح الله ..؟

نوال: ها امشى .. زهقت .. طهقت من العيشة معاك ..

حازم: ليه يا حبيبتي .. ليه متعصبة كده يا روحي؟

نوال: ليه؟ كل ده ولسه مش حاسس ليه .. أنت دافنتني معاك هنــــا بالحيـــا .. الحياة معاك بقت لا تطاق. مستحيل استحملك أكتر من كده.

حازم: أنا يا روحي. أخص عليكي.. بطلي هزار بقي.

نوال: كل يوم بأحس أنى بموت ألف مره وجنابك و لا أنت هنـــا و لا حاســس بحاجة كل همك ترجع من شغلك تتغدى ونتام وتقوم تطلب الشاى وبعدين القهوة والنسكافيه وتجهز أكياس اللب والسوداني وتلبد قدام التلفزيون لحد ما الإرسال يخلص وأثناء ما سعادتك تتفرج وتستمتع الطلبات ما بتخلصش.. نوال لو سمحتي قشري لي برتقاله. نوال لو سمحتي أديني أشرب. نوال لو سمحتي جهزي لي العشا، نوال لو سمحتي تعالي أقفلي التلفزيون.. نوال لو سمحتي عايز أنام تعالي غطيني .. والخدامه الليب خابك الجوزتها علشان تخدمك ما تبطلش شغل ليل ونهار. في البيب غسيل ومسح وطبيخ لحد ما حيلي أتهد من التعب وسموك و لا هنا.. ما عندكش استعداد حتى تمد أيدك في حاجه و لا على الأقل تقوم تشرب نفسك لو عطشت. و لا تشيل طبق من قدامك توديه المطبخ هو أنا إيه يا أخي مش إنسانة زيك لحم ودم. هو أنا مكنة ما بتتعبش. طب دي حتى المكنة ممكن في يوم تعطل وتقف وأنا أتكتب علي الشقا ليل نهار علشان أخدم سعادتك. ومش مفروض على في أي يوم أقول أه تعبانه أو مسش قدرة أو محتاجة أستريح .. لا يا أستاذ خلاص .. الدافع اللي كسان مخليني مستحمله كل ده خلاص راح وانتهي.

حازم: الدافع .. وايه هو الدافع ده؟

نوال: الحب والاحترام.

حازم: يعني إيه يا نوال . يعني ما عدتيش بتحبيني و لا تحترميني.

نوال: ولا حتى باحب عيشتك. طهقت. طهقت خلاص.

حازم: ليه يا نوال يا حبيبتي كل ده.

نوال: لسه بيقول ليه .. أنت السبب في اللي وصلنا ده كله.

حازم: أنا برضه. بعد كل الحب اللي بأدي هولك .. طب ده كل الستات اللي حواليكي بيحسدوكي على وأنت بنفسك اللي قلتي لي كده. تبقي دي أخرتها برضه يا نوال. لا ده أنا كده زعلان منك وما أحبش انك تبقي جاحده علي بالشكل ده..

نوال: جاحده .. أنا عايشه مع إنسان مالوش أي علاقة بالإنسان اللــــي كنــت بأحبه واحترمه وأقدره. ما فيش علاقة بينكم غير الملامح وبس.

حازم: شفتي أدي أخره قرايتك في الآدب والفلسفة.. ياما حذرتك.

نوال: حتى ما عندكش استعداد تفكر في كل اللي أنا قلته.. عايز تــهرب مـن المسئولية وترميها على شماعة غيرك..

حازم: أرجوكي يا نوال أنا نعسان وعايز أنام لي ساعة ولا اتنين علشان أقدر أسهر قدام التلفزيون.. أما النهارده جايبين حتة مسرحية مسخره.

نوال: أنت مستحيل تبقى إنسان طبيعي.. مستحيل.

حازم: ليه شايفه مناخيري في قفايا ولا بأمشي على إيدي. بطلي بقى يا نوال. الكلام الكبير ده اللي بتقوليه وييلا يا حبيبتي دخلي الشنطة اللي في في الديكي وفضك من الموضوع الكبير ده وياريت بعد ما أصحى أشرب من إيديكي أحلى فنجال شاى ما حصلش وياريت يكون بالنعناع..

نوال: أنت إنسان مستحيل.. مستحيل.

#### (صوت فتح وغلق باب الشقة بعنف)

حازم: نوال.. أرجعي يا نوال.. وبعدين بقه.. مين ها يغطيني ويحكــــي لـــي حدوتة قبل النوم.

#### (موسیقی)

# حواديت مصرية

# 2000 05

#### (مسمع ۱)

المدير: يا مدام أحلام أنت مكسب عظيم للشركة.. إنسانة طموحة.. مثقفة... المدير: يا مدام أحلام أنت مكسب عظيم للشركة.. إنسانة طموحة.. مثقفي عملك ذكية.. لماحة.. جميلة.. شيك.. وفوق كل ده مخلصة ومتفانية في عملك كمديرة لمكتب المدير العام..

أحلام: مرسى يا فندم.. ده شرف عظيم إنى أشتغل مع حضرتك..

المدير: وعلشان كده أنا أمرت لك بمكافأة خمس شهور بحالهم..

أحلام: يا فندم أنا كل اللي يهمني رضاء سيادتك عني.. الفلوس آخــر حاجــة بأفكر فيها..

المدير: وأوعدك كمان أول السنة المالية ليكي عندي علوة استثنائية وتشجيعية.. ده أقل واجب ممكن نقدمه لإنسانة مخلصة ومتفانية في خدمة الشركة زيك..

أحلام: وإنشاء الله هاكون عند حسن ظن سيادتك يافندم..

المدير: كفاية إن كل أسرار الشركة والمستندات الخطيرة موجودة في الحفـــظ والصون عندك..

أحلام: ده أنا أفديها بروحي بافندم.. دي مسئولية في رقبتي..

المدير: وأنتي أثبتي إنك قدها وأدود.

أحلام: أي خدمة تاني يافندم.. علشان عندي شوية مستندات عـايزه أدخلـها على الكمبيوتر.

المدير: لا إتفضلي.. ولو أنتي عُزتي أي حاجة مني أطلبيها على طول أنتـــي عارفة معزنك عندي يا أحلام..

أحلام: طبعاً يافندم وعلشان كده أنا طمعانه في كرم حضرتك وها أطلب طلب سخيف حبتين..

المدير: يا سلام بس كده.. أطلبي وأنا تحت أمرك..

أحلام: العفو يافندم.. حضرتك عارف إني من يوم ما اشتغلت مديرة مكتب سيادتك وأنا ما أخدتش يوم واحد أجازة.. ظروف العمل كانت تستدعي كده حتى في الإجازات الرسمية.

المدير: عارف عارف ومقدر والله يكون في العون.. أكيد هاتطلبي أجـــازة مش كده..

أحلام: كده يافندم.. أنا آسفة..

المدير: صحيح أنا مقدرش أستغنى عنك.. قصدي الشركة يعنى.

أحلام: فاهمة يافندم.. فاهمة.

المدير: لكن برضه إحنا كنا سخفاء شوية يعني.. أخدناكي من جوزك الباش مهندس ناجي وبنتك الأمورة دينا.. أكيد الحكاية دي مزعلاهم مننا حبتين..

أحلام: لا مش مهم هما أخدوا على كده.. بس في الحقيقة أنـــا محتاجــة يــوم أستريح فيه وأنام.

المدير: بس كده.. ماجتش على يوم و لا اتنين..

أحلام: لأكفاية على يوم واحد بس.. أنا مش محتاجة غيره..

(موسیقی)

سعيد: عمالة تعلى وتعلى على قفانا يا مشيرة..

مشيرة: وآخرتها يا سعيد.. إحنا كده اتركنا على الرف من يوم مــــا شــرفت ومسكت المكتب..

سعيد: الظاهر إنه معجب بيها.. طبعاً مش حلوة وشيك وبنتكلم لغات.

مشيرة: وكل يوم والتاني مكافآت وعلاوات وترقيات وإحنا و لا حد بيهتم بينا.. سعيد: وكل أسرار الشركة والتقارير المهمة عندها..

مشيرة: بيثق فيها ثقة عمياء..

سعيد: مسلمها رقبته وحاطط الشركة كلها في جيبها.

مشيرة: آه لو الثقة دي تتهز.

سعيد: والأسرار تطلع والكل يعرفها بالذات التقارير السرية.. دي تبقى فضيحتها بجلاجل وساعتها ماحدش هايرحمها..

مشيرة: مصيبة عليها وعلى مديرها..

سعيد: بس هو هايطلع منها زي الشعرة من العجين.. ده المدير العام..

سعيد: يبقى نسرق منها مفاتيح مكتبها والخزنة ونعمل نسخة منها.. وآهي بكرة في أجازة ونلعب براحتتا..

مشيرة: فرصة ما تتعوضش..

(موسیقی)

#### مسمع (۳)

#### (صوت بكاء طفلة من بعيد)

ناجى: أحلام اصحى يا أحلام..

أحلام: في إيه يا ناجي.. ما تسيبني أنام يا أخي..

ناجى: الحقى شوفي دينا..

أحلام: دينا مين..

ناجى: دينا بنتك نسيتيها ولا إيه.. ألحقيها بسرعة..

أحلام: يووه.. ودي مالها على الصبح؟

ناجي: عماله تعيط.. قومي شوفي فيها إيه أحسن أيدي مش فاضية.. بأغسل الصحون وبأنشر الغسيل.. بأعمل شغلك يا هانم ما خلاص الأوضاع إتشقلبت..

احلام: أنا تعبانة مش قادرة أقوم من السرير حرام عليك..

ناجي: حرام على أنا و لا حرام عليكي إنتي.. أديكي مموتة نفسك في شـــــغلك وكل ده على حساب صحتك وبيتك وبنتك.. تقدري تقوليلــــي واخديــن منك إيه.. ده البيت بالنسبة لك مش أكتر من لوكاندة يا هانم..

أحلام: وأنا بأعمل كل ده علشان مين؟!

ناجى: علشانك يا مدام.. علشان طموحاتك وأحلامك يا ست أحلام..

أحلام: طبعاً ما آنت متغاظ مني علشان أنا ناجحة في شـــغلي وعمالـــة أتقـــدم وأترقى وأنت محلك سر.. لك حق ما أنت من حزب أعداء النجاح..

ناجي: مش وقته.. البنت مموته نفسها من العياط وإحنا قـاعدين نناقر فـي بعض.

أحلام: قلت لك مش قايمة يعني مش قايمة.. ده أنا ما صدقت أخدت يوم أجازة علشان أستريح.. ناجي: أنت أم أنت.. ربنا مش هايسامحك أبداً.. أمري شه أروح أشوف المسكينة اللي بتعيط دي مالها.. (موسيقي)

نلجي: يا حبيبتي يا بنتي.. أحلام اصحي يا أحلام.. مصيبة.. مصيية أستر يارب..

أحلام: في إيه يا أخي فزعتني..

ناجى: دينا مولعة نار ..

أحلام: وطفيتها..؟!

ناجى: البنت سخنة نار .. حرارتها مرتفعة جداً.. قومى شوفى مالها..

أحلام: يعني شايفني دكتورة.. ما تتصرف يا أخى.. أنت مش أبوها..

ناجي: وأنت مش أمها.. ده زمن إيه الأغبر ده.. أعمل إيه ياربي؟!

أحلام: أنزل الصيدلية أشترى لها علاج.. أي خافض للحرارة وممكن تعملــها كمادات مية سقعة..

ناجي: طيب علشان خاطر ربنا.. اصحي وأقعدي جنب بنتك لحد ما أجيب العلاج وأرجع ولو قدرتي تعملي لها شوية كمادات يبقى كويس.. أستر يارب.. يا حبيبتي يا بنتي.. يا حبيبتي يا بنتي..

#### (موسیقی)

#### (صوت بكاء الطفلة المستمر)

الحلام: يووه هو أنا كنت نقصاكي أنتي كمان ما تتخمدي وتنامي.. دي عيشة إليه اللي تقرف دي.. أنا الحق على إلي أخدت النهاردة أجازة من الشغل.. والتاني ده أتأخر ليه.. يووه ماتتكتمي يا بنت. عياطك بينرفزني.. فين السجاير.. حاجة تحرق الدم.. أما أعمل فنجال قهوة ما خلاص طار النوم من عيني.. ربنا يقلق منامكم إنتي وأبوكي زي ما قلقتوا منامي (صوت رئين التليفون) وده مين اللي بيطلبنا على الفجرد ده.. آلو.. أيوه أنا.. مين.. أيوه يا أستاذ سعيد أنا مدام أحلام.. خير ما أنت عارف إني في أجازة النهاردة.. إيه جناب المدير عايزني آجي الشغل حالاً.. أيوه بس بنتي دينا.. إيه الأمر خطير.. حاضر حاضر.. يا دوب مسافة السكة.. مع السلامة يا أستاذ سعيد.. يا ترى حصل إيه..

ما أنا عارفة إنهم من غيري ما يعرفوش يتصرفوا.. ما كانش مفروض آخد النهاردة أجازة.. الشغل من غيري يقف والعك يشتغل.. بس سحيد صوته مش طبيعي.. أكيد في مشكلة كبيرة حصلت في المكتب وعايزني أحلها (صوت بكاء الطفلة) يا شيخة أنا نقصاكي أنتي كمان.. لما يبقى أبوكي يرجع يبقى يتصرف معاكي.. أنا مش فاضية لك.. ما هو مسش معقولة أقعد جنبك وأسيب الدنيا تضرب تقلب في المكتب..

(موسیقی)

#### مسمع (٤)

سعيد: مدام أحلام أنتي فين . . دي الدنيا مقلوبة في مكتب البيه المدير . .

أحلام: حصل إيه يا سعيد..

سعيد: أدخلي بسرعة وأنتي تعرفي.. ربنا يستر.. (خبط على باب المدير) المدير: (من الداخل) أدخل.. مدام أحلام إتفضلي.. هي دي مدام أحسلم يا

المحقق: حضرتك مدام أحلام مدير مكتب السيد المدير العام مش كده.

أحلام: أيوه يافندم.. أي خدمة..

المحقق: أنا آسف ما عرفتكيش بنفسي.. رشدي منصور محقق من الشيئون القانونية بالشركة..

أحلام: شئون قانونية.. خير يا سيادة المدير حصل إيه؟!

المدير: السيد المحقق هايقول لك بنفسه..

المحقق: حضرتك بقى لك كام سنة بتشتغلي مدير مكتب السيد المدير العام..

أحلام: بقى لي حوالي سنتين..

المحقق: وطبعاً مطلعه على كل أسرار الشركة.. من خلال المستندات.

أحلام: ايوه..

المحقق: يعني بالتأكيد عندك كل المعلومات السرية والمستندات الخاصة المحقق: يعني بالتأكيد عندك كل المعلومات الو التقارير السرية الخاصة المهمة سواء عن الصفقات أو المناقصات أو التقارير السرية الخاصة بالموظفين بالشركة مش كده..

أحلام: دي المهام اللي بيكلفني بيها سيادة المدير العام..

المحقق: أيوه إحنا ماقلناش حاجة.. يعني جناب المدير العام بيثق فيكسي ثقة كاملة والدليل إنه كان بيأتمنك على أسرار الشسركة اللسي ماحدش بيعرفها أو مفروض يعرفها غير هو ومجلس الإدارة.. صح.

أحلام: مظبوط..

المحقق: وبيحفظ عندك المستندات والتقارير الهامة والخطــــيرة اللـــي مــش مفروض حد يطلع عليها من الموظفين..

أحلام: مظبوط كده...

المحقق: وطبعاً المستندات دي أنتي المسئولة عن حفظها..

أحلام: بعضها محفوظ على ديسكات الكمبيوتر وماحدش يقدر يطلع عليه غيري علشان له كلمة سر.. وفي أوراق بأحفظها في الخزنة الخاصدة بيّ في مكتبى.. لكن كل ده ليه أنا مش فاهمه.

المحقق: وطبعاً مفاتيح الخزنة دي معاكي أنتي بس يا مدام أحلام..

أحلام: أيوه وفي نسخة تانية مع جناب المدير العام.. بس برضه كل ده ليه؟ المحقق: وطبعاً جناب المدير العام لازم يحافظ على أسرار شركته وسمعته وأسمه.

أحلام: وأنا كمان نفس الشيء..

المحقق: عال.. يعني لما الأسرار دي تطلع برا..

أحلام: برا فين يعني؟!!

المحقق: براكي أنتي وجناب المدير..

أحلام: مش ممكن.. مستحيل..

المحقق: ولما المستندات الخطيرة السرية دي توصل لإيدين ناس تانية وتصور منها نسخ وتوزعها على كل موظفين الشركة وتتسبب في مشكلة كبيرة بين الموظفين والإدارة، والموضوع يعرض السيد المدير العام لموقف

حرج وخطير أنت اللي إتسببتي فيه وإتسببتي في وجود فتنة وأحقــــاد بين الموظفين..

أحلام: أنا صدقني ما عرفش حاجة عن اللي حصل ده...

المدير: تعرفي و لا ما تعرفيش.. أنتي المسئولة قدامي وقدام مجلـــس الإدارة، أنتي موظفة غير أمينة و لازم تتجازي على خيانتك للأمانــة و إهمـالك الشديد.

أحلام: هي دي آخرتها يا جناب المدير.. هي دي آخرة إخلاصي ووفائي للشركة.. ده أنا ضحيت بوقتي وصحتي وبيتي علشان الشركة ودي آخرتها برضه..

العدير: كنتي بتاخدي حقك وزيادة.. أرجوك يا سيادة المحقق أنا بأطلب وقف المعدير: كنتي بتاخدي حقك وزيادة.. أرجوك يا سيادة الموظفة أحلام عن العمل، وتسلم عهدتها فوراً لزميلها سعيد لحد ما يتخذ مجلس الإدارة قراره بالعقوبة اللي تستحقها..

سعيد: لا مؤاخذة يا جناب المدير.. أصلي في تليفون مهم لمدام أحــــلام مــن البيت.. أحوله لمكتب سعادتك..

أحلام: ممكن يا سيادة المدير..

المدير: حوله يا سعيد وخلصني..

المحقق: وأقفل التحقيق في ساعته وتاريخه وتم تسليم عـــهدة الســـيدة أحــــلام للأستاذ سعيد وعمل جرد لكل ما لديها من مستندات وديسكات..

أحلام: آلو.. في إيه يا ناجي.. بتقول إيه.. دينا بنتي.. مالها إيه بنتي دينا.. لا.. لا.. حرام.. حرام..

#### الختام

# حوادیت مصریة

# 

#### (مسمع ۱)

أديب: خلاص يا وداد مسافره...

وداد: أشوف وشك بخير يا أديب خلى بالك من صحتك.

أديب: وأنتى خلى بالك من نفسك، وأبقى بوسيلى شيري.

وداد: مسافره وقلقانه عليك... دي أول مرة أبعد عنك من يوم ما أتجوزنا من أربعين سنة يا أديب.

أديب: مش مصدق أني أصحى الصبح مالاقيكيش في البيت، معلش فـــــتره وتعدي وإنشاء الله ترجعي لينا بألف سلامة.

وداد: لو مكانتش و لادة بنتك شيري و لازم أكون جنبها مستحيل كنت أســـــيبك لوحدك... بس أو عدك بعد ماتولد و اتطمن عليها هارجع على طول.

#### موسيقى

### مسمع (۲) (أصوات باعه في سوق الخضار)

صوت ١: مجنونة يا قوطه...

صوت ٢: زي العسل يا كوسه.

أديب: لو سمحت أديني كيلو طماطم.

البائع: جامده و لا طريه و لامؤاخذه.

أديب: مش فاهم هو فيه فرق.

البائع: للطبيخ يعنى ولا للسلطة.

ادیب: من ده علی ده.

سعاد: كيلو كوسه لو سمحت.

البائع: نقى اللي يعجبك يا مدام.

سعاد: الله... أستاذ أديب... صباح الخير... أنت بتعمل إيه هنا؟

أديب: زي ما حضرتك شايفة باشتري خضار.

سعاد: دي أول مرة أشوفك في السوق.

أديب: بالظبط كده يا هانم...

سعاد: هانم... الظاهر حضرتك مش واخد بالك مني.

أديب: في الحقيقة أصلى...

سعاد: أنا مدام سعاد... جارتك اللي ساكنه في الشقة اللي قصادك.

أديب: أه... أهلاً وسهلاً يا سعاد يابنتي.

سعاد: تسمحلي أنقيلك الطماطم بنفسي... ياه ده الظاهر أنك معندكيش فكره

. خالص في المسائل دي...

أديب: ليه يا مدام.

سعاد: نص الطماطم اللي نقتها مفعصه...

أديب: اعمل إيه حكم القوي.

سعاد: خير هي مدام حضرتك فين؟

أديب: سافرت كندا.

سعاد: هاجرت... وسابيتك؟

أديب: لا زيارة لبنتا شيري أصلها على وش ولادة.

سعاد: ربنا يطمنك عليها ويرجعلك المدام بألف سلامة.

#### موسيقى

#### مسمع (۳)

(صوت خبط على باب شقة الأستاذ أديب)

أديب: (من الداخل) أيوه... مين اللي بيخبط على الباب.

سعاد: صباح الخير يا أستاذ أديب.

أديب: صباح النور مين حضرتك.

سعاد: طيب مش الأول تفتح الباب وبعدين أقولك.

أديب: أرجوك... لو ماقلتيش أنتِ مين وعايزة إيه مستحيل أفتح الباب.

سعاد: اتطمن... أنا مدام سعاد جارتك.

أديب: أه... أسف... حاضر يا بنتي لحظة (أصوات فتح أقفال وترابيس)

سعاد: كل دي أقفال وترابيس... ليه كل ده يا أستاذ أديب.

أديب: أعمل إيه يا بنتي أنا راجل كبير وبقيت عايش لوحدي والأمر مايسلمش مش ممكن يدخل عليه حرامي و لا مجرم يعمل فيه حاجة كده و لا كده... و الجرانين مليانه حوادث بالشكل ده و دايماً الضحايا اللي عايشين لوحدهم و بالذات من المسنين اللي زي...

سعاد: ربنا يحميك وإنشاء الله من هنا ورايح أنا هاخد بالي مــن حضرتـك. أرجوك لو أحتجت أي حاجة خبط على وأنا تحت أمرك... أنا زي بنتك مش كده و لا ايه.

أديب: ربنا يخليكي يا سعاد يا بنتي. تخيلي لما فجأة تلاقي البيت اللي كيان مليان هيصة وعيال وقرايب وأصدقاء تلاقيه في النهاية أتصفى عليه أنا لوحدي... لا زوجة ولا أبناء ولا أحفاد مليش صديق غير الوحدة والصمت الرهيب... زي ما أكون محبوس في سجن أنفرادي...

سعاد: ياه.. دي حاجة صعبة قوي... ربنا يكون في عونك طيب عن إذنك... بقول إيه مش عايزني أشتريلك حاجة من السوق. طماطم مثلاً.

أديب: متشكر يا بنتي الثلاجة مليانة أكل بس فين النفس اللي تأكل متعودتـــش آكل لوحدي طول عمري...

سعاد: لا... ده حضرتك لازم تأكل وتتغذى... صحتك بالدنيا أنـــا هـاوصل بسرعة لحد مدرسة شادي ونورا.

**اُدىب:** شادي ونورا مين؟

سعاد: والادي.. أدفعلهم مصاريف السنة الجديدة وأرجع على طول.

أدبيب: وهما فين الولاد.

سعلا: قاعدين عند بابا وماما كام يوم وأهي فرصة أستريح مــن دوشــتهم... وإزعاجهم ده أنا عايشة في مورستان. أديب: دوشتهم يعني!!... سبحان الله... كل واحد مش راضي باللي هو فيه... ياريت كنت ألاقي حد يدوشني ويزعجني بدل ما أنا قاعد طول النهار... أكلم الحيطان... وأسمع الصمت... بقول إيه يا سعاد يا بنتي.

سعلا: أؤمر يا أستاذ أديب.

أديب: بابا أديب أحلى.

سعلا: أؤمر يا بابا أديب...

أديب: ممكن يعني لو مفيهاش إزعاج يعني. ممكن شادي ونورا و لاد حضرتك لما ييجوا بالسلامة من عند جدتهم ييبقوا يقعدوا عندي طسول النهار وملكيش دعوة بيهم خليهم يلعبوا ويصرخوا ويطنططوا ماتشيليش همهم وآخر النهار استلميهم مني زي الفسيخة قلتي إيه يا سعاد يا بنتي؟

#### موسيقي

# مسمع (٤)

سعاد: إيه الأخبار يا بابا أديب... لسه مُصر.

أديب: مُصر وبس دا أنا مُصر ومُصر ومُصر هو في أحلى من الأطفال وأزعاج الأطفال... الأطفال أحباب الله يا سعاد يا بنتي عن إذنك بقله علشان عندنا النهارده برنامج حافل وبصراحة ملش عليزين عطلة ياللاياولاد.

سعاد: ماشاء الله شايفاك أخر نشاط وحيوية على الصبح.

أدبيب: رايحين حديقة الحيوان، وبعدها الملاهي ولو في وقت، احتمال نــــروح مسرح العرايس..

سعاد: الله الله كل ده في يوم واحد يا بابآ أديب.

أديب: أه... بدينا القر... ربنا يستر بينا يا ولاد أمكم عايزه تضيع وقتنـــا فـــي. حكاويها الفاضية.

الأطفال: باي يا ماما..

#### موسيقى

# مسمع (٥)

سعاد: صباح الخير يا بابا أديب.

اديب: صباح الفل يا ست الكل... يا أم أحلى وأظرف أطفال في الدنيا.

سعاد: بصراحة يا بابا أديب أنت دلعت العيال زياده عن اللزوم وأنا وأبوهـــم مش مربينهم على كده. متأخذنيش يعنى.

أديب: ليه... ما يدلعوش ليه... هو انتوا عندكم أعز منهم... يا ستى ســـــيبيهم يدلعوا ويتبسطوا ويهيصوا هي دي أيامهم وبكره لما يكــبروا يــترحموا على الأيام الحلوة دي. ويقولوا يارينتا نرجع عيال زي زمان.

سعاد: تصور الولاد أول ما يفتحوا عينيهم على الصبح يقعدوا يزعقوا ويقولوا عايزين ديبو ... عايزين ديبو ... ظيب لما تفطروا يا ولاد وتغسلوا وشكم هانفطر مع جدو ديبو ... خلاص مبقوش طايقين يقعدوا معايا ولا مسع أبوهم يرضيك كده.

اديب: إزاي... ده أنتوا الخير والبركة... أصلهم أطفال والطفل عـــايز اللـــي يلاعبه وياخده على قد عقله.

سعاد: ده غير الهدايا واللعب والحلويات... لا يا بابا أديب كده زياده قوي.

أديب: ولادك يا سعاد يا بنتي بيعوضوني عن أحفادي اللي عايشين في الغربة... بشوفهم بأحس أني شايف أحفادي وكأني بلاعبهم ويلعبوني... ده على رأي المثل أعز الواد واد الواد عن إننك بقى عاشان أجهز السندويتشات أصلنا النهارده رايحين نلعب في النادي مع بعض...هاعلمهم الجولف...

سعاد: جولف.

أديب: أه دي لعبة العواجيز اللي زي.

موسيقى

# مسمع (۲)

فايق: وأخرة المهزلة دي أيه يا سعاد؟ الراجل ده مش ناوي يجيبها البر ويخف عننا شويه. في آيه نفسي أفهم.

سعاد: يا فايق حرام عليك الراجل طيب وفرحان بعيالك بيحبهم ويعطف عليه عليهم زي أحفاده غير اللعب والهدايا والحلويات اللي بيشتريها لهم.

فايق: ما هو ده اللي قلقني ومش مريحني... بقه معقوله بيعمل كل ده لله فـــــي لله فــــــي لله فـــــــي لله فــــــــي لله كده من غير ثمن؟

سعاد: ويعني اللي زي ده هايكون غرضه إيه.. ده قد أبويا وصحته على قده وحديد يا حبة عيني ماحدش مسليه في وحدته غير عيالك وعلشان كده بيعمل كل ده حرام تحرمه من السعادة دي.

فايق: معرفش برضه مش مستريح.

سعاد: أنت كده دايماً شكاك متهيألك أن كل الناس شياطين... محدش بيعمل الخير بهدف الخير وبس... لكن حتماً أن يكون وراه غرض مش كويس. يا راجل حرام عليك وأخلع النظارة السوده اللي لابسها.

فايق: نظاره سوده، طب ده أنا عمري ما لبست نظاره... نظري ٦/٦ ... فين هي النظاره السوده يا ظالمة. بس برضه الفار بيلعب في عبي!! هي إيه حكاية الراجل ده بالظبط!!

موسيقي

# مسمع (۷)

(صوت خبط على باب الشقة)

سعاد: أيوه... مين؟

أديب: أنا بابا أديب يا سعاد يا بنتي أفتحي بسرعة.

سعاد: (فتح الباب) صباح الخير يا بابا في حاجة لا سمح الله.

أدبب: عبالك مجوش ليه لحد دلوقتي يا ست سعاد؟ أنطقي وخلصيني.

سعاد: أه... هو أنا ماقلتلكش يا بابا أديب.

أديب: مقلتليش إيه يا هانم ما أنا ناقصك.

سعلا: أصلهم نزلوا مع باباهم يزوروا جدتهم واحتمال بباتوا عندها كام يوم.

أديب: جدتهم تاني ... خير إيه اللي حصل يا سعاد في إيه؟

سعاد: أصلي أنا وفايق... هانحتفل النهارده بمناسبة خاصة واحتمال نتعشـــــــى بره وبعدها هانروح السينما.

أديب: برضه مش فاهم يا سعاد.

سعاد: طيب أهدى بس مالك عصبى كده على الصبح.

اديب: أنا مش عصبي يا ست سعاد... أتفضلي يا هانم وضمي كلامك قبل ما أجيب الخرزانه وأمدك على رجليكي.

سعاد: ليه كل ده يا دبدوبتي.

أديب: مش وقت هزار يا سعاد.

سعاد: أصل النهارده عيد جوازنا.

أديب: آه... كده... قلت لي... بس برضه كان ممكن تعملوا كل اللي نفسكم فيه والولاد يبقوا عندي من غير ماحد يزعجكم...

سعلا: معلش بقى يا بابا أديب.

أديب: هاسامحك المرة دي أنت وسي فايق جوزك... علشان عيد جوازكم، بس أعملي حسابك من بكره الصبح بدري تروحوا تجيبوا شـــادى ونــورا فاهمه يا هانم..

سعاد: حاضر يا بابا أديب...

أديب: بقولك إيه... خليك واقفه على الباب لحد ماجيلك...

سعاد: رايح فين...

أديب: لحظة وأرجعلك... إياك تتحركي من مكانك...

سعاد: أوعى تكون رايح تجيب الخرزانه سماح المرة دي... الله هو في إيــه.. لما أشوف.

أديب: أتفضلي يا سعاد يا بنتي... كل سنة وأنتم طيبين وربنا يجعل كل أيامكم سعادة وحب يارب.

سعاد: إيه الظرف ده يا بابا أديب.

أديب: ده مبلغ بسيط هدية مني بالمناسبة السعيدة دي. أعمل إيه فجأتيني بحكاية عيد جوازكم دي وطبعاً ملحقتش أشتريلكم هدية.

سعاد: أيوه بس أنا مقدرش أقبل حاجة زي دي.

أديب: عبب... أبوكي وبيدكي هدية ماتقبلهاش إزاي تبقي جليطة... مدي إيدك وخدي الفلوس يا بنت بدل ما أجيب الخرزانة. (موسيقي)

# مسمع (۸)

سعاد: (لنفسها) وبعدين بقه يا سعاد في الحوسة دي... أقول لفايق أيه بــس!! ده متلكك للراجل ولو عرف أنه أداني فلوس هايفهم غلط وسوء الظــن يشتغل جواه. ومش بعيد يتهمني بأفظع الاتــهامات، مـا أنـا عارفاه كويس... أحسن حاجة مقلوش وأخبي الفلوس لحد ما أشوف هـاتصرف إزاي أخبي الفلوس فين!! أيوه تحت مرتبة السرير.

فایق: بتعملی ایه یا سعاد...

سعاد: يا نهاري ... فايق ... أبداً ... أنا بادور على منديل.

فايق: تحت مرتبة السرير يا سعاد.

سعاد: أبوه... بفردهم...

فايق: طيب لو سمحتى أعمليلي فنجان قهوة أحسن مصدع.

سعاد: قهوة دلوقتي ما بلاش... يا فايق.

فايق: بقولك عايز أشرب قهوة... يللا أتحركي بلاش لكاعه.

سعاد: حاضر ... حاضر ... أستر يارب (تخرج)

فايق: أكيد في حاجة مريبة بتحصل من ورايا أنا لازم أشوف سعد كانت بتخبي إيه تحت مرتبة السرير ياه دي المرتبة تقيلة قوي.. الله.. إيه دد... سعاد... يا سعاد... أنت سعاد...

سعاد: نعم يا فايق.

فايق: إيه اللي في الظرف ده.

سعلا: ظرف.

فايق: أنطقى الأقطع خبرك.

#### موسيقى

# مسمع (۹) (صوت خبط على بابا أديب)

اديب: مين... مين.

فايق: أفتح يا جدع أنت.

أديب: (فتح الباب) أستاذ فايق... خطوه عزيزة أتفضل يابني...

فايق: أنا مش أبنك... وإذا كنت ضحكت على مراتي وكلت بعقلها حسلاوه بكلامك العبيط ده فأنا لا... فاهم.

أديب: في إيه يا أستاذ فايق... مالك داخل بزعبيبك كده ماتفصل شويه يا أخي. فايق: أنت اللي اديت سعاد مراتي الفلوس دي.

أديب: أيوه.

فايق: بمناسبة إيه تديها فلوس.

أديب: بمناسبة عيد جوازكم كل سنة وأنتم طيبين وربنا يجعـــل أيـــامكم كلـــها سعاده و...

فليق: وأيش حشرك أنت في عيد جوازنا وحيانتا من أصلب... أبوها... أخوها... عمها.

اديب: أنا زي أبوها وهي زي بنتي وأكتر.

فايق: سعاد مالهاش غير أب واحد أتجوزت بنته... يبقى بأي حسق تعرض عليها فلوسك عايز منها إيه يا راجل يا عجوز يا مراهق عسايز من مراتى إيه... انطق الأقطع خبرك الفلوس دي تمن إيه يا جدع أنت.

أديب: الله... الله... ليه بس كده يا بني بلاش تهور ليه الظـــن الســيء ده...
سعاد دى زي بنتي هاكون عايز إيه منها يعني غير علاقة طيبة علاقــة
اب ببنته ده غير أني راجل مريض ويعني معنديش أي غرض سـيء لا
سمح الله. أخص عليك أخص مكونتش انتظر منك كده أبداً.

فايق: على بابا يا خويا... الكلام ده تضحك به على عقول النساس السهبل... البلاوي كلها ماتجيش غير من العواجيز المراهقين اللي زيك... اسمع يا راجل أنت... ده أخر إنذار لك وإياك تقرب ناحية مراتي ولا عيالي من هنا ورايح وإلا هاخلي فضيحتك بجلاجل. ولو يا أخي تعبان قوي كده أبعت للست مراتك ترجعك بدل ما تبصبص لمرتات جيرانك.

#### موسيقى

# مسمع (۱۰)

أديب: أخص على دي الأيام.. أدي أخرة المعروف مش حرام يـــاربي أزرع الخير وأحصده شر... ليه الناس بقت وحشة كده ليه كل حاجة بقه لــها ثمن... ليه الناس مابقتش مأمنه أن ممكن إنسان يقدم الخـــير والحــب والسعادة للآخرين بنفس نقيه وبهدف نبيـــل... ملعونــة دي الأيــام... ملعونة دي الأيام.

#### موسيقى

# حوادیت مصریة

# Ulidly Juoll

# (مسمع ۱)

أمير البلاد: يا سياف الإمارة الهمام.

السياف: سمعاً وطاعة يا سمو الأمير المعظم حاكم البلاد.

الأمير: أبننا الأمير سالم...

السياف: يطول عمره... ويعلي شأنه.. وينصره على من يعاديه.. هاي هو.

الأمير: يا أخي ارحمني شويه ربيتلي الخفيف بالفزع بتاعك ده.. أبعد السيف

اللي في أيدك ده عن وشي بتشائم جاتك الهم...

السياف: رقبتي فداك يا مولاي..

الأمير: مش وقته.. كنا بنقول أيه.. آه أبننا سمو الأمير سالم..

السياف: يطول عمره.. ويعلى شأنه.. وينصره على من يعاديه هاي هو.

الأمير: برضه مش ناوي تبطل العاده اللي فيك دي.. بأقول لك أبعد الســــيف

عن وشي بتشائم وخلي سيفك في غمده... جاتك الهم.

السياف: رقبتى فداك يا مولاي..

الأمير: طب خد بالك المره اللي جايه أحسن ما تلقهاش فوق كتفك...

السياف: هي أيه يا مولاي...

الأمير: رقبتك يا فالح..

السياف: آه مفهوم يا مولاي..

الأمير: كنت بأقول أن أبننا الأمير س... ولا بلاش.. أبننا النهارده كمـــل ١٦

سنه.

السياف: يطول عمره.. ويعلى شأنه...

الأمير: وبعدين يا سياف.. إتكتم.

السياف: أتكتمت يا مولاي..

الأمير: أبننا مهتم شوية زياده بهواية الرسم وطبعاً ده يتعارض مـــع مركــزه وهيبته علشان كده لازم نتعاون مع بعض في...

السياف: رقبتي يا مولاي..

الأمير: أصبر مش لما تعرف عايز منك أيه.. احنا لازم نبعده عن حكاية الرسم دي ونشغل كل وقته وتفكيره في الاهتمام بفنون المبارزة والقتال. السياف: مولاي يأمر وأحنا نطيع..

الأمير: ها أدى لك مهلة لمدة شهر بحاله.. أستلم بعدها سمو الأمير سالم.

السياف: يطول عمره ويعلى شأنه وينصره على من يعاديه هاي هو.

الأمير: كده.. يعني بتتحداني يا سياف.. عايز تفرسني.. بأقول لك أبعد السيف من قدام وشي بتشائم.

السياف: رقبتى فداك يا مولاي..

الأمير: عايز بعد شهر بالتمام والكمال أشوف أبني فـــارس فرســـان الإمـــارة وأقوى وأعظم رجالها.

السياف: سمعاً وطاعة يا مولاي..

الأمير: وينسى خالص حكاية الرسم دي..

#### (أصوات لخرير المياه وزقزقة العصافير وحفيف الأشجار)

الأمير سالم: الله على الطبيعة الجميلة. سبحانك يارب يا أعظه فنهان في الوجود. الله على ألوان الطبيعة الجميلة. الله على أنغهام زقزقة العصافير فوق الأغصان. الله على خرير المياه وهي بتتناغم في سيمفونية رائعه لبيتهوفن. يا سلام لو أقدر أنقل الطبيعة الجميلة دي في لوحاتي اللي بأرسها نفسي أسجل كه مشاعري وأحاسيسي دي بالفرشاه والألوان زي جويا وليوناردو دافنشي..

السياف: مولانا الأمير سالم.. يطول عمره.. ويرفع شأنه وينصره على مــن يعاديه بارب.. هاي هو..

الأمير سالم: يا أخي حرام عليك خضيتني.. فيه كده برضه.. حد عاقل يعمل الأمير سالم اللي أنت بتعمله ده يا سياف.. عايز أيه؟

السياف: رقبتي بين أيديك.. سمو الأمير الصغير.

سالم: خير مولانا الوالد أمر بقطع رقبتك.

السياف: مولانا الأمير المعظم كلفني من اليوم أني أتبناك وأعلمك كل فنـــون القتال والفروسية.

سالم: فنون القتال والفروسية.. لا يا سيدي يفتح الله.. أنا عايز أتعلـــــم فنـــون الرسم سيبني بقه أكمل اللوحة اللي في أيدي.

السياف: رسم!!!! وطي صوت سموك ما توديناش في داهية. عايز سمو الأمير المعظم يسمعك!. ده كان يقطع رقبتي ورقبة سموك بضربة سيف واحدة.

سالم: وهو يعنى الرسم حرام ولا عيب ..!

السياف: مصيبة وحطت على دماغك يا سياف.. واضــــح جــداً أن سـموك متراهن على رقبتي.. صعبان على سموك أني أعيش في الدنيا زي باقي الخلق.. حكمت على بالإعدام وأنا لسه في عز شبابي.

سلم: لا خلاص ما تزعلش، أنا جاي معاك، بس على شرط أتـــدرب شــوية وأرسم شوية.. قلت أيه يا سياف؟

# مسمع (۳)

السياف: يا سمو الأمير.. أرجوك ركز معايا شوية وأمسك السيف عدل زي ما علمتك.. فيه فرق كبير بين مسكه السيف ومسكه الفرشه اللي بتلــون بيها.

سالم: أعمل لك أيه يا أخى ما السيف تقيل على أيدي..

السياف: يا مولاي أرجوك بطل هزار ودلع أخشن شويه.

سالم: نعم أنت اتجننت يا سياف!!

السياف: آسف يا مولاي بس أرجوك خد المسألة جد شويه الأيام عماله تجري وسموك محلك سر مافيش أي تقدم بيحصل، وبصراحة الرسم وأخد كل أهتمامك وتفكيرك، وده معناه أني ها فشل في المأمورية اللسي مكلفني بيها مولانا المعظم وهاروح في الكزوزه.

الأمير: قلت لك ميت مرة مش ممكن أبعد عن الرسم مهما كان التمن - قلت أيه يا سياف...؟

السياف: قلت ألف رحمه ونور عليك يا سياف.

# مسمع (٤)

السياف: قلت لسموك لازم أنجح.. يعني لازم أنجح ووعد الحر دين عليه يــــا مولاي.

أمير البلاد: لما نشوف يا سياف.. والظاهر انك بق على الفلساضي. آدي ١٠ أمير البلاد: لما نشوف يا سياف لو أتحقق المراد أيام مرت وبكره الميه تكدب الغطاس. آه يا سياف لو أتحقق المراد هايكون لك عندي مكافأه كبيرة أوي لو أنك ما تسلمتحقش لكن معلش كله بثوابه.

السياف: سموك أبو الكرم كله.. خيرك مغرقنا..

الأمير: وآه لو فشلت يا حلو.. آه لو فشلت يا ويلك يا سواد ليلك.. هاتشــوف النجوم في عز الضهر.. هاتندم على اليوم اللي ولدتــك فيـه أمـك.. هاتطلب مني أرحمك وأقتلك بدل العذاب الازلي اللي هاتشــوفه علــى أيدى.. قلت أيه يا سياف؟

#### (موسیقی)

## مسمع (۵)

السياف: يا نهار مش فايت يا سمو الأمير.. سموك سايب السيف والتدريب و عمال ترسم برضه. لا ده أنت ناوي على قطع رقبتي بصحيح. حرام عليك ده أنا عندي عيال عايز أربيهم!

سالم: شايف اللوحة الجميلة دي يا سياف؟!

السياف: لوحة.. وكمان بتاخد رأيي..

سالم: شايف ألوان قوس قزح جميلة أد أيه يا سياف.. اللوحة دي من المدرسة الطبيعية التأثيرية التكعيبية الرومانسية.

السياف: وأنا رحت في شربة مية.. أحنا عايزين قوس الصيد سموك.. مسش قوس قوس قزح يا مولاي. أبوس أيد سموك.. قوم أتدرب.. سمو الأمير المعظم لو شم خبر أنك لسا بترسم هايوديني في داهية.. أرجوك يا

مولاي أرمي الفرشة اللي في أيدك دي وأمسك سيفك وأركب فرسك وبينا على التدريب...

سالم: كده.. حاضر يا سياف.. أديني ركبت الفرس.. بس ها أسيب لك الإمارة باللي فيها. خلاص زهقت، طهقت، اتخنقت منك أبقى. دور لـــك علـــى أمير تاني غيري تدربه.. قلت أيه يا سياف؟؟

# مسمع (٦)

سالم: ياه.. ده أنا قطعت مسافة طويلة أوي وأنا بأجري.. الظاهر أني تهت.. الدنيا ضلمة كُحل.. مش شايف قدامي.. يا ترى أنا فين..

لص ١: أنت هنا يا عسل.

سالم: هنا.. هنا فين وأنتوا مين.. وأيه الكشافات القوية دي؟

لص ٢: أنزل من على حصانك وأرفع أيدك لفوق.

**لص** ٣: أنت مين وأيه اللي جابك هنا يا جدع أنت؟

سالم: أنا أنسان..

لص ١: أمال يعنى جاي من الجان..

نص ٢: ولا شبح ولا عفريت طبعا إنسان..

سالم: وأسمي.. أسمي.. (لنفسه: لو قلت لهم على أسمي الحقيقي وعرفوا أنــا مين.. يمكن يخافوا منى ويقتلونى).

الص ٣: أيه نسيت أسمك و لا أيه؟

سالم: لا أبداً بس مخضوض حبتين.. أسمى صفوان..

لص ١: صفوان، شعلان، زعلان مش مهم. المهم طلع المعلوم.

سالم: معلوم.

لص ٢: قشطه يا أبو دومه..

لص ٣: ما حيلتوش اللضا يا معلم دوكشه..

نص ٢: أزاي والحصان.

لص ٢: أحسن من بلاش.

لص ١: والزبون ها نعمل فيه أيه.

الص ٢: نتاويه في الصحرا و لا مين شاف و لا مين دري.

سالم: عايزين تقتلوني..

لص ٣: إيه كبير على الموت يا عسل..

سالم: أيوه بس أنا ما عملتش فيكم حاجة وحشة علشان تقتلوني..

نص ٢: ها تعمل..

سالم: أزاي..

لص ٣: ها تبلغ عننا..

سالم: أنا؟ !!!

الص ٢: ها تقول قابلت قطاع الطرق وسرقوا منى حصاني.

سالم: مش ممكن.. او عدكم أني مش ها أبلغ حد..

**لص ١:** ونضمن منين..

سالم: أوعدكم بشرفي..

لص ٢: شرفك .. ها ها .. قال شرف قال ..

لص ١: أحسن حاجة يا رجاله ناخده معانا..

**لص ٣: يعني أيه يا أبو شفطوره..** 

لص ١: يبقى واحد مننا..

لص ٢: بس ده باين عليه خام مش أد اللعبة.

لص ١: نعلمه..

لص ٣: وينوبنا فيه ثواب..

سالم: بس أنا عمري ما سرقت ولا أعرف أسرق..

لص ٢: هو حد بيتولد حرامي يا جدع.. بكره تتعلم..

سالم: تحت أمركم..

لص ٣: بينا يا رجاله أحسن النهار قرب يشقشق..

نص ١: أيه اللي شايله معاك ده؟

سالم: دي لوحة رسم وألوان وفرشة رسم..

لص ٢: بتعمل بيهم أيه؟

سالم: بأرسم لوحات من الطبيعة.. شجر وحيوانات وطيور وقوس قزح..

لص ٣: فنان يعنى..

سالم: حاجة زي كده..

لص ٣: وبتعمل أيه بالرسومات دي يا عسل؟

سالم: بعرضها للبيع...

لص ٢: وبتكسب منها كتير؟!!!

سالم: كتير أوي.. أحسن من السرقة.

لص ١: عال أوي.. أهو أنت كده تعجبني.

لص ٢: قصدك أيه يا أبو شفطوره..

لص ١: الواد ده هايرسم وأحنا نبيع رسوماته ونكسب من وراه.. بلا سرقة بـلا وجع قلب قلتوا أيه يا رجاله.

لص ٢: أيوه بس هانبيع الرسومات دي لمين...؟

سالم: أنا أعرف واحد أمير بيحب يشتري الرسومات اللــــي زي دي وبيحــب يزين بيها قصره.

لص ٢: أمير .. أمير بحق وحقيق..

سالم: أيوه أمير البلد اللي جنبنا..

لص ٣: وده هاتوصل له أزاي؟

سالم: أسمع أن في قصره في واحد سياف هو اللي بيختار للأمـــير اللوحـــات والرسومات وأسمع أنهم بيدفعوا فلوس كتير في اللوحة اللي بتعجبهم.

لص ٣: كده.. يبقى أرسم يا حلو ومالكش دعوى بلعبة السرقة دي.. وأحنا هاناخد الرسومات ونعرضها على الزبون ونقبض تمنها ونقسمه قسمة العدل علينا أحنا الأربعة، ونبدأ بالرسمة اللي في أيدك دي.

# مسمع (۸)

الأميرة: أبني حبيبي يا ترى أنت فين؟!!.. أنت السبب اللي خليته طفش مــن الأميرة أنت السبب. الإمارة أنت السبب يا أمير.. أنت السبب..

الأمير: أنا السبب برضه يا أميرة. الحق علي أنا خايف عليه وعلى مستقبله. الحق علي أنا خايف عليه وعلى مستقبله. الحق علي أني عايز أبننا يبقى راجل قوي وشجاع. فارس مقاتل مش حتة فنان بوهيمى. أنتى ناسية أنه الوريث الوحيد للعرش.

الأميرة: أهو ساب لك الإمارة تشبع بيها.. مبسوط بقى..

الأمير: أهدي بس وأن شاء الله جنودي هايعتروا عليه.. مافيش خرم أبره مش هايفتشوا فيه.. اطمني يا أميرة أبنك أن شاء الله هايرجع لك النهارده قبل بكره...

الأميرة: طب والرسم والفن...

الأمير: خلاص يعمل اللي يعمله.. بس المهم يرجع لنا بالسلامة.

السياف: يطول عمره ويعلي شأنه وينصره على مين يعاديه يارب..

الأمير: ارحمني مش ناقص خضايض في إيه يا وش النحس..

السياف: خير يا مولاي .. خير يا مولاتي ..

الأميرة: خير أنت ببيجي من وراك أي خير يا سياف الشؤم أنت.

السياف: خير صدقيني يا مولاتي .. شايفين سموكم اللوحة دي ..

الأمير: رسم أبعده عن وشى كفاية اللي جه لنا من وراه..

الأميرة: أمير وبعدين.. وريني كده يا سياف.. الله دي لوحة من لوحات أبني الأمير سالم وأهه توقيعه عليها.. يا حبيبي يا ابني شايف يا أمورتيي حبيب ماما.. كان فنان عظيم أزاي.

السياف: يطول عمره ويعلى شأنه..

الأمير: ومالها اللوحة دي يا سياف.

السياف: دي لسا واصله في التو واللحظة لقصر سموك..

الأميرة: أيه. ابننا رجع.. ابننا رجع يا أمورتي.

السياف: يا ريت يا أمورتي.. قصدي يا سمو الأمير..

الأمير: أمال اللوحة دي جت هنا أزاي يا بني آدم أنت...

السياف: أحكي لك يا مو لاي.. من شويه وصل القصر تلاته شكلهم مش ولابد واضح أنهم من اللصوص قطاع الطرق وطلبوا يقابلوني وقدمولي اللوحة دي وقالوا لي أن راسمها واحد من زمايلهم فنان أسمه صفوان وهو اللي قال لهم علينا علشان نشتري لوحاته.

الأمير: ها وبعدين..؟

السياف: أول ما بصيت فيها عرفت أنها من رسم سمو الأمير سالم لأنه كـان فرجني عليها قبل كده ده غير أنه موقع عليها بأسمه بس الظاهر أنهم ما بيعرفوش يقروا ويميزوا الفرق بين صفوان وسالم..

الأمير: أكيد دول اللصوص اللي خطفوا ابني وبيشغلوه لحسابهم.. أنا لازم أرميهم في السجن.. لازم أشنقهم في ميدان عام..

السياف: أصبر يا مولاي.. أحنا ناخدهم بالراحة لحد ما نوصل لمكـــان ســـمو الأمير وبعدها نتصرف معاهم زي ما أحنا عايزين..

الأميرة: وهاتعمل أيه يا سياف؟ أنا عايزه ابني بسرعة..

السياف: هانعرض عليهم فلوس كتيرة علشان نشتري كل لوحات الفنان ده بس هانطلب منهم يعرفونا عليه علشان ييجي ويرسم لوحاته الجميلـــة دي على جدران القصر.. قلت أيه يا مولاي

#### (موسیقی)

ونجحت الحيلة وعاد الأمير المخطوف إلى قصر ابيه وكان رسمه هو بصمت التي دلت عليه "من ثمارهم تعرفونهم".

# حوادیت مصریة

# 

# (مسمع ۱)

المعلم نجيب: مبروك العمارة يا عاصم بك..

عاصم بك: مبروك علينا كلنا يا معلم نجيب..

نجیب: بس خد بالك أنا أخدت مقاولة العمارة دي بسعر ماتآخذنيش مايقبلوش مقاول لسا مبتدئ زهرات يعنى مش أكبر مقاول في البلد...

عاصم: عارف يا معلم نجيب ولك على يا سيدي أعوضك في العمارة اللي جاية. هي دي أول و لا أخر عملية نعملها مع بعض.

نجيب: شوف وفرت لك كام ألف جنيه في المونه والأساسات والأسمنت والحديد.. دي العمارة طالعة عليك بلوشي..

عاصم: عارف يا معلم ووطي صوتك أحسن الحيطان ليها ودان.. خلينا ســـتر وغطا على بعض...

نجيب: وهي دي يعني أول ولا آخر عمارة إتبنت اونطه.. ما هي نص عمارات البلد مبنيه على ده الحال ولا من شاف ولا من دري.. المـــهم إخلــص منها سريع سريع زي اللي فاتوا خلي البال يرتاح.. ونقبض المعلوم.

عاصم: إطمن يا معلم نجيب ٤/٣ شققها إتباعت وهي لسا على الأساسات.

نجيب: عارفك حكم إنت ما تقعش إلا واقف.. أصل عليك حتة مخ يوزن بلد.. بتعرف إزاي تاكلها والعة..

علصم: وبفلوس الشقق اللي إتباعت بنيتها وروقتها وديتـــها يــوم و لا إتتيـن وأخلص من باقي شققها..

وحيد: بابا عايز أغير العربية بتاعتى بمناسبة العمارة الجديدة.

عاصم: وهي عربيتك كملَّت معاك سنة لما تغيرها يا وحيد؟

الأم: متغير هالوا يا عاصم.. هو أنت عندك أعز من وحيد أبنك؟

وحيد: وكمان تزود مصروفي اليومي لأربعين جنيه، خليك جدع بقي.

نهى: وأنا يا بابا عايزه ٥٠٠٠ جنيه علشان رحلة النادي.

عاصم: ٥٠٠٠ جنيه بحالهم.

الأم: ايوه يا اخويا أصلهم رايحين رحلة لأوربا. ده غير البوكت موني مــــش كده يا نهي؟

نهى: تمام زي ما قالت لك مامى يا دادي..

علصم: حاضر يا ست نهى من عينى. هو أنا عندي أغلى منكم في الدنيا.

الأم: وأنا كمان عايزه ٣ أجواز تعابين عيار ٢١ قيراط.

عاصم: من عيني يا وش السعد.

الأم: لأ من حسابك في البنك يا زوجي العزيز (ضحك) (موسيقى)

### مسمع (۳)

شاب ١: مبروك يا سي وحيد.. آدي العربيات و لا بلاش.

شاب ٢: أحدث موديل في البلد يابن الإيه.

شاب ٣: ويعني اللي كان راكبها قبل كده ما كانتش أحدث موديل في البلد وآخر روشنه برضه.

وحيد: أمال عايزيني أركب عربيه سكندهاند زي الفقراء يا غجر.. ده أنا ابن مليونير.. ابن عاصم بك على سن ورمح.

شاب ١: حقه أبوك ده زي المنشار طالع واكل نازل واكل.. دي نص عمارات البلد ملكه.

وحيد: كانت ملكه.. أبويا يبني العمارة من هنا وتاني يوم يكون بايعها وقابض تمنها وبانى به عمارة جديدة..

شماب ٢: طبعاً ويكسب فيها بالآلافات..

وحيد: قصدكم ملابين.. الآلافات دي موضه قديمة عند أبويا زي الملاليم اللي في جيوبكم ويلا بقى، بلاش نضيع وقت في سيرة أبويا، بينا على الشقة، حكم أنا خرمان ومزاجى عايز يتعدل..

شاب ٣: وطبعاً المزاج مايتعدلش إلا بالشمه المتينة والكام قرص من إياهم.

وحيد: وأنا جاهز بالفلوس نشتري المزاج اللي نفسنا فيه ويروقنا وأنـــا اللــي عازمكم بس إياك يتمر في مزاجكم يا غجر..

شاب ١: على فكرة يا وحيد في صنف جديد نزل السوق يلطش الدماغ من أول شمه.. تحب تجربه..

وحيد: لايموني عليه بسرعة..

شاب ١: هو بس غالى حبتين..

وحيد: ولا يهمكم أنا جاهز بالفلوس..

شاب ٢: قصدك فلوس أبوك..

وحيد: طبعاً.. ده غير اللي باخنسره من مصروف البيت من غير ما أمي تعرف.. أمال مزاجي يبقى عال العال إزاي من غير فلوس يا غجر.. (ضحك)

# مسمع (٤)

شاب ١: شربها المغفل وراح في سابع نومه بعد تالت شمه..

شاب ۲: هو دریان.. ما هی کلها بودره..

شاب ٣: بس حكاية الصنف الجديد ده فكرة بنت لزينه..

شماب ١: أمال نضحك عليه إزاي ونلطش منه الفلوس اللي معاه وبمزاجـــه ده غير اللي بنقلبه من جيوبه و هو نايم..

شاب ۲: يعنى هو كان تعبان فيها.. ما هى فلوس أبوه..

شاب ٣: وأدينا عايشين على قفاه وقفا أبوه عاصم بك.. (ضحك).

شاب ١: وطوا صوتكوا لا يفوق..

(موسیقی)

## مسمع (٥)

فؤاد: نهى .. وحشتيني يا حبيبتي ..

نهى: وأنت كمان يا فؤاد.. ما تتصورش كل دقيقة بتعدي على من غــــير مــــا أكون جنبك بأبقى ها أتجنن إزاي..

فؤاد: أعمل إبه في أبوكي عاصم بك اللي رفضني..

نهى: برضه هاأتجوزك يعني هاأتجوزك.. دي مسألة حسمناها خلاص.

فؤاد: إزاي بس يا نهى وأهلك رافضين..

نهى: نهرب سوا ونتجوز وطظ فيهم ..

فؤاد: إيه.. أيوه بس أنا ظروفي..

نهى: عارفه ممعكش فلوس .. بسيطة ..

فؤاد: بسيطة إزاي.. ده أنا يادوب ماهيتي بتكفيني بالعافيـــة وأنتــي عارفــة ظروفي كويس.. أنا غلطان إني حبيت واحدة غنية وأنا فقير.. يا ريتنــي ما كنت شفتك و لا حبيتك.. ليه ياربي ليه تخليني أحب دي بالذات.

- تهى: إخص عليك يا فؤاد.. ندمان إنك حبيتني..؟!
- فؤاد: أنا ندمان على حظي الوحش وظروفي اللي خلتني فقير ومش من من مستواكي.. يارب خدني وما تسيبنيش أعيش من غير حبيبتي نهى.. حياتى من غيرها جحيم.
- نهى: إياك أسمعك بتقول كده مرة تاني .. إخص عليك يا فـــؤاد.. ده أنــا اللــي مقدرش أعيش بعيد عنك .. حياتي من غيرك مالهاش معنى .. لازم نتجـوز يا فؤاد لازم وإن كان على الفلوس .. خلاص من النهاردة هاتودع الفقر ..
  - فواد: إزاي.. هاتجيلي خاتم سليمان و لا مصباح علاء الدين..
- نهى: من غير ماتتريق على .. شوف يا فؤاد بقيت أنا وإنت واحد مافيش فرق. وعلشان كده أنا سحبت كل الفلوس اللي كان بابا حاطط هالي في حسابي في البنك وكمان الدهب بتاعي.. خدهم كلهم خليهم معاك تبتدي بيهم أي مشروع نعيش به..
- فؤاد: لا يا هانم مش أنا اللي أعيش من فلوس مراتي. دي أهانة لرجولتي أنــــا أعيش بفلوس مراتي.
- نهى: مراتي.. الله.. طالعه من بقك زي العسل.. إسمع يا فؤاد مادمت بصحيح مراتك زي ما قلت يبقى خلاص يا أخي مفيش فرق بينا.. فلوسي هـــي فلوسك..
- فؤاد: ولو أهلك إكتشفوا الحكايه دي هانعمل إيه.. أنا خايف عليكي يا حبيبتي.. ثهى: وهما هايشوفونا فين تاني ما إحنا هانهرب مع بعض بكره الصبح ومعانا الفلوس والدهب ونبتدي حياتنا مع بعض في أي بلد تانية وهما فـاهمين إني طالعه رحلة الأوربا مع النادي.. ها قلت إيه.

# مسمع (۲)

الأم: خلاص يا نهى.. هاتسافري يا بنتى؟!

نهى: إدعى لى يا ماما.

الأم: ربنا يرجعك بالسلامة يا حبيبتي .. إيقى خلى بالك من نفسك يا نهى.

نهى: كان نفسى أسلم على بابا قبل ما أسافر.

الأم: معلش، أصله مشغول حبتين في العمارة الجديدة، بس ساب لك معايسا المبلغ ده علشان مصروفك في الرحلة. وده مبلغ تاني من عندي، يمكن تحتاجي تشتري حاجه كده و لا كده و لا هدية لأخوكي أو حد من أصحابك.

#### (موسیقی)

# مسمع (۷) (صوت خبط على الباب)

رجل: أي خدمة يا هانم..؟

نهى: الأستاذ فؤاد اللي كان ساكن هنا.

رجل: الأستاذ فؤاد.. أه ده ساب الأوضه من إمبارح وقال إنه مسافر بلدهم.

نهى: إيه.. إزاي ده مواعدني نتقابل هنا النهاردة..

رجل: ماعرفش.. ده حتى أخد حتيتين العفش اللي حيلته.

نهى: وماتعرفش بلده دي فين ٢٠٠٠

رجل: ده بني آدم غامض ماحدش يعرف حاجه عنه.. إنتي كنت عايزاه في إيه ولاسواخذه...

# مسمع (۷)

#### (صوت بكاء نهى بحرقه)

الأم: إهدي يا بنتي وفهميني إيه اللي حصل.. وما سافرتيش الرحلة ليه مسع النادي؟

نهى: ضحك على يا ماما وسرق كل فلوسي ودهبي وهرب.. مصيبه يا ماما.. مصيبه يا بابا.

الأب: مين ده يا نهي إنطقي بسرعة وفهمينا.. ؟!!

نهى: فؤاد يا بابا فؤاد.

الأب: فؤاد.. الواد الصايع اللي كان عايز يتجوزك وأنا رفضته..

الأم: إنتى لسا بتقابليه يا بنت..؟

نهى: أيوه وضحك على وأخد كل فلوسى ودهبى وهرب..

(موسیقی)

# مسمع (۸)

#### (صوت هدم شدید و إنهیار)

رجل ١: الحقونا يا ناس. الحقونا يا خلق. العمارة إتهدت. العمارة وقعت على سكانها. الناس ماتت..

رجل ٢: عمارة مين اللي وقعت..

رجل ١: العمارة اللي لسا مبنية بتاعة عاصم بـــك الله ينتقـم منــه.. راجــل ماعندوش لا زمه ولا ضمير.. ده لازم يروح في حديد..

# مسمع (۹)

الأم: إصحى يا وحيد.. فوق يا بني.. قوم إلحق أبوك قبضوا عليه علشان العمارة الجديدة وقعت.. وحيد إصحى يا وحيد.. وحيد.. إلحقيني يا نهى وحيد أخوكي مابينطقش..

نهى: وحيد.. وحيد.. وإيه السرنجة اللي في إيده دي.. مصيبة يسا ماما... مصيبة.. وحيد مات..

(موسيقى)

# مسمع (۱۰)

حكمت المحكمة حضورياً على المتهم عاصم رأفت بالأشغال الشاقة المؤبدة ومصادرة جميع أمواله وأملاكه هو وأسرته..

# حواديت مصرية

# 

الراوي: عزيزي المستمع قصه الليلة قصة حقيقية. وقعت أحداثها بالفعل منذ شهور في إحدى قرى صعيد مصر وقد تناولتها الصحف المصرية من خلال صفحات الحوادث لما فيها من غرابه لا يصدقها عقل. فكان عنوانها بالبونط العريض.

"والد القتيل يدعو القاتل على العثماء"

# (مسمعا)

(صوت سياره تسير وصوت أغنيه شعبيه من شريط كاسيت)

عطيه: (يغني مع الشريط) كتاب حياتي ياعين.. ماشفت زيه كتاب.. ياه الدنيا ليلت يادوب ماقطعتش نص السكه. ربنا يستر حكم سواقه الليل كله مفاجأت.. ودي سكه خطره كلها مطبات وحفر ده غيير أنها عتمه كحل.. الله.. الله إيه اللي طالع من وسط الدره وبيجري قدام العربيسه ده.. مش ممكن يكون بني أدم.. ده أكيد كلب ولا حمار.. الله.. الله.. ده جاي مندفع قدام بوز العربيه بكل سرعة.. حاسب.. حاسب.. يا مجنون صوت كلكس وفرمله شديده) هاتموت نفسك حاسب..

رجل ١: الحقوا يا ناس حادثه.

رجل ٢: حادثه إيه يا واد يا عوضين.

رجل 1: الظاهر العربية النقل دهست حد من أهل البلد.

رجل ٣: حد.. لا يكون الحمار بناعي تبقى مصيبه.

رجل ١: الحقوه قبل ما يهرب.

رجل ٢: اهجموا عليه قبل ما يهرب بجريمته المجرم.

رجل ٣: يا ترى مين الغلطان.

رجل ٢: تلاقيه ماشى بسرعة جنونيه..

رجل ۱: هما کده سواقین النقل کلهم مفتریین.. یاما ضبیعوا أرواح ناس. (موسیقی)

عطية: مصيبه وجت لي من تحت الأرض.. ماليش ذنب فيها. أنا ماشي فيسي سكتي لا بي ولا على هو اللي طلع لي من وسط الدره وجرى قيدام العربيه.. حاولت أفاديه ماقدرتش. هو اللي كان مندفع ناحية العربيسه كأنه عايز ينتحر.. ينتحر هو ويوديني أنا في حديد.. يا خراب بيتك يا عطية. دي عمرها ما حصلت.. لما أنزل أبص عليه لو لسا فيه نفس هاأنقله لأقرب مستشفى.

#### (موسیقی)

رجل ٢: أهو يا رجاله.. السواق ظهر..

رجل ٣: اهجموا عليه..

عطية: يا نهار اسود.. ده أهل البلد جايين بالشوم والعصيان عايزين يموتوني لازم أنفذ بجلدي.. بس أروح فين.. ده إيه اليروم الأغرب ده يرك.. (يحاول يشغل السياره دون فائده) حتى العربية مش عايزه تتحرك.. طب وبعدين.. لازم أهرب من أهل البلد.. أروح اسلم نفسي للشرطه.. بدل أهل البلد مايقتلوني..

رجل ٣: الحقوا يا رجاله.. الجبان هرب وسط الغيطان.

رجل ١: ساب عربيته وهرب.. هايروح مننا فين؟

رجل ٢: تعالوا ورايا يا رجاله.

رجل ٣: مش نشوف الأول مين اللي اندهس ده؟

#### (صوت رجلين تجري وسط الغيطان ونفس عالى)

عطية: أهرب أروح فين؟ البلد كلها عتمه. مش شايف قدامي و لا عــارف فين قسم البوليس. أهه في نور باين من بعيد.. لما أروح هنـــــاك وأسأل.. ده بيت بابه مفتوح.. لما أدخل.. (يصفق) يللي هنا، يللي هنا. هنا.

الآب: مين؟

عطيه: أنا

الآب: خير يابني.. أتفضل. كفا الله الشر.

عطية: متشكر، أرجوك ممكن أستريح عندكم شويه. أخد نفسي وبعدين أمشي.

الآب: البيت بيتك.. اتفضل.. يا أهلاً وسهلاً..

عطية: متشكر .. متشكر أوي.. لو سمحت ممكن كبايه ميه.

الآب: هاتي القله يا أم وحيد.. خير يابني مالك وشك مخطــوف وبتتــهج زي ماتكون كنت بتجري..

عطية: بأجري من طريق السفر السريع لحد هنا.

الآب: ياه.. دي مسافه ياما..

عطية: أنا مش مصدق.. زي ما أكون بأحلم..

الآب: خير يا بنى اهدى.. خد نفسك...

الأم: القله يا أبو وحيد..

الآب: أتفضل يا بني. بل ريقك.. ربنا يكون في عونك.. ده أنت تعبان أوي.

عطية: (يشرب بصوت مسموع) الحمد لله متشكر يا عمي..

الآب: لا شكر على واجب.. تاكل لقمه الأول وبعدين أعـــرف ايـــه الحكايـــه بالظبط..

عطية: لا ماليش نفس..

الآب: عيب.. ده أنت ضيفنا و لازم نقوم معاك بالواجب.. جهزي لقمه ناكلها يا أم وحيد.. هاتحب تحكي لي دلوقتي وتفضفض و لا بــــــلاش.. براحتـــك يابني..

عطيه: بالعكس يا عمي.. أنا لازم أحكي لحد.. لازم أطلع اللي جوايا.. والا ها أطق من الغل.. هاأموت.. سترك يارب.

الآب: أعوذ بالله.. خير يابني..

عطيه: أنا اسمي عطيه.. وباشتغل سواق على عربيه نقل بين المحافظـــات.. بأنقل بضايع من محافظه لمحافظه..

الآب: حصل لنا الشرف بابني..

عطیه: ودایماً بأسافر علی الطریق السریع.. ده انا حتی حفظته صم من کــــتر سفری علیه.

الآب: طبيعي.

عطية: وعمري مازودت السرعه عن المسموح به.. أصلي راجل أحب أمشي سليم..

الآب: كويس وبعدين..

عطية: لكن أعمل ايه في المصايب اللي بتطلع لي من تحت الأرض غصب عني ماليش ذنب فيها.. فجأه وأنا ماشي لمحت من بعيد حاجه طالعب من وسط عيدان الدره وبتجري بكل سرعه ناحيه الطريق السريع.. خفت وقعدت أضرب كلاكسات انذار وأعلي كشافات النور.. أعلي وأوطي يمكن ياخد باله ويقف..

الآب: ها وبعدين؟

عطية: مافيش فايده.. لقيته متجه بكل سرعته ناحيه العربيه زي ما يكون عايز ينتحر حالف ليموت نفسه ويوديني أنا في داهيه.

الآب: هو مين؟

عطيه: في الأول افتكرته كلب و لا حمار. لكن المصيبه انه طلع طفل مجنون من متهور بيجري بكل سرعه من وسط عيدان الدره وبيقطع الطريق من

غير ماييص ويتأكد أن الطريق خالي.. حاولت أنذره بكل الطرق لكن ماكانش في فايده.. مش هامه حاجه منتهى التهور والاستهتار..

الآب: وما حاولتش تفرمل؟

عطية: بالعكس ده أنا ضربت فرمله قويه لدرجة ان العربيه كانت هاتتقلب بيّ وياريتها كانت اتقلبت ومُت أنا. حتى ماكنتش اتبهدلت البهدله دي كلها وأنا ماليش ذنب.

الآب: ليه يابني تقول كده.. والطفل حصل له ايه؟

عطيه: ماعرفش حاولت أنزل اطل عليه وأشوف إذا كان لسه فيه نفس أنقله لآقرب مستشفى.. لكن أهل البلد هجموا علي وهما ماسكين الشوم والعصيان وعايزين يقتلوني رغم اني مظلوم.. أنا مالياش ذنب صدقني.. مالياش ذنب الولد هو اللي جري قدام العربيه.. هو اللي ماكانش هامه الكلاكسات والأنوار الكتيره اللي حذرته بيها..

الآب: طيب اهدى يابني.. اهدى.

الأم: العشا جاهز يا أبو وحيد.. اتفضلوا..

الآب: اهدى بابني وسيبها على الله.. ومادمت مظلوم بيقى ربك مش هايســـيبك أبداً ولزما يظهر الحق.

عطية: صدقني مظلوم يا عم أبو وحيد. أنا عمري ما كنت متهور في سواقتي وحذرته بكل وسيله لكن ما سمعش وأصر إنه يجري ناحية العربية.

الآب: طب تعالى نأكل لقمه مع بعض ونستريح شويه والصباح رباح.

عطية: لا.. أنا لازم أسلم نفسي لآقرب قسم بوليس.

الآب: احنا فين وقسم البوليس فين.. ده لازم تركب له عربيه.. أنـــت تبــات عندنا الليله دي وبكره الصبح إنشاء الله أجي معاك للنقطه ومستعد كمان

أشهد معاك انك مظلوم.. يللا يا بطل قوم اغسل ايديك ووشك وسيبها على الله.. ده قضى يابنى وماحدش يقدر يهرب منه.

عطية: منظر الولد وهو مرمي على الرض قدام العربيه فظيع.. تخيلته حازم ابني كان نفسي أخده في حضني وأقول له حرام عليك تعمل في نفسك وفي كده حرام عليك تحرق قلب أبوك وأمك عليك.. ليه يابني كده.. ليه (يبكي).

الآب: أهدى يا راجل.. عيب عليك.. ماتعملش في نفسك كده.. الأعمار بيد الله ولو مكتوب له عمر هايعيش ولو ربنا رايد عمره ينته على كده خلاص حتى ولو كانت وديته المستشفى.. دي إراده ربنا.

الأم: يللا يا أبو وحيد.. الأكل هايبرد ياخويا.

الآب: حاضر يا أم وحيد.. الله.. هو الولا وحيد أتأخر كده ليه النهارده يــــا أم وحيد.

الأم: (من الداخل) عنده درس خصوصى في الحساب وبعدها هايروح يذاكـــر عند واحد زميله قرب الطريق الصحراوي.

الآب: أصل يا سيدي الواد وحيد ابننا لعبي حبتين.. مدلع شويه.. قلت أدي لـــه درس خصوصى يمكن يفلح في المدارس.. حكم وحيد هو اللي طلعنا به من الدنيا.. ألف شكر وحمد ليك يارب..

عطية: ربنا يخلي هولك وتفرح به.

الآب: يارب..

### (أصوات هياج وخبط على الباب)

الآب: في إيه؟

رجل ١: افتح يا عم أبو وحيد..

الآب: انتوا مين وعايزين ايه الساعه دي..

رجل ٢: احنا مجموعة من اهل البلد.. افتح أمال..

الآب: أهل البلد.. خير.. اتفضل انت يا أسطا عطيه خش جوا وأنا ها الحصلك لما أشوف في ايه. أستر يارب.. (يفتح الباب) خير يا رجاله مالكم جايين بمظاهره كده ليه..

رجل ٣: في الحقيقة با عم أبو وحيد أحنا مش عارفين نقول لك ايه.. الظـــرف صعب أوي.. ربنا يلطف بيك.

رجل ١: مصيبه.. مصيبه كبيرة يا عم أبو وحيد،

الآب: مصبيه.. مصبيه ايه يا رجاله.. انطقوا وقعتوا قلبي.. حصل إيه فيه ايه منك له له له.

رجل ٢: ابنك وحيد ضناك ..

الآب: وحيد ابني.. ماله..؟

رجل ٣: تعيش انت.. اتقتل..

الآب: ايه.. ابني اتقتل.. إز اي وامتى وفين؟

رجل ١: دهسته عربيه نقل من ساعة زمن وهو ياعيني ماشي فـــــي الطريــق السريع لا به و لا عليه.

رجل ٢: حاولنا نقبض على القاتل لكن الجبان هرب وساب الولد سايح في دمه لحد ما دمه اتصفى يا ولداه.

رجل ١: أه لو يقع في ايدينا المجرم.

رجل ٢: كنا قطعناه حتت..

رجل ٣: ده مجرم وقاتل..

### (موسیقی)

الراوي: ورغم فظاعة وروعة الحدث. إلا أن الآب أصر أن يشهد بجانب السائق أمام الشرطة شهد بأنه برئ وأن أبنه هــو المخطئ وحين

أفرجت النيابة عن السائق عاد به الآب إلى بيته منهاراً. ودفسن ابنسه بدموع عينيه وفي المساء أصر أن يقف معه السائق في سرداق العزاء ثم أصر على أن يتناول العشاء.. وظل مذهولاً وهو يستمع إلسى الآب وهو يطمئنه لا تخف يا ابني لقد نفذ قضاء الله ولا فائدة من أي شيء إلا أن أسامحك.

(موسیقی)

## حواديت مصرية

### (مسمع ۱)

### (سعيد ومجموعة من الموظفين)

سعيد: وبعدين يا جماعة بالطريقه دي الشركة ها تضيع.. هاتفلس..

موظف ١: وإحنا في إيدينا إيه نعمله با أستاذ سعيد..

سعيد: نحاول ننقذ الشركة بأي شكل..

نادر: بعد المركب ما غرقت يا أستاذ سعيد.

سعيد: بلاش نكسر مجاديف بعض يا أستاذ نادر .. إحنا نحاول ننقذ ما يمكن ولا إنقاذه.. دي شركتا اللي فاتحه بيوتتا وبناكل منها عيش مش كده و لا ايه يا جماعه.. (أصوات مختلفه).

موظف ٢: فعلاً عداك العيب يا أستاذ سعيد.

تادر: إزاى بس وطول ما حاميها حراميها.. ولا إيه يا جماعه..

### (أصوات)

سعيد: بلاش الكلام ده أرجوكم.. مافيش داعى نتهم حد في غيابه..

نادر: ما الكبار هما اللي شافطين خير الشركه في كروشهم وإحنا الموظفين الغلابه اللي مش طايلين اللضا..

سعيد: نسيب كل واحد لضميره.. ربنا هو اللي ها يحاسبه، لكن إحنا نعمل الواجب اللي علينا وزياده.. نشتغل بزمه وضمير أكتر وأكتر.. ونحاول نضاعف إنتاجنا أضعاف وأضعاف..

نلار: وإيه اللي ها نستفيده يا أستاذ سعيد..؟!

سعيد: على الأقل هاننقذ شركتنا..

نادر: دي شركتهم هما .. مش كده و لا إيه يا جماعه؟

سعيد: هما مين يا أستاذ نادر؟

نادر: المدير العام وشلة الألاضين بتوعه واكلينها والعه وموزعين خيرها على نفسهم.. (أصوات موافقه)

سعيد: أرجوكم كفايه إتهامات.. السيد المدير العام والساده مديريــن الإدارات ناس مخلصين جداً في عملهم وبيراعوا ضمير هم ومستحيل يعملوا كده...

نلار: لأبيعملوا كده وأكتر والكل عارف وعلى عينك يا تاجر.. مش كــده و لا إيه يا جماعه.. (أصوات موافقه)

سعيد: وحتى لو كان كلامك ده صحيح. إحنا في إيدينا إيه نعمله. ما نقدرش نحاسبهم أو نقف قصادهم.. لأنهم هما المسئولين وإحنا المرؤوسين.

نلار: يعني هما الأسياد وإحنا العبيد.. مش كده..

سعيد: وبعدين بقى يا نادر كفايه لحد كده.. أنا قلت اللي يمليه على ضميري وكل واحد حر واللي بيشيل قربه مقطوعه بتخر على دماغه.. عن إذنكم الإجتماع خلص وكل واحد يتفضل يروح مكتبه ويحاول يركز في شغله وبس ومالوش دعوى بغيره.. (موسيقى)

### مسمع (۲)

رشدي: إتفضل يافندم.. آدي تقرير بكل اللي حصل في الإجتماع وبعد ما سيادتك تقراه.. إتخذ سيادتك قرار اتك. لأنهم شوية موظفين متمردين.. ومتتمردين، ناقصين ربايه بالذات الجدع المدير بتاعهم ده اللي إسمه سعيد.. بيتهم سيادتك إتهامات فظيعه، ومش همه.

المدير العام: وسعيد كمان كان معاهم يا سيد رشدي؟!

رشدي: طبعاً يا فندم ده هو الزعيم بتاعهم.. وهـــو اللـــي بيحشـــي دماغــهم بالإتهامات السخيفه دي عن سيادتك وعـــن الســـاده أعضـــاء مجلــس الإداره.. سعيد ده بالذات محتاج يتربى كويس أوي علشان يعرف مقامه كويس..

المدير العام: سعيد!! بقى دي آخرتها..

رشدي: مش هو ده اللي سيادتك فضلته على ورقيته وعينته مدير إدارة مكاني.. أخد درجتي وأخد مكساني وآدي آخرتها مساطمرش فيه المعروف اللي عملته فيه سيادتك وعامل ثوره على جنسابك وبيشنع عليك بأبشع الإتهامات.. إنسان جاحد ناكر للجميل.. ماعندهوش أصل بعيد عنك ياربى الناس بقت وحشه كده ليه.

المدير العام: كل حاجه في التقرير يا سيد رشدي..؟!

رشدي: بالتفاصيل الممله يا جناب المدير العام.. ولو سيانتك إحتجت تفاصيل أكتر أنا تحت أمرك.. دي لعبتي.. قصدي ده واجبي.

المدير العام: لأكده كويس.. وارجوك سيب لي التقرير ده وروح إتجســـس.. قصدي شوف إيه اللي بيحصل بين الموظفين بيقولوا إيـــه عنـــي وعن إدارتي وقدم لي تقرير بكل اللي هاتشوفه وتسمعه.

رشدي: رقبتي فداك يا باشا..

### مسمع (۳)

موظف ١: مسكين يا أستاذ سعيد..

نلار: مش ده اللي بيدافع عنهم وواقف معاهم ضدنا..

موظف ٢: الأستاذ سعيد راجل عادل مش متحيز لفريق ضد فريق.. هو راجــل مع الحق و لا شيء غير الحق.. ربنا يصبره..

نلار: ده عنده عيال لسا صغيرين وعليه مسئوليه كبيره هايصرف عليهم إزاي بعد ما إتفصل من الشركه.. الله يجازي اللي كان السبب.. نفسي أعرف المدير العام فصله ليه.. ده كان راجل كفء وخبره ومخلص للشركه والمسئولين.

موظف ١: أكيد أخد ننبه محترمه طلعت من نافوخه .. (موسيقى)

### مسمع (٤)

الزوجه: الله.. إنت لسا صاحى يا رشدي؟!

رشدي: لما أخلص التقرير اللي في إيدي ها أدخل أنام..

الزوجه: وهي تقاريرك دي عمرها بتخلص ياخويا.. نفسي أعرف إيه مزاجك ومتعتك في آنية زمايلك..

رشدي: مالكيش دعوى خليكي في حالك..

الزوجه: يا رشدي حرام عليك اللي بتعمله فيهم ده.. ربنا مش هايسامحك و لا يبارك لك لا في مالك و لا أعمالك..

رشدي: بس بلاش كلام خايب لا يودي ولا يجيب.. عارفه لولا التقارير اللي بأكتبها عن زمايلي دي ماكانش سيادة المدير العام يرضي عني عني ويخليني دراعه اليمين وكاتم أسراره.. ده كمان وعدني إنه يرقيني ويمسكني مكان سعيد بعد ما أخد الزمبه المتينه..

الزوجه: ياريت كانت ترقيتك دي عن جداره وشرف لكن يا عيني جت على حساب الراجل الطيب اللي وقعت بينه وبين المدير بالكنب والغــش.. ربنا مش هايسامحك أبداً لا دنيا ولا آخره..

رشدي: إخرسي.. أنا غلطان إني بأحكي لك على أسراري وبأخليكي تطلعي على على تقاريري.. أنا ماشفتش زي كده أبداً.. في واحده تقف قدام طموح جوزها يا ناس.. ستات آخر زمن بصحيح. أيه رأيك أنت من حيزب أعداء النجاح.

الزوجة: وأنت من حزب أعداء البشر.

(موسیقی)

رشدي: حته تقرير ما يخرش الميه.. على الأقل فيه فصل ٣ موظفين وخمسه لفت نظر وإتنين خصم من المرتب.. الله عليك يا أبو الرشد.. أستاذ ورئيس قسم تلفيق التهم وضرب الذنب.. وكله مصحوب بالأدله والبراهين.. أنا راجل بأراعي ضميري وبخاف من ربي.

نادر: خير يا أستاذ رشدي.. السلوك ضربت، وبقيت بتكلم نفسك خلاص..

رشدي: نعم ياأخويا.. هاتهزر معايا.. هاتعمل راسك براسي يا أستاذ نادر؟ نادر: حقك.. حقك يا رشدي بك ما هي الشركه بقت في جيبك هي ومدير ها، و بخت سعيد بسعيدة.

رشدي: إنت هاتبطل طولة لسان و لا أخليك تحصل صاحبك.. أنا قرصتي والقبر وأنت عارف..

نلار: هاشوف.. بس اللي أنا مؤمن به إن دولة الشر يوم بس دولــــة العــدل بسنين وبكره تشوف با رشدي بك..

أصوات: يحيا العدل.. يحيا العدل..

رشدي: في إيه يا جماعه.. إيه المظاهره دي.

أصوات (بهتاف): يحيا العدل.. يحيا العدل..

موظف ١: البيه المدير العام حبيبك يا رشدي بك.

رشدي: ماله؟

موظف: أخد إستماره ٦ يا رشدي بك..

رشدي: بتقول إيه يا جدع إنت..

موظف: صدر قرار بإحالته للتقاعد لأنه إتسب في بوظان إدارته وضيـــاع أمــوال الشركة وإتعين مدير عام جديد إستلم من النهارده يحيا العدل.. بحيا العدل..

رشدي: ولو، جراب الحلوي عمره ما بيفضى.

### مسمع (۲)

موظف ٢: بيقولوا المدير العام الجديد راجل دوغري مايعرفش أخوه.. لا بتاع شلل و لا محسوبيات..

نادر: يعنى لا بتاع ننب و لا تقارير سريه متلفقه بالكدب..

موظف ١: وإن الموظف الكفء هايأخد حقه وزيـــاده والموظـف المتـهاون والمستهتر ياخد جزاؤه.. هو ده مبدأه..

ألدر: كلهم بيقولوا كده في الأول وبعدين ترجع ريما لعادتها القديمه ويرجعوا للطمع والجشع والإختلاسات وجنون العظمه..

موظف ٢: عندك حق يا نادر .. ناسي المدير اللي مشى كان إيه في الأول وإنتهى على إيه في الآخر ..

موظف ۱: نصبر ونشوف مش يمكن يطلع راجل كويس زي ما سمعتم يا جماعه وربنا يبعد عنه شر رشدى وأمثاله..

موظف: إلحقوا با جماعه..

نادر: في إيه؟!

موظف: البك المدير العام الجديد طلب يقابل الأستاذ رشدي فور ا..

نلار: مش بأقول لكم ما يقدروش يستغنوا عن تقاريره وذنبه.. ده رشدي بتاع كل عصر وزمان. آه يا زمن.

### مسمع (۷)

المدير العام: مؤكد طبعا راجل نشيط وكفء وعينيك مفتحه وصاحي وودانك بتسمع دبة النمله في كل كبيره وصغيره بتحصل في الشركه.. لازم أستفيد بيك وبخبرتك. يارشدي بك. رشدي: تمام يافندم.. تمام كده.. تحت أمرك..

المدير العام: ووقتك كله ضايع في كتابة التقارير عن زملائك..

رشدي: للمصلحه العامه يافندم.. والله الشاهد.. أنا روحي فداء الشركه.

المدير العام: فعلاً وعلشان كده أنا يسعدني إننا نتعاون مع بعض وتبلغني أول بأول بكل اللي بيحصل. أتفقنا.

رشدي: رقابتي يا باشا وبكره تشوف.

### مسمع (۸)

أصوات: يا ترى المدير جامعنا هنا ليه في مكتبه..

موظف: ماعرفش.. بس بصراحه قلبي مش مطمن..

نادر: حد يعرف الإجتماع ده ليه يا جماعه؟!

أصوات: لا..

موظف: هس المدير وصل..

المدير: صباح الخير يا جماعه..

أصوات: صباح النور يافندم..

المدير: أنا عارف إن كتير منكم مستغربين إني جمعتكم هنا النهارده في مكتبي وليه عملت الإجتماع المفاجئ ده...

نادر: إحنا تحت أمرك يافندم.. خير إنشاء الله..

المدير: في الحقيقة أنا وصلتني تقارير كتيره عن كل موظف فيكم وكلها تقارير في غاية الأهمية والخطوره.. كتبها زميل مخلص من زمايلكم.. زميل مخلص جداً للشركه ولزملاؤه.. وحريص كل الحرص على المصلحه العامه وعلشان كده أحب إنه يقرا قدامكم بعض التقارير دي واحب أسمع رأيكم فيها..

أتفضل يا أستاذ رشدي إقرأ التقارير اللي كتبتها عن زمايلك. (أصوات همهمات)

أصوات: رشدي.. تقارير..

المدير: إتفضل يا أستاذ إقرأ التقارير..

رشدي: في الحقيقة يافندم أصل..

المدير: أصل إيه با أستاذ رشدي.. معكش نسخه منها.. أنسا عسامل حسابي أتفضل.

رشدي: أصل في الحقيقة يافندم.

المدير: الحقيقة.. إنك ماعندكش الشجاعه تواجه زمايلك بالتهم الملفقة اللي إنت كاتبها عنهم في التقارير دي.. مش كده؟! تحب أقراهالهم أنها بدالهك.. حاضر..

رشدي: لأ.. أرجوك يا سعادة البيه.. أرجوك بلاش.. بلاش..

المدير: بلاش ليه.. مش هي دي الحقيقه.. مش كل اللي مكتوب في التقــــارير دي حاجات حصلت فعلاً. خايف ليه.

رشدي: (ينهار) أرجوك.. أرجوك يافندم ارجوك..

المدير: يا جماعه علشان أوفر على زميلكم الأستاذ رشدي الإحسراج. أنا صورت نسخه لكل واحد علشان يقرأها براحته ويعرف من التقارير دي أد إيه الأستاذ رشدي زميلكم بيحبكم وبيخاف على سمعتكم وسمعة الشركة. وزعي عليهم النسخ يا أنسه سها. (أصوات قراءات وهمهمه شديده)

المدير: كان لازم نطهر الشركة من رشدي وأمثاله لأنهم خطر على الشركة وعلى السلام والمحبه بين الموظفين والإداره لأنهم خانوا زملاءهم وخانوا ضمايرهم وما يستحقوش يكونوا في وسطنا. أنا أصدرت أمر بفصله ولغيت قرار فصل الأستاذ سعيد.. وهايرجع يستلم عمله من بكره..

أصوات: يحيا العدل. يحيا العدل.

(موسیقی)

# حوادیت مصریة

# Suli Jujes

### (مسمع ۱)

### (أصوات الضفادع وهي تمرح في الماء نق نق نق نق)

الأم: خلاص بقى يا ولاد.. كفاية عوم وأطلعوا من الميه علشان تتشفوا جسمكم وتتشمسوا.

أصوات الضفادع: (نق نق نق) لا يا ماما خلينا شوية ربنا يخليكي (نق.. نق.. نق). الأم: نق.. نق.. نق.. نق..

الأصوات: نق. نق .. فاهمين.. فاهمين.. نق.. نق (أصوات خروجهم من الماء). الأم: أيوه كده.. أنا بأحبكم لما تسمعوا كلامي وتنفذوا أو امري.. يلا بقى نعد.. ضفدع.. اتنين.. تلاتة.. أربعة.. خمسة.. ستة.. نق نق.. الله ده ناقص الضفدع الصغير رقم سبعة.. فين السابع أخوكم؟!

ضفدع: لسا في الميه.. نق نق..

الأم: وسبتوه ليه وحده.. أحسن يغرق.. ده لسه صنغير مـــا بيعرفـش يعـوم كويس.. يا سابع.. يا سابع.. نق.. نق.. يا سابع.. أستر يارب أحســن يكون الولد غرق.. نق.. يلا نادوا معايا على أخوكم.

الجميع: يا سابع من يا سابع من نق من يا سابع يا سابع من

ضفدع ١: أهه يا ماما .. جاي هناك .. أطمني ده بسبعه أرواح.

الأم: الحمد لله كنت خايفة عليه يموت.. نق.. نق.

ضفدع ٢: طبعاً مش دلوعتك .. نق .. نق .

ضفدع ٣: هو اللي على الحجر.. آخر العنقود بقي.. نق.. نق.

الأم: بس با ولد منك له. بطلوا قلة أدب. كلكم عندي زي بعسض مساعنديش خيار وفاقوس. بأحبكم كلكم زي بعض. فاهمين. أتفضلوا بقسى كلل واحد بشوف له حته بتشمس فيها وينشف جسمه بهدوء فاهمين.

أصوات: فاهمين يا ماما.. نق.. نق.. نق.

الأم: تعالى يا سابع لما أقرص لك ودنك علشان تتعلم تسمع كلام ماما بعد كده. السابع: معلش يا ماما.. نق.. نق.. أصلى الميه حلوة..

الأم: برضه لازم تتعاقب (بهدوع) ما تخافش كده وكده قدام إخواتك.. هات ودنك دي.. (بهدوع) يللا صرخ بصوت عالي سمع إخواتك. فاهم يا ولد.. لازم تسمع كلام ماما من هنا ورايح.

السابع: آي.. آي ودني ودني.. نق نق.. أه يا ودني..

الأم: حرمت ماتسمعش الكلام.

السابع: حرمت با ماما .. حرمت خلاص .. نق .. نق .. آه يا ودنى .

الأم: يللا روح إتشمس ونشف جسمك مع إخواتك.

### (أصوات الضفادع وهي تمرح في سعادة)

الأم: يارب إحمي و لادي وحافظ عليهم.. ده إحنا ضفادع ضعيفة مسكينة.. إبعد عننا شر الحيوانات المفترسة والزواحف القاتلة.

(صوت بكاء العقرب): إهىء.. إهىء.. إهىء.

االأم: إيه ده.. يا ماما عقرب صعير.

العقرب: إهيء.. إهي.. أيوه أنا عقرب صغير.. إهيء إهيء.

الأم: عقرب وتبكي؟

العقرب: وما أبكيش ليه مش لحم ودم زيكم.. أنا وحيد مسكين.. ماليش حد في الدنيا.. إهئ..

الأم: إزاي يا عقرب؟

العقرب: بابا مات وماما ماتت.. جدو مات وعمو مات.

الأم: ومالكش إخوات.

العقرب: ليّ بس كلهم هاجروا للشط الناني وسابوني وحداني "يغني" وحدانــــي أعيش أنا وحداني.

الأم: يا مسكين..

العقرب: أيوه يا طنط ضفدعة.. أنا مسكين.. مسكين خالص. إهئ.. إهئ..

الأم: بس.. مسكين.. مسكين إزاي!! ده أنت عقرب لدعتك والقبر.. كل الحيوانات والطيور بتعمل لك ألف حساب.

العقرب: وعلشان كده ماحدش مصاحبني.. كلهم بيخافوا مني.. مع إني طيب ووحيد ويتيم. بابا مات وماما ماتت وجدو مات أهيء أهيء..

الأم: صعبت عليّ مع انك عقرب.

العقرب: كان نفسي يبقى لي أم طيبة زيك كده ويبقى عندي أخوات حلوين زي ولادك ألعب معاهم وأتفسح معاهم وأنزل معهم البحيرة وأطلع أخد حمام شمس معاهم.. بس يا خسارة أنا يتيم وحيد.. بابا مات وماما ماتت.. جدو مات.

الأم: طب خلاص كفاية .. حرام عليك قطعت قلبي.

العقرب: نفسي تأخديني وتتبنيني وأكون ابن ليكي.. أخ لكل أو لادك الأمـــامير دول.. نفسي يبقى لي أهل وأصحاب زيكم.. أرجوكي.. أرجوكي يـــا طنط ضفدعة أتبنيتني ده أنا يتيم ووحيد.. بابا مات وماما ماتت.. جدو مات.

الأم: بس أنت عدونا إزاي تبقى واحد مننا.. أنا أخاف من لدغتك أخاف على نفسي وعلى و لادي..

العقرب: خلاص نعمل مع بعض معاهدة سلام وتطبيع علاقات.. إنتوا تدوني دفء الأسرة وحلاوة الصداقة اللي إنحرمت منها وأنا أديكم الحماية والآمان اللي محتاجينهم.

الأم: إزاي يا عقرب؟

العقرب: أول ما يحاول أي عدو من الطيور أو الحيوانات يقرب ناحيتكم ويحاول بأذيكم أقوم لدغه اللدغه الممينة.. السم يجيب أجله على طول.. قلتي إيه يا طنط ضفدعة.. أرجوكي وافقي.. ده أنا يتيم ووحيد.. بابا مات وماما ماتت وجدو مات.

الأم: نفسى أصدقك بس قلبى مش مطاوعنى.

العقرب: صدقینی یا طنط.. ده أنا بأحبكم أوي.. ما تخافوش منسي.. ده أنسا بنیسم ووحید.. بابا مات.. ماما ماتت.. جدو مات.

الأم: خلاص.. خلاص إرحمني شوية. لما أخد رأي الأولاد الأول.. يا ولاد يا ولاد.. تعالوا بسرعة عند ماما، ها تعمل مينتج.

### (أصوات الضفادع وهي مبتهجة وتغني)

ضفدع 1: نعم يا ماما .. إيه ده عقرب .. يا ماما .

ضفدع ٢: إجروا بسرعة أنفدوا بجلدكم.. العمر مش بعزقه.

الأم: تعالوا يا ولاد.. ما تخافوش.. ده صحيح عقرب.. بس مش عقرب حقيقي.

ضفدع٧: فزورة دي يا ماما؟

الجميع: هو فيه عقرب مش عقرب؟!

الأم: أهدوا بس وأنا افهمكم.. ده صحيح شكله عقرب لكن طيب خالص مـــش عايز يأنينا عايز ينضم لينا.. لعيلتنا..

العقرب: ده أنا يتيم ووحيد.. بابا مات وماما ماتت وجدو مات.

الضفدع ٢: إزاي بس يا ماما ده عقرب.. عارفة يعني إيه عقرب؟

الأم: هاتعلمني يا ولد.

العقرب: هدي نفسك يا طنط.. أنا ها أفهمه.. شوف يا صاحبي.

ضفدع ٢: صاحبك..

العقرب: صاحبي وأخويا وحبيبي.. أرجوكم يا جماعة ماتخافوش مني أبدأ أنا لا يمكن ألدغ أصحابي وأخواتي.. أحلف لكم بشرفي إن ده عهد علي قدامكم.. صدقوني يا جماعة.

ضفدع٧: أنا مصدقك يا عقرب ونفسى نتصاحب على بعضنا.

الأم: ها قلتوا إيه يا ولاد؟

### (موسیقی)

الأم: حد شاف أخوكم العقرب.

ضفدع ١: كان بيلعب معانا جنب الشط وبعدين أختفى.

ضفدع٧: أنا شفته يا ماما و هو ماشي فوق الرملة وبعدين لقيته دفن نفسه تحت الرملة.

الأم: دي طبيعته.. الله إيه اللي بيزحف على الرمل ده.. حاسبوا بــــا ولاد دي سحلية سامة.. خدوا بالكم اهربوا بسرعة أحسن تموتكم.

ضفدع٧: ألحقيني يا ماما السحلية بتجري ورايا..

العقرب: ماتخافش يا سابع أنا هااحميك.. تعالى يا سحلية لقدرك.. أنتي مــش عارفة إنهم إخواتي وأصحابي.. خدي اللدغة الحلوة دي وسافري.

ضفدع٧: هاتسافر فين يا عقرب؟

العقرب: للقبر يا سابع.

ضفدع٧: أخويا العقرب موت السحلية الشريرة.. أخويا العقرب موت السحلية الشريرة يا ماما.. هيه.

### (موسیقی)

### (مسمع۲)

السلحفاه: أنتى أتجننتي ياختي.. أتهبشتي في نافوخك.

الأم: أتجننت!! عيب عليكي يا سلحفاه ليه بتقولي كده؟

السلحفاه: فيه ضفدعة تصاحب عقرب وتسيب عيالها معاه وهي مطمنه.

الأم: وليه يا سلحفاه باختى؟

السلحفاه: لا ده لا يمكن أبداً.. أنتي ناسية أن العقرب عدوك ومن أكبر أعدائك كمان..

الأم: لكن قدرت أحول عدوي ده لصديقي.. وصديق مخلص كمان.. طبب ده أحنا من غيره كان زماننا متنا أنا وأولادي.. ده هو اللي بيحمينا ويحرسنا من كل الحيوانات والزواحف الخطره.

السلحفاه: انا مش مصدقة وداني.. أنتى بتخرفي بتقولي إيه..

الأم: لأ. صدقي ياختي.. ده أحنا حبيناه ووثقنا فيه وبقى خلاص واحد مننا زي عيالي وأكتر.. طب ده أنا لما أحب أنزل الميه استحم أو أروح أدور على أكلنا باسيب عيالي معاه وأنا مطمنه أنه هايحميهم ويحافظ عليهم ومافيش حد هايقدر يأنيهم وهو موجود.

السلحفاه: يا قلبك ياختي..

الأم: أصله قطع معانا عهد، قطع معانا معاهده سلام، وتطبيع علاقات ومــش ممكن يخون عهده أبدا هو قال كده.

### (موسیقی)

العقرب: يللا يا أو لاد إطلعوا من الميه علشان تاخدوا حمام شـــمس وتنشفوا جلدكم قبل ما تيجي ماما.

### (أصوات الضفادع وهي تخرج من الماء)

العقرب: ها.. خلاص طلعتوا كلكم.

ضفدع ١: لأ. لسه في واحد في الميه مش عايز يطلع يا عقرب يا أخويا.

العقرب: مين هو اللي مايسمعش الكلام ويطيع الأو امر.

ضفدع ٢: أخوك الضفدع رقم ٧..

العقرب: اطلع يا سابع بسرعة وأسمع الكلام بلاش عند..

ضفدع٧: لا مش طالع عايز ألعب شويه.

العقرب: بأقول لك اطلع بالذوق احسن أطلعك بالعافية.

ضفدع٧: هاتشتكيني لمامتي؟

العقرب: أيوه وهاتزعل منك.

ضفدع٧: طب أنا طالع أهه.. هوب هوب.. نق نق نق.

العقرب: إيه وقفت عندك ليه ماتكمل.

ضفدع٧: أصلي ماليش مزاج أطلع من الميه.

العقرب: بأقول لك أطلع أحسن لك.

ضفدع٧: اديني طلعت من الميه. ولو سامحت ماتزعقليش تاني. ماما هي اللي من حقها تزعقلي بس. من حقها تزعقلي بس.

العقرب: كده طب خد اللدغة دي.

ضفدع٧: أه يا ماما.. أه دي لدغة جامدة أوي.

ضفدع 1: إيه ده ماله أخونا السابع إيه اللي حصل له؟ عملت فيه إيه الحقينا يا ماما.. الحقينا يا ماما.

الأم: مالك يا ابني مالك يا حبة عيني؟

ضفدع ٧: العقرب غرز إبرته المسمومة في جسمي ولدغني.. أنا خلاص مــت يا ماما.. أنا خلاص مــت يا ماما.. أنا خلاص مت. الوداع.. خللي بالك منعيالك..

ضفدع ٢: قتلته يا مجرم.. قتلته يا مجرم.

العقرب: أي حد هايقرب ناحيتي هايكون مصيره زي مصير أخوه.

العقرب: عهد مين ومعاهدة مين يا ساذجة.. في حد يصدق العقرب برضه.. هو العقرب عمره ينسى إنه عقرب..

(موسیقی)

### حواديت مصرية

# 

### (**1 eama9**

### (صوت سياره سيف قادمه وهي مسرعه)

عوض البواب: يووه.. حاسب.. يا أستاذ سيف.. أهو ده اللي أنا كنت خايف منه.

سيف: في إيه يا عوض.. إيه الغاغة اللي أنت عاملها دي.

سيف: خلصني.

عوض: وأنت بتركن عربيتك حكيت عربيه فاروق بك اللي ساكن في الــــدور الثالث.

سيف: أنت بتخرف وتقول إيه يا جدع أنت.. أنا.. ما حصلش مفيش عربيات جنبي علشان أحكها زي مانت شايف وبتقول.

عوض: سلامتك م الشوف ياسي سيف ما هي العربية قدامك أدهولـــت علـــى عينها.

سيف: مش أنا.

عوض: ازاي يا سيف بيه. ده أنا شفتك بعنيه دول اللي حياكلها الدود وأنـــت بتحكها.

سيف: إيه يا عوض. ما تفوق لافوقك. عايز تتبلى عليه والا إيه يا جدع أنت. عوض: اتبلى عليك يا سيف بيه لاسمح الله بقولك أنا شايفك بعنيه وأنت بتحكها قبل ما تركن هنا.

سيف: اسمع بلاش هرش مخ أنا دماغي متكلفه هات من الآخر .. حد غيرك شافني.

عوض: لا يابيه.. أنا بس اللي شفتك.

سيف: يبقى خلاص يا أخى .. امال قالب دماغى من الصبح ليه.

عوض: ومعناته إيه الكلام ده يابيه.

سيف: معناته انك تسكت خالص و لا تجيبش سيره لحد.. كأنك ماشفتش حاجــه خالص فاهم.

عوض: ازاي يابيه.. عايزني أخالف ضميري دي حاجه ماترضيش ربنا أبداً. سيف: امسك. خد دول وسيبك من كل الكلام اللي مالوش لزوم ده.. مد أيدك وخد القرشين دول.

عوض: أعوذ بالله.. عايز تشتري ذمتي يابيه. مش عيب كده.

سيف: ماتبطل يا عوض كلامك الخايب ده وتاخد القرشين دول أحسن لك أهم بنفعوك عيالك محتاجين مصاريف مش كده و لا إيه؟

عوض: يا سيف بيه. مستوره والحمد لله. الله الغني عن فلوسك. عايز تشتري زمتي بالفلوس.. مش أنا يافندي. أعمل إيه بس ياربي في الحوسة دي أقول إيه للراجل صاحب العربية.

سيف: قول اللي تقوله بس بعيد عني، أنت لا شفتيني ولا شفتك فهم ياعوض. مش عايزك تفتح بقك بكلمة واحدة ولو الست دينا عرفت هاطين عيشتك وهاوديك ورا الشمس، ومش كدا وبس، ده أنا هانكر كل حاجة والبسهالك، اديني بقولك أهوه.

عوض: حسبي الله ونعم الوكيل، حسبي الله ونعم الوكيل.

### (موسيقي)

### (مسمع۲)

الأم: سيف خطيبك وصل وقاعد بره يادينا.

دينا: طيب يا ماما.

الأم: شهلي آيدك شويه. بلاش تسيبي الجدع يقعد لوحده كتير.

دينًا: أف.. قلت طيب.. روحي حضرتك اعملي له حاجه يشربها لحد ما أخرج له.

الأم: ومالك مضايقه قوي كده؟

دينا: مافيش.. أف.

الأم: مافيش ازى؟ ده انتي يا بنتي ذي ماتكوني بتتخانقي مع دبان وشك.

دينا: اوه يا ماما .. ماتسبيني في حالي بقه.

الأم: ما أنا سيباكي في حالك. هو أنا كنت مسكت فيك. أنــــا بــس عـــايزاكي تفردي وشك شويه. مش معقولة تقابلي خطيبك وأنتى بالشكل ده.

دينا: حاضر.. أهو.. ممكن حضرتك تسيبني أنا وخطيبي نتصرف مع بعض. الأم: براحتك.. أنتى حره.

### (موسیقی)

سیف: أهلا یا دینا. اتأخرتی علی کده لیه.. ده أنتی وحشتینی قوی.. مالك یا دینا.. شكلك متغیر. فیه حاجه مضایقاکی یا حبیبتی؟

دينا: مضايقه بسبب المشاكل اللي بتعملها لنا كل ما تيجي تزورنا.. وأخرهـــــا عربيه الأستاذ فاروق اللي خبطتها وأنت بتركن.

سيف: أنا ماحصلش حاجه من دي خالص. أنتي جبتي الكــــلام ده منيــن يـــا حبيبتي. حد قالك حاجه؟

دينا: أنا كنت واقفه في البلكونه وشفت كل حاجه.

سيف: أيه؟ حد تاني غيرك شافني.

دينا: هو ده بس كل اللي يهمك .. نفسى أعرف أنت ليه بتنكر .

سيف: إيه يا دينا.. مالك عصبيه قوي كده.

دينا: من تصرفاتك يا سيف.. لو ما أنى شفتك بعيني ماكونتش ناوي تعترف.

سيف: إيه اعترف وما اعترفش. إحنا في محكمه.. لا يا دينا ده كلام مش حلو أبداً.. ماتخلنيش از عل منك.

دينا: ما تحاولش تغير الموضوع. ليه أنكرت في الأول لما سألتك.

سيف: هو أنا كنت قاصد يعني و لا كنت قاصد.. دي حاجه حصلت غصـــب عنى. ثم إيه يعنى اللي جرى علشان تعملي كل ده؟

دينا: وليه تخلى غيرك يتحمل مسئوليه غلطه أنت اللي عملتها.

سيف: مش معقول كده يا دينا. لو كل واحد أتصرف بمنطقك ده يبقى مىش حنخلص.. ياما ناس بتعمل غلطات كتير من غير ما بيتحملوا مسئوليتها وبتعدي من غير ما يحاسبهم حد. اشمعنى انا اللي بتعملي معايا كدده.. مدام ماحدش شافنى يبقى خلاص، طنش.. براءة.

دينا: الأسلوب ده أنا ما أحبهوش اللي يغلط لازم يتحمل نتيجة غلطه ما يهربش من المسئوليه هي دي الرجولة ياسيف بيه.

### (موسیقی)

البائع: المجموعة دي مو اانو طلباني. احدث تحف وصلت للسوق.. فنتاستيك خالص.. وكمان مش غالبة أسعارها معقولة قدوي.. لدو تسمعي نصيحتي يا مدمو ازيل تملي شقتك منها.

دينا: فعلاً.. باين عليها ظريفة قوي يا سيف..

البائع: المجموعة كلها قدام حضر اتكم. تقدروا تتقوا منها اللي يعجبكم لحد ما أشوف الزبونة اللي هناك دي وارجع لكم عن أننكم. براحتكم المحل محلكم. معيف: الله يا دينا حلوه قوى التحفه دي.. الله و لا دي كمان.

دينا: طيب بس حاسب يا سيف. على مهلك على الحاجة دي قزاز رقيق ما يتحملش.. أي حاجه ممكن تتكسر بسهوله.

دينا: بتعمل إيه يا متهور.

سيف: بلعب بهم زي بتوع السيرك. بص هيلا هوب.. هيلا هوب!! دينا: حاسب يا سيف. مش معقول كده اللي بتعمله.. بلاش تهور ارجوك لحد يشوفنا. سيف: لا دا أنتى قلبك رهيف وخوافه بصحيح.

**دينا:** أرجوك يا سيف كفاية لعب بالتحف بلاش كده.. بعدين حاجه تقع وتتكسر.

سيف: قلت لك ما تخافيش اللعبه دي أنا متعود عليها طـــول عمــري. هيــلا هوب.. هيلا هوب.

(صوت إحدى التحف الزجاجية وهي تتكسر على الأرض)

دينا: يا مصيبتي.. شفت اللي حصل.. أهو ده اللي أنا خايفه منه.

سيف: وطي صوتك لحد يسمعك. أنا هالم اللي انكسر وأرميه تحت الريون من غير ماحد ياخد باله.

دينا: يادي المصيبه.. يادي الفضيحه.

سيف: ولا مصيبة ولا فضيحة خلاص كله تمام التمام. كل شيء انتهى من من غير ماحد اخد باله.

دينا: انتهى ازاي.. والحاجه اللي انكسرت.

سيف: ما خلاص ماحدش أخد باله، طنش بقه..

دينا: غلط. غلط. أطنش أزاي ياسيف.

سيف: أرجوك وطى صوتك البياع جي ناحيتنا.

البائع: عجبكم حاجه يا بهوات.

سيف: في الحقيقة هي مجموعه ظريفة قوي مش كده يا حبيبتي.. بـــس إحنـــا محتاجين لوقت شويه نفكر ونختار، ولا إيه ياروحي؟

البائع: براحتكم.. إحنا في خدمتكم دايما.

سيف: متشكرين قوي.. باللا يا دينا أحسن اتأخرنا.. ايه يا دينا واقفه ليه يللا علشان نمشى.

### (موسیقی)

### (کعمسمع)

سيف: ها يا حبيبتي تحبى تشربي إيه.

دينا: مش عايزه أشرب حاجه.

سيف: مالك ماده بوظك شبرين. هو جرى إيه يعنى.

دينا: مش عارف جرى إيه؟

سیف: کل ده علشان حته بتاعه قزاز انکسرت.. وایه یعنی.. ما فی داهیه.. هی یعنی حتطلع بکام.

دينا: أنا مش بتكلم على قيمتها.. أنا بتكلم على المبدأ.. اللي انست عملته ده اسمه هروب من المسئولية.. فيها إيه لو قلنا لصاحب المحل احنا أسفين كسرناها وكنا دفعنا ثمنها وخلصنا.

دينا: زي الحراميه.

سيف: حراميه؟

دينا: نفس مبدأ الحرلميه.. يسرق من غير ماحد يشوف بيقى خلاص مفيش مشكلة.

سيف: عيب يا دينا تقوللي على خطيبك كده.

دينا: كل اللي يهمك ان مدام ماحدش شافك وأنت بتعمل الغلط يبقى خالص مش مهم أي حاجه تاني كأن مفيش حاجه حصلت. عامل حساب للناس ومش عامل حساب لنفسك وضميرك وربنا. سيف: سيبك من المثاليات الفارغة دي.. إحنا في زمن ما عدش يتحمل كلام من ده. دينا: الأخلاق والمثل والضمير قيمه ملهاش لا زمان و لا مكان يا أستاذ سيف. سيف: أيه يا أستاذ دي؟

دينا: القيم والمثل مابتتغيرش أبداً بتفضل ثابته على طول.. والصح هايفضل طول عمره عمره صح والغلط هايفضل طول عمره غلط مهما حاولوا نساس زيك يقلوبها للعكس الصح غلط والغلط صح.

سيف: مش كده يا دينا. مش معقول اللي بتعمليه ده.. هو كل ما نخرج مع بعض تديني دروس في الأخلاق وتعملي لنا مشاكل من لاشيء المفروض إننا خارجين نتفسح مش نتخانق.

دينا: أنا ما بعملش مشاكل. أفعالك هي اللي بتعمل فينا كده. لازم كـــل مـره تعمل عمله ألعن من أختها.

سيف: أنتي اللي بتحبكيها أكتر من اللازم باستي، مدام عدت على خـــير إيـــه لزوم كل ده.. لازم بعني تعملي فيها مصلح اجتماعي، عايزه تجبيلـــي مشاكل ملهاش لازمه أنا في غنى عنها.

دينا: عندك حق يا سيف.. أنا أسفه الظاهر أنى كنت غلطانه.. ولازم اصلح غلطتي دلوقتي حالاً أتفضل يا أستاذ دبلتك إحنا ما ننفعش مع بعص.. أديني عفيتك من دروسي اللي بتوجع دماغك. وعيش حياتك براحتك زي ما أنت عايز.

### (موسیقی)

### حوادیت مصریة

رامي: سميحه.. يا سميحه أنتي فين يا حبيبتي..

سميحه: رامى!! في إيه مالك؟

رامي: خلاص.. خلاص يا سميحه أخيراً حلمنا هايتحقق وهانطلع الاعارة..

سميحه: مش معقولة.. إمتى ده حصل؟!

رامي: النهارده وصلتني الموافقة أهه.. وإيه عقد ماحصلش.. مرتبب ألفين دينار.. ده غير الشقة والعربية وعلاج مجاني وده غير تذاكر السفر رايح جاي مرتين في السنة.. في أحلى من كده بقى..

سميحه: ده و لا في الأحلام.. والسفر إمتى يا حبيبي؟

رامي: في أسرع وقت. لازم نستلم العمل بالمدرسة قبل العام الدراسي ما يبدأ بشهر يللا بقى إستعدي للسفر بسرعة..

سميحه: يعنى أقدم على أجازة سنة بدون مرتب؟

رامي: سنة واحدة قولي سنتين.. تلاته.. عشرة هو اللي يدوق العز.. يرجــــــع للفقر تاني..

### مسمع (٢) (في الاجتماع)

قائد الاجتماع: في الحقيقة يعز علينا سفر إتتين من إخوتنا الأحباء اللي لهم خدمه رائعة وسط الشباب وقاده مخلصين في خدمة الرب وكسب النفوس.. بأسم اجتماع الشباب بنقدم الكتاب المقدس هدية بسيطة لللخ رامي والأخت سميحه وبنصلي إن الرب يحفظهم في غربتهم ويوفقهم ويبارك في خدمتهم وسط أهل البلد اللي معارين لها.. ودايماً هلنفتكرهم في صلواتنا وأنتوا كمان إفتكرونا في صلواتكم والرب معكم..

الأم: خلاص يا رامي.. نويت يابني؟

رامی: صلی لنا یا ماما..

الأم: ربنا يحفظكم يابني ويوفقكم ويبارككم.

سميحه: مرسي يا طنط وأبقى إفتكرينا دايماً في صلواتك..

الأم: طبعاً بابنتي أوعوا تنسوا الجوابات باولاد.. رامي إبقـــى طمنـــي عليـــك يابنى.. ده أنا ماليش غيرك في الدنيا.. إنت ابننا الوحيد..

رامي: ايه.. هو بابا مش عايز بيجي يسلم عليَّ ولا إيه..

الأم: (تنادي) شوقي.. يا شوقي.. ابوك تعبان أوي يا رامي.. مــانمش طــول الليل.. دماغه عماله تودي وتجيب..

رامي: ليه بس يا ماما هو أنا مهاجر..

الأم: أبوك خايف يموت وإنت في الغربه.. كان نفسه تقف جنبه في شــيخوخته ومرضه.

شوقي: مين قال كده يا أم رامي. لا يا أبني، سافر، سافر وأبني نفسك ومستقبلك أنت عندك أسرة محتاجة لكل قرش توفره ليها. من حقكم تعيشوا أحسن مننا وفي مستوى أعلى. سافروا يابني وربنا معاكم. بيس أوعى الفلوس تتسيك أهلك وبلدك وربك وخدمتك..

### مسمع (٤)

رامي: أشوف وشك بخير يا طنط..

الأم: سميحه يابنتي، خلي بالك من نفسك ومن رامي.. أنا عارفه كان لازمتها إيه السفرية دي.. ما انتوا عايشين في وسطنا مبسوطين وراضيين.. هـو حد بينام من غير عشا.

سميحة: مش وقته الكلام ده يا ماما. خلاص كلها ساعتين وطالعين على المطار. إطمني يا ماما. إنشاء الله هاأبعت لك كل شهر مصاريف العلاج بتاعك ولو إحتجتي أي حاجة نفسك فيها إيعتيلي على طول. بس خلى بالك من صحتك.

### مسمع (٥)

### (الخليج) (صوت طائرة)

فهد: أهلين وسهلين بيكم في بلدكم التاني. إنشاء الله إقامة سعيدة وموفقين بإذن الله. تفضلوا معي سياره بوصلكم للفندق لحين الانتهاء من تجهيز السكن.. كلها يوم و لا تنين بالكتير.. أهلين وسهلين.

رامى: شكراً يا أخ فهد.. ياه مالها بلدكم حر موت كده..

سميحه: والرطوبة عالية أوي..

فهد: كتير كتير.. لكن شو بنسوي.. هيك ربك بيوزع كـــل شـــيء بــالعدل.. عندكم الطقس الزين لكن ما في مصاري.. وعندنا المصاري كتيرة ومـــا عندنا الطقس الزين..

رامی: تبقی بصره.. ها ها ها..

### مسمع (٦)

سميحه: أنا مش مصدقه عيني يا رامي يا حبيبي.. شايف الشقة جميلة إزاي.. رامي: ده و لا في الأحلام.. كل دي شقة.. دي قصر يابنتي..

سمیحه: أخیراً بقی عندنا تلیفزیون وملون کمان وفیدیو واستریو ومیکروویسف وکمان تلیفون.

رامي: هنا عز يابنتي عز.. مش زي الفقر اللي كنا عايشين فيه هناك.. سميحه: ولا العربية..

رامى: قصدك السيارة.. إسمها هنا السيارة..

سميحه: مين كان يصدق إننا نركب عربية قصدي سيارة أمريكاني مكيفة وإيه أتوماتيك تمشي لوحدها.. هاأموت أنزل بيسها مصسر وأمشي في في شوارعنا وأهلي يشوفوني. هايتحصروا على روحها.

رامي: ولسا ياما هانشوف عز يابنتي.. المهم لازم نروح البنك نفتح حساب ليَّ وحساب ليكي علشان نحول مرتباتنا أول باول على بلدنا..

سميحه: معقولة.. أنا هايبقى ليّ حساب في البنك بإسمي.. أنا مش مصدقه.. زي ما أكون بأحلم..

أبو رامي: مافيش أخبار عن الولاد؟

أم رامي: أبداً يا أبو رامي.. بقى لهم أكتر من شهرين لا حس ولا خبر بعــــد آخر مكالمة تليفون.

أبو رامي: ربنا يستر عليهم..

أم رامي: قلبي واكلني عليهم أوي يا أبو رامي..

أبو رامي: خليها على الله.. تلاقيهم مزحومين في الشغل ما هو هذاك عبرارة عن معسكر عمل.. يعني البني آدم مايعملش حاجة في حياته غير الشغل.. الشغل وبس..

أم رامي: ودي تبقى عيشة دي..

أبو رامي: علشان يقدروا يحوشوالهم قرشين ينفعوهم في المستقبل..

أم رامي: وصحتهم..

أبو رامي: العلاج هناك بالمجان وعلى أعلى مستوى طبي.. يعني الواحد يشتغل لحد ما يتعب ويقع يروح المستشفى يتعالج ويرجع يكمل شغله تاني.. حياه مافهاش هزار.. مكن مابيونش.

أم رامي: يا عيني عليك يا ابني..

### $(\Lambda)$ some

رامي: سميحه.. كتبتي الجوابات للجماعه في مصر؟

سميحه: جوابات!! حته و احدة.. ليه شايفني فاضية ماوربيش حاجــة علشــان أكتب جوابات.. وأضيع وقتى ببلاش..

رامى: نطمن الجماعة علينا..

سميحه: أنا كتبت جواب بسرعة لماما و لأختى نهاد..

رامى: طب وأمى وأبويا..

سميحه: ماتبعتلهم إنت مش أهلك.. كل واحد يبعت الأهله..

رامي: ما لنتي عارفه الدروس الخصوصية ولخدة كل وقتي يــــا ســـميحه.. مــش ملاحق ده أنا يادوب بأخطف اللقمه وأجري على الدرس ده والدرس ده.. سميحه: علشان نحوش يا حبيبي ونوفر سنين الغربه. أنت ناسي إن علينا قسط الشقة والعربية وحتة الأرض. وكمان لازم تشتري شاليه في الساحل الشمالي.

رامي: وكان لازم يعني تشتري شقة بــ ٢٥٠,٠٠٠ جنيه حته واحــدة وفــي أرقى حي في بلدنا..

سميحه: طبعاً.. إياك عايزني أرجع أعيش في حته الحق الضيق اللي كنت عايشة فيه قبل كده. لا يا حبيبي، خلاص مابقاش مستوايا يا بابا، كان زمان وجبر يا روحى. آمال اتغربنا ليه.

رامي: الله.. أنت لغتك إتغيرت خالص يا سميحه.. مـش دي لـهجتك بتاعـة زمان؟ إيه اللي حصل لك؟!

سميحه: ليه ياخويا لساني بقى أعوج و لا عملت له عملية تجميل؟! اسمع أنــــا مش ناقصاك كفاية هم الشغل والغربه. عن إننك.

رامى: رايحة فين بس؟!

سميحه: رايحة أنام عندي شغل بدري. أنت ناسي ولا إيه. ولا فاكرني هاأقعد أتونس معاك.. لا يا حبيبي ده كان زمان.

رامي: تفتكري يا سميحه آخر مرة قعدنا فيها مع بعض نتكلم سوا بهدوء ورقه من غير خناق كانت إمتى؟!

سميحه: لا ده أنت الظاهر فايق على الآخر.. عن إذنك مش فاضية للكلم المعنيفة المحام الفارغ ده. الرومانسية متوكلش عيش.. سحب كهربا على الفاضي.

رامي: لا قصدي نقعد مع بعض نقراً الكتاب المقدس ونصلي مع بعض زي زمان.. سميحه: قصدك المذبح العائلي..!!

رامى: كويس إنك لسه فاكره اسمه.

### مسمع (۹)

سمعان: أستاذ رامی مش کده؟

رامى: أيوه، حضرتك تعرفني؟

سمعان: عز المعرفة. سمعت عنك كتير.

رامى: من هنا؟!

مسعان: لا من هناك. من بلدك. أقدم لك نفسي الأول. أنا أخـــوك فــي الــرب سمعان عزيز عضو في إجتماع الخدام بالكنيسة الوطنية هنا.

رامي: هو هنا في كنيسة؟!

سمعان: طبعاً. ايه ماتعرفش؟

رامي: غريبة. بقى لي ٣ سنين بحالهم وأول مرة أسمع إن فيه كنيسة هنا.

سمعان: كنيسة واجتماعات ونهضات وخدام ببيجوا لنا من كل أنحاء العالم.. وكان نفسنا نسمعك يا أخ رامي..

رامي: تسمعوني!!

سمعان: أيوه. كتير من الإخوة إتباركوا بخدماتك في مصر صيتك كان وصلنا. رامي (لنفسه): ده كان زمان. زمان أوي.

سمعان: إيه رأيك ماتيجي تقدم لنا وعظة يوم الأحد اللي جاي.

رامي: وعظة. أيوه، بس. لامعلش، قصدي آسف عندي شــغل مــهم. خليــها فرصة تانية. أصلى.. أصلى مستعجل.. عن إذنك.

### مسمع (۱۰<u>)</u> (موسیقی)

رامي (لنفسه): يا خسارة يا رامي!! يا ميت خساره عليك. أديك كسبت فلوس كتيرة وقدرت تشتري كل اللي نفسك فيه أنت وسميحه. الأرض والشقة والعربية. لكن خسرت الأهم من كل ده، خسرت نفسك. نفسي لا أنسا كويس. أنا بس إنشغلت شوية لكن إيماني لسه موجود. إيماني لسه قوي. أنا مابعتش نفسى للفلوس. أنا ماتهمنيش الفلوس أنا.

شخص: أستاذ رامي. أستاذ رامي. إبه سلامتك بتكلم نفسك يا راجل. رامي: آسف. مين حضرتك.

شخص: أنا ولي أمر طالب عندك في المدرسة وليَّ طلب عند حضرتك. رامي: أؤمر. تحت أمرك.

شخص: الولد ابني ضعيف حبتين في المادة اللي بتدرسها له. فممكن تيجي.. رامي: إيه!! أدي له درس خصوصى. أوي.. أوي بس بشرط بعد الساعة تلاتة صباحاً ينفع.

### حواديت مصرية

كامل: خلاص يا ست شيرين لميتي شنطك و هدومك وماكياجيك ولعبك؟

شرین: خلاص یا بابا یا حبیبی

كامل: يعني ما عادلكيش حاجه عندنا.. آه علشان ما تعملهاش حجة وتقعيدي تنطي لي كل يوم والتاني وتسيبي المحروس جوزك لوحده.

كامل: سيبك من كلام البكش بتاع الأفلام والمسلسلات العربي.. خلينا في المهم أسمع يا سي شوقي.. اتفضل سعادتك أستلم عروستك وامضي لي على السركى ده..

شوقي: سركي؟!! سركى أيه يا أنكل كامل؟

كامل: بأستلامها، هي مش عهده !!!

شيرين: عهده؟! (ضحك) عسل دمك زي العسل يا كمولتي..

كامل: كمولتي.. أيه كمولتي دي.. عيب يا بنت.. في واحدة محترمــه تقــول لابوها المحترم جداً كمولتي.. عايزه جوزك يقول علي أيه.. قال كمولتي قال.. أسمى الأستاذ كمال أفندي النخيلي على سن ورمح.

شوقي: ربنا ما يحرمكوش من بعض يا عمي..

كامل: ولا يحرموكوا من بعض يا شوقي يابني... شيرين يا بنتي خلي بـــالك من جوزك شوقي وأوعي تزعليه فاهمه؟ أحسن أمدك على رجلك.

شوقى: حاضر يا كمولتى..

كامل: وأنت يا شوقي يا أبني. مش ها أوصيك على شيرين.. دي غالبة علينا أوي. أخر العنقود بقى.

شوقي: شيرين في عيني يا عمي. وأوعدك أني أخليها أسعد أنسانة في الدنيا. كامل: يبقى أنا ها أكون أسعد أنسان في الدنيا. يللا بقى أتكلوا على الله على على بيتكم ويابخت من زار وخفف.

شرين: كده.. يعنى بتطرينا يا كمولتي.

كامل: أنا ما صدقت خلصت منك ومن أخواتك وجوزتكم علشان أريح دماغي من داوشتكم وطلباتكم اللي ما بتنتهيش. أن الاوان بقى أني أعيش فــــي هدوء وراحة. ولا أيه با شوقى با أبنى.

شوقي: هو حضرتك تقدر تستغنى عن أولانك ولا هما يقدروا يعيشوا يوم بعيد عنك.. كامل: ربنا يديم المحبة يا بني. أنا خلاص أديت رسالتي على أكمل وجه ويللا حسن الختام بقى..

شيرين: أخص عليك يا كمولتي.. ما تقولش كده.. ولا عايزني أزعل منك.. شوقى: ربنا بديك الصحة وطولة العمر يا عمى.

كامل: طيب متشكر.. يللا بقى وروني عرض كتافكم... مع السلامة على شهر العسل.. روحوا جاتكم أيام كلها عسل..

شيرين: قلبي مش مطاوعني أسيبك لوحدك يا بابا.. مين هايخدمك وياخد بالـــه منك.. مين هايديك الدوا في مواعيده.

كامل: ما لكيش دعوه.. خليكي في شهر عسلك وبس.. من هنا ورايح كل واحد مسئول عن نفسه وبس.. فاهمه يا بنت.. أتفضلوا بقى أنا زهقت منكم.

شيرين: من قلبك يا بابا..

كامل: يا حبيبتي يا بنتي (بكاء)

(موسیقی)

### مسمع (۲)

شاكر: بابا صعبان على أوي يا عايده.

عايده: هي دي سُنة الحياة يا شاكر، الأولاد يتجوزوا ويسيبوا بيبت أبوهم ويعيش كل واحد في بيته.

شاكر: بس المسكين ها يعيش لوحده أزاي بعد جواز أختي شيرين. دي كانت مسئوله عن خدمته ومش مخلياه محتاج حاجه. مسكين يا بابا.

عليده: ويعني هو أبوك عايز أيه تاني من الدنيا.. ما كفاياه..

شاكر: بتقولى أيه يا عايده.. ؟!

عايده: مش قصدي يا شاكر. أنا قصدي أن باباك مالوش طلبات كتيره.. يادوب حتة لقمة صغيرة تشبعه وعقبال ما يخلص قراية الجورنال والفرجة على التليفزيون يكون اليوم خلص ومش هايشعر بغياب شيرين..

شاكر: لو المرحومة ماما كانت عايشة ماكناش شلنا همه كده.. لكن أرادة ربنا بقى.. الله يرحمك با ماما..

عايده: خليك يا أخويا في نفسك.. كفايه علينا همومنا وهموم عيالنـــا.. أنــت ناسى أن في رقبتك ٣ عيال وأمهم..

### مسمع (۳)

شاكر: ألو، أيوه يا شكري، أنا شاكر أخوك. أزيك؟

شكري: اهلاً يا شاكر أزيك وأزي عيالك وأزي عايده.

شاكر: بخير وأنت عامل أيه..؟

شكري: مشغول.. مشغول لشوشتي.. المشروع الجديد واكل كل وقتي..

شاكر: ربنا معاك..

شكري: خير يا شاكر .. في حاجه.؟

شاكر: أبداً كنت عايز أطمن على بابا..

شكري: ليه هو أنت ما بتروحش تزوره..؟

شاكر: بقى لي أسبوع. ما أنت عارف أن امتحانات نص السنة على الأبواب و با دوب بأرجع من المكتب أستلم مذاكرة العيال ومراجعة دروسهم.

شكري: أخص عليك يا شاكر بقى أنا معتمد عليك في الحكاية دي يا أخي.

شاكر: معتمد على.. ليه هو أنت ما بنروحش تزوره أنت كمان..

شكري: من يوم فرح أختك شيرين وأنا غرقان لشوشتي في المشروع الجديد. بأنزل من صباحية ربنا ما بأرجعش ألا في أنصاص الليالي مقتول. يادوب عايز أحط جسمي على السرير وأنام.

شاكر: طب وبعدين في الورطة دي؟

شكرى: ورطة أيه يا شاكر؟

شاكر: بابا اللي ماحدش مننا بيسأل عنه ..

شكري: بكره شيرين ترجع من شهر العسل وتروح تقعد معاه كام يوم..

شاكر: أيوه بس شيرين بقى عندها بيت ومسئوليات جديدة..

شكري: تدبر .. معلش يا شاكر ها أسيبك دلوقتي أحسن عندي ناس..

شاكر: كده.. طيب يا شكري..

(موسیقی)

### مسمع (٤)

شيرين: كمولتي .. كمولتي .. جهزت الفطار يا حبيبي .

كامل: حالا يا روحى...

شاكر: يللا يا بابا عصافير بطنى بتصوصو..

كامل: أصبر يا واد يا مفجوع لما أخواتك يتجمعوا على السفره.

شكري: بابا لو سمحت عايز خمسة جنيه.

كامل: خمسة جنيه بحالهم.. ليه ها تشتري عربيه؟

شاكر: بابا لو سمحت أكوي لي القميص ده..

شكرى: ممكن يا بابا أستلف الكرافته الزرقه بتاعتك؟

شيرين: كمولتى.. كمولتى.. كمولتى (أنخفاض الصوت fadeaut)

كامل (يبكي): أبو يا شيرين.. أنت فين يا شاكر.. بطل دوشه يها واد يها شكري.. وحشتوني يا ولاد وحشتوني.. يا ترى بتفكروا في ابوكم زي ما بافكر فيكم كده يا ترى مشتاقين لابوكم زي ما انتوا وحشيتوه أوي.. نفسي آخدكم في حضني أنتوا فين يا ولاد (صوت رنين جرس الباب) الله ده جرس الباب بيرن يا حبايبي يا اولادي ماهونتش عليكم جابين تطمنوا على أبوكم.. أبوه حاضر يا شاكر.. أصبر يها واد يها شكري.. طبعاً البت شيرين لسه مارجعتش من شهر العسل.. أيوه حاضر (يفتح الباب) مين.! أستاذ محروس.. أتفضل يا حبيبي أهللاً خطوه عزيزة.

محروس: أزيك با أستاذ كامل قلت آجى أقعد معاك حبتين.

كامل: أتفضل يا أستاذ محروس. أتفضل مافيش حد غريب، أنا لوحدي. أصل الأولاد يادوب لسه نازلين أنت ما قابلتهمش على السلم.. أصلهم دايماً بيجوا يطلوا على ويشوفوا أذا كنت محتاج حاجة كده ولا كده.

محروس: ربنا ما يحرمكوش من بعض يا سيدي ..

كامل: طب ده أنا حتى لسا متخانق معاهم. إيه رأيك بقه.

محروس: ليه لا سمح الله...

كامل: مش عايزهم يعطلوا نفسهم علشاني.. أنا أقدر أخدم نفسي بنفسي. أنما راسهم وألف سيف لازم ييجوا يزوروني كل يوم.. أيوه كل يوم أصلهم ما يقدروش يستغنوا عنى وعن مشورتي.

محروس: وبعدين يا أستاذ كامل..

كامل: بعدين أيه يا أستاذ محروس؟؟

محروس: وبعدين أخرتها أيه؟

كامل: في أيه يا أستاذ محروس؟

محروس: آخرة كنبك ده أيه؟ فاكراني حاصدقك!!

كامل: كدب.. عيب يا أستاذ تقول عنى كداب..

محروس: أنت ناسي يا أستاذ كامل أني جارك في الشقة اللي جنبك وشايف مين اللي داخل ومين اللي خارج.. ولادك ماخبطوش على بابك يا كامل من يوم فرح أختهم شيرين.. ماحدش سأل فيك منهم.. بيجي أكتر من أسبوع أخص في أولاد يعملوا كده في أبوهم اللي رباهم وضحى بحياته علشانهم زمن اغبر.

كامل: أرجوك يا أستاذ محروس.. ما تحاولش توقع بيني وبين أو لادي.. أنــــا متأكد من مشاعرهم الطيبة من ناحيتي. دول و لادي و أنا عارفهم أكـــتر من أي حد في الدنيا..

معروس: أنا ماقلتش حاجه لا سمح الله.. بس ما يصحب برضه يهملوك بالشكل ده أنت بقيت وحيد وكبير في السن وما تزعلش مني.. عسايز اللي يخدمك ويسهر على راحتك..

كامل: ولادي معذوربين.. كل واحد بقى عنده مسئولية بيته وعياله وشغله.

محروس: يبقى لازم تفكر في نفسك وفي مستقبلك..

كامل: مستقبلي.. أهي دي نكته بصحيح.. مستقبلي وأنا على المعاش.

محروس: أيوه مستقبلك.. أنت صحيح دلوقتي شديد وتقدر تتحرك هنا وهناك محروس: أيوه مستقبلك. أنت صحيح دلوقتي شديد وتقدر تتحرك تنزل وتطلع لكن فكر لقدام شويه.. لما تتعب وما تبقاش قادر تتحرك زي الأول مين اللي هايخدمك.. مين اللي هايونس وحدتك.. مين اللي هايسهر على مرضك.. مين.

كامل: ربنا موجود يا سيدي.

محروس: ونعم بالله.. بس الجواز مش عيب يا كامل يا أخويا.

كامل: جواز. جواز مين؟!

محروس: جوازك أنت يا أستاذ كامل.

كامل: أنت بتخرف يا راجل يا عجوز أنت.

محروس: صدقني هو ده الحل يا كامل يا أخويا صدقني.

كامل: بس بلاش كلام فارغ.. أنا اتجوز بعد المرحومة مراتي. أتجــوز بعــد السن ده.

محروس: أنت محتاج لأليف. لانيس. لانيسه تسهر على راحتك ورعايتك صدقني يا كامل. ها.. نقول على خيرة الله ونرتب ميعاد ونشوف العروسة وتتعرفوا على بعض.. أما أنا حاطط عيني على حته سست كُمل.. كُمل بصحيح.

كامل: مش قبل ما أخد رأي أو لادي الأول.. موافقة عيالي أهم من موافقتي هو ده الشرط الوحيد..

# جحود ... جحود (جزء۲)

### مسمع (۱)

شاكر: لا... ده الظاهر بابا كبر وخرف.. معقوله توصل لكده.

شكري: فعلاً أتجنن. بابا أتجنن على كبر يا جماعة. ده تبقى مصيبه وحطت على على نفوخنا من تحت راس بابا.

شیرین: عیب ماحدش یقول کده علی بابا.. أیش حـــال لــو مــاکنتوش و لاده وعارفین أن عقله یوزن بلد بحالها.

شكري: وهو يعني في حد عاقل يعمل اللي بابا عايز يعمله ده يا ست شيرين.. بعد العمر ده كله عايز يتجوز .. يتجوز !! ساب أيه للشباب الصعير ؟

شيرين: من حقه.. بابا مش كبير للدرجه دي..

شكري: من حقه ده أيه يا ست شيرين.. لا ده انتي الظاهر أتجننتي.. طبيعـــي مش أنتي أكتر واحده عشتي معاه سبق اتعديتي منه.

شيرين: منشكرة.. كلك ذوق يا سي شكري.. هي دي آخرة تضحية بابــــا أن أحنا نقول عليه مجنون؟

شاكر: أحنا ها نتخانق مع بعض ونسيب المشكلة الاساسية.. يا جماعة أرجوكم لازم نفكر في حل. لازم نلحق نتصرف بسرعة قبل ما بابيا يتهور ويعملها وتقع الفاس في الراس.. دي تبقيى كارثه.. تبقى فضيحة بجلاجل أودي وشى فين من أهل عايدة مراتى..

شكري: ولا أنا اللي أكيد سيرتي هاتبقى على كل لسان قـــدام زمــايلي فـــي الشركة.. هابقى نكته.. هافقد هيبتى واحترامى قدامهم..

شيرين: بصراحة أنا شايفة أنكم مكبرينها حبتين.. وهو يعني بابا أول ولا آخر واحد يتجوز بعد موت مراته.. وكتر خيره أنه ضحى بالسنين اللي فاتت علشان يقوم على تريبنا وخدمتنا لحد ماشاء الله ماخلاكم بقيتوا رجالة ملو هدومكم وفتحلكم بيوت.. دلوقتي بقى مسن حقه يعيش ويستريح الكام سنة اللي باقيين له في الدنيا وبطلوا أنانية بقه.

شكري: بس يا بت بطلي كلام فارغ وأياكي تشجعيه على كده.. هاقطم رقبتك. شيرين: لو ما بطلتش طولة لسان يا شكري أنا هاأقوم أمشي..

شاكر: حقك على يا شيرين.. أرجوكي اقعدي.. لازم ناخد قرار في الموضوع ده مهما كان التمن يا جماعة..

### (موسیقی)

### مسمع (۱)

كامل: حاضر ياو لادي.. من عيني هو أنا عندي أعز منكم.. ده أنسا مستعد أضحي بحياتي علشانكم.. خلاص أنسوا الموضوع من أصله.. أعتبروه كأنه ماكان.. أنا أقدر أز علكم برضه.. دي كانت مجرد فكره مجنونه وخلاص نسيتها. قال جواز قال ده معقولة برضه

شاكر: ربنا يخليك لينا يا بابا ومايحرمناش منك أبداً..

كامل: ولا منك يا شاكر يا بنى أنت وأخواتك.

شكري: أنا كنت عارف أنك مستحيل ترفض لنا طلب يا بابا.

كلمل: ده أنتوا لو طلبتوا عيني أخلعها وأدي هالكم عن طيب خاطر يا شكري يابني.

شيرين: طب والحل..

شكرى: حل!! حل إيه يا ست شيرين؟

شيرين: المشكلة لسه موجوده ما أتحلتش.

شعاكر: مشكلة أيه. أنتي غاوية تعقدي الأمور ليه. ما خلاص بابا وافق أنه مش هايتجوز و لا أيه يا بابا يا حبيبي؟ فين المشكلة بقى يا ست شيرين.

كامل: أصل.

شيرين: المشكلة أن بابا هايعيش لوحده أزاي بعد كده..

شاكر: أنا مستعد أجيب حد يقعد معاه ويقوم على خدمته ويسهر على راحته.

شيرين: شغاله يعنى؟

شاكر: شغال. شغاله مش مهم.

شكري: وأنا ها أشارك في دفع مرتبه الشهري.

شيرين: برضه مش حل.

شكري: لا ده أنتي عايزه تصعبيها بقي.

كامل: با أو لادي ماتشيلوش همي أنا ها أعرف أدبر حياتي كويسس. أبوكو أدهاو ادود، بس ياربت تبقوا تشأروا علي كل كام يوم علشان أطمن عليكم مش أكتر من كده.

شيرين: أنا عندي أقتراح تاني بعد أننك يا بابا.

كامل: أتفضلي يابنتي.

شيرين: نقوم أنا وأخواتي بعمل جدول متابعة لحضرتك.

شاكر: يعنى أيه مش فاهم..

شكري: ولا أنا...

شيرين: يعني نقسم أيام الأسبوع بيننا.. كل واحد يمر على حضرتك يومين في الأسبوع بينناك ويطمن عليك.. قلتوا أيه؟

شكري: ما عنديش مانع.. أيه رأيك يا شاكر؟

شاكر: موافق.. و أذا مقدرتش آجي.. ها ابقى ابعت عايده تشوف طلبات بابا.. شيرين: وأنا يا حبيبي ها آجي لك كل يوم علشان أطمن علبك..

كامل: ربنا ما يحرمنيش منكم يا ولادي... (موسيقى)

### مسمع (۳)

شاكر: بأقول إيه يا عايده يا حبيبتي.

ع**ايده:** حبيبتك. أه تبقى عايز حاجة. خير يا سي شاكر يا جوزي يا حبيبي.

شاكر: لو كان ممكن يعني. لو وقتك يسمح يعني.

عايده: ما تقول يا اخي وتخلصني. أنا مش فاضية. الاكل على النار.

شاكر: يعني لو ممكن تروحي تطلي على بابا وتشوفي لو محتاج حاجة.

عايده: نعم نعم يا حبيبي. بابا ده أيه. هو أنا ناقصة. مش كفايه خدمتي ليك ولعيالك هو أنا في حيل لخدمة الغرب كمان.

شاكر: ده مش غريب.. ده بابا يا عايده أنتى نسيتى عمل آيه علشانا.

عليده: وأنت ما تروح لوش ليه زي ما أتفقت مع أخواتك.

شاكر: ما أنتي شايفه أني مشغول لشوشتي يا عايده في المناقصة اللي في أيدي لازم أخلص منها النهارده بأي شكل وأسلمها بكره في الشركة.

عايده: دي مشكلتك مع ابوك.. أنا ماليش دخل بيها.. أتصرف.

شلكر: أرجوكي يا عليده ما تحرجنيش مع بلبا وأخواتي. ها يقولوا على أيه دلوقتي. عليده: ما أقدرش. يعني ما انتش عارف وشايف البيت مقلوب ازاي وعسايز ينتضف ده غير الأكل اللي على النار. وعيالك لما يرجعوا من مدارسهم مش محتاجين اللي يغديهم ويراجع معاهم دروسهم. فضك من السيره دي بقى وروح أتصل بأخوك ولا أختك اللي فاضي فيهم يروح له. مش أبوهم برضه زي ما هو أبوك هو أبوهم.

شاكر: كده.. طيب يا عايده خليكي فكراها (صوت نمرة تطلب بــالتليفون) .. الو أهلاً شوقي أزيك يا حبيبي.. ممكن أكلم شيرين.. ألو.. شيرين أزيك يا حبيبتي عامله أيه.. بأقول أيه يا شيرين.. ممكن لو سمحتي تروحي النهارده بدالي تطلي على بابا أحسن أنا مشغول في مناقصة لازم أسلمها بكره للشغل.. بتقولي أيه.. رايحه مع شوقي للدكتور.. خــير.. كــده.. طب أبقى طمنيني.. مع السلامه.

طب نحاول نكلم شكري.. (صوت طلب نمره على التليفون) ألو.. لو سمحت ممكن أكلم الأستاذ شكري كامل.. أيه خرج في مأمورية. طب شكراً.. أنا اخوه شاكر.. مع السلامة.. وبعدين بقى في الحوسه دي. أنا ها حرق في دمي كده و آخرتها.. طب أتصرف أز اي.. كده لا هاأقدر أزور بابا.. ولا هاأقدر أخلص المناقصة اللي في أيدي. أحسن حاجب أركز في شغلي وبابا بقى ربنا معاه. وان شاء الله خرير. هو يعني هايحصل له أيه. ماجتش من يوم.

### (موسیقی)

### مسمع (٤)

محروس: غلطان يا كامل يا أخويا. غلطان وسنين غلطان.

كامل: غلطان أني مش عايز أزعل عيالي. يا محروس ياخويا غلطـــان انـــي حريص على مشاعرهم وأحاسيسهم وسمعتهم.

محروس: وها تفضل تيجي على نفسك كده لحد أمتى يا غلبان. كامل: هي دي ضريبة الأبوة يا محروس يا أخويا.

محروس: أديك وعدتهم أنك مش ها تتجوز وهما وعدوك برعايتك وزيارتك حسب الجدول اللي حطوه بنفسهم وآدي وش الضيف. اللي ييجي يبجي مره مايجيش التانية ورجعت ريما لعادتها القديمة.

كامل: ربنا يكون في عونهم والغايب حجته معاه.. والبركة في البت شيرين.. كل يوم والتاني تطل علي وتاخد بخاطري.. بس من يوم ما عرفت أنها حامل والدكتور طلب منها ما تتحركش من السرير ألا بحساب وما تبذلش أي مجهود والمسكينة مش قادرة تزورني.. وأنا مقدر ظروفها.. ربنا ينتعها بالسلامة.

محروس: طيب مش ولادك فكروا يجيبوا لك حد يقعد معاك. كامل: وهو يعني بسهولة تلاقي شغالين الأيام دي يا محروس يا أخويا. (يسمع جرس بابا الشقة)

شكري: صباح الخير.. أزيك يا أستاذ محروس. محروس: أهلاً يا باش مهندس شكري.. أتفضل.

شكري: أزيك يا بابا وحشتني يا حبيبي.

كامل: وأنت كمان وحشتني أوي يا حبيبي أنت وأخواتك.

شكري: تعالى يا ربيع أدخل.

شكري: ده ربيع اللي هايقعد معاك يا بابا ويقوم على خدمتك.. مش ها أوصيك يا ربيع.. بابا تحطه جوا عينيك.. فاهم..

ربيع: ده البيه أن ماشالتهوش الأرض أشيله على راسي من فوق.

شكري: لما نشوف.. ربيع أنا فهمتك على كل حاجة وحفظتك بابا بيحب أيه وعرفتك مواعيد الدوا والأكل. ماشي.. طب بعد أذنك أستأذن أنا يا بابا.. على فكره خد القرشين دول خليهم معهاك يمكن تحتاج ربيع يشتري لك فاكهه ولا خضار ولا لحمة.

كامل: متشكر يا ابني.. طب مستعجل ليه يا حبيبي ما تقعد شويه..

شكري: أصلى لازم ارجع الشغل بسرعة.. هو شاكر ماعداش عليك ولا أيه؟

كامل: شاكر.. آه.. عدى.. بس المسكين عنده شغلانه لازم يخلصها و البيرجع تانى هو قال لى كده..

محروس: شلكر أخوك ماجاش يا باش مهندس.. كفاية تداري عليهم أكتر من كده. كامل: محروس أرجوك.

محروس: أرجوك يا أستاذ كامل. كفاية حرام عليك نفسك يا أخي. أخوك يا باش مهندس مش فاضي يطل على أبوه. ماجاش في ميعاده حسبب الجدول اللي متفقين عليه و لا حتى بعت الست مراته بداله.

كامل: يا أبني أخوك ظروفه صعبه ربنا يكون في عونه وأنا مقدر والبركة في عمك محروس الراجل دايماً بيسأل عني ويشوف طلباتي ربنا ما يحرمنيش منه وياخد بحسي وآدي ربيع بقى موجود.. يعني ماتشيلوش همى وعيشوا حياتكم وكفاية همومكم الله يكون في العون..

شكري: كده يا شاكر .. طيب حسابي معاك بعدين لما أشوفك ..

كامل: أرجوك يا أبني علشان خاطري بلاش مشاكل ويا أخوك.. ما تخلينيت أحس بالننب وأزعل من نفسي.

### مسمع (۲)

ربيع: فرصه ياواد يا ربيع وجت لحد عندك. الراجل كبير في السن ونظره على أده يعني مش هايدري باللي بيختفي من البيت كل شويه. النهارده أسرق قرشين من محفظته. بكره أسرق حته صيغه و لاحته موبيليا وبعده أسرق ساعة و لا منبه هو حد دريان. و تاله مش سائلين فيه ولوحد منهم جه يزوره يادوب كلمتين ويمشي. (موسيقي)

### مسمع (۷)

شاكر: شفت آدي آخرة مجايبك ياسي شكري.. الواد الشغال اللي أنت جايبــــه لباباسرق كل فلوسه وصيغة المرحومه ماما وهرب..

شكري: يعني أنا كنت هاأشم على ضمر أيدي يا سي شاكر أذا كان الواد ربيع حرامي ولا مش حرامي...

شيرين: ده من ستر ربنا أنه ما ضربش بابا بمطوه و لا سكينة لما قفشه و هو بيسرق..

شكري: بأقول لك أيه أنا مش فاضي لهرش المخ بتاعكم ده.. أتفضيل أنست وريني شطارتك وشوف له خدام غيره يكون على ضمانتك ومش حرامي..

شاكر: وأنا مالي أحمل نفسي المسئوليه ليه..

شكري: خلاص يبقى تحط لسانك جوا بقك وتسكت. (موسيقى)

### مسمع (۸)

محروس: أهدى يا كامل يا اخويا.. ربنا يقومها بالسلامة.

كامل: عايز أطمن على بنتي يا محروس نفسي أشيل أبنها بين أيدي وأحضنـــه وأبوسه.

محروس: زي ما يكون أول أحفادك..

كامل: كله ألا أبن شيرين.. ده أبن الغالية با محروس.. شيرين صحيـح هـي بنتي الوحيدة.. بس عندي بمليون راجل.. بارب كون معاهـا يـارب.. سهل و لادتها.. يارب أقف جنبها ساعة شدتها.

محروس: شوية ويبشروك بالخبر السعيد..

كامل: ماعرفش الولاد أتأخروا على ليه.. لازم حد منهم هابيجي ياخدني المستشفى عايز أطمن على بنتي يا ناس.. (موسيقى)

### مسمع (۹)

عليده: ألف مبروك يا شيرين.. ولد زي القمر.

شاكر: يتربى في عزكم يا شوقي ...

شوقي: متشكر يا باش مهندس عقبال لما تفرحوا بأولادكم وولاد ولادكم.

شيرين: أدوني الولد عايزه أشوفه وآخده في حضني.

شوقى: أتفضلى يا ستى أبنك.

شیرین: یاه.. الخالق الناطق بابا.. یا حبیبی یا بابا.. هو ماجاش معاکم لیه یـــا شاکر.. انت ماعدیتش علیه...؟ شاكر: في الحقيقة يا شيرين كنا مشغولين بيكي وغالباً شكري هايعدي يجيبــــه معاه و هو جاي.

شيرين: ده وحشني اوي.. نفسي أشوف تعبيرات وشه لما يشوف حفيده بين أيديه.

شاكر: أكيد الفرحة مش سيعاه دلوقتى .. طبعاً كله ألا أبن شيرين.

شوقى: ده أذا كان عرف أن شيرين ولدت من أساسه.

شاكر: مؤكد شكري ها يبلغه.. أطمنوا كله ها يبقى تمام..

شيرين: ياريت يا شاكر.. حبيبي يا بابا.. بقى لي كتير ما شـــفتهوش، الله! ده شكري جه.

شكري: ها نقول مبروك يا ست شيرين.. ولد و لا بنت؟

عايده: ولد زي القمر..

شيرين: بابا فين يا شكري.. ما جاش معاك ليه؟

شكري: بابا هو مش معاكم هذا .. ؟

شاكر: معانا.. ده أنا كنت فاكراك ها تمر عليه وتجيبه معاك وأنت جاي..

شكري: أزاي ده أنا اللي فاكر أنه معاكم من الصبح.. ما هو مش معقول بابا مايبقاش جنب شيرين وهي بتولد.. ده يوم المني بالنسبة له.

شيرين: بابا.. يا حبيبي يا بابا.. كلنا نسيناك وسبناك لوحدك.. وفي يوم زي ده (صوت رنين التليفون) شوف مين يا شوقي.

شوقي: ألو.. أيوه أنا.. مين أستاذ محروس.. أهلاً وسهلاً.. خير يــــا أســتاذ محروس أيه بتقول أيه.. أمتى ده حصل.. من ســـاعة.. أحنــا هــا.. نتصرف.. مع السلامة.

شكري: في أيه يا شوقي؟ في أيه أرجوك أنطق؟

شوقي: الوالد تعيشوا أنتوا..

شاكر: بابا .. از اي مش ممكن .. از اي ده حصل؟

شوقي: الظاهر: من كتر قلقه وخوفه على ولادة شيرين قلبه ما أستحملش.. شيرين: ببن.. يا حبيبي يا بابا.. عشت علشاننا ومت برضه علشاننا.

(موسیقی)

# حوادیت مصریة

# 

## (1 <u>80</u><u>mo</u>)

### (أصوات رواد مقهى)

صوت ١: شيش يك.. أخص.

صوت ٢: خسرت العشره يا حلو. تلعب غيرها؟

صوت القهوجي: وعندك واحد شاي كشري واتنين قهوة على الربحة وشيشـــة عجمي.

صوت الشحات: لله يا محسنين لله.. حسنة قليلة تمنع بلاوي كتيرة.

يس: بالوي.. وهي في بالري أكتر من كده.. لطفك يارب.

صدقي: خير يا عم يس يا أخويا النهاردة قاعد على القهوة لوحـــدك وشــكلك مضايق كده.

يس: مضايق وبس.. دي هاتجنني.. هاتطير برج من نافوخي يا صدقـــي يـــا خويا.

صدقي: مين دي و لامؤ اخذة.. الست أم مي حرمكم المصون؟

يس: لا من مي نفسها.. خلاص حطيتِ إيدي في الشق منها.

يس: قال إيه يا سيدي .. عايزة تفسخ خطوبتها .

صدقي: تاني؟

**يس**: دي رابع خطوبة تفسخها.. أودي وشي من الناس فين ياربي بس.

صدقي: وإيه السبب كفا الله الشر.. طبب ده حتى خطيبها جدع طيب ومايتعيبش..

يست: وأنا ما صدقت إنه جه لها عربس طيب وابن حلال ومستقبله كويس. صدقي: ويعني اللي قبله واللي قبله ما كانوا شبان زي الفل مايتعيبوش برضه. يست: طلعت فيهم القطط الفطسانة يا خويا.. ده بخيل يا بابا.. ده أناني يا بابا ده دمه تقيل يا بابا.

صدقي: طب والأستاذ أنور المحامي خطيبها الحالي عيبه إيه ولامؤاخذة. يست: قال إيه يا سيدي بتقول عيبه إنه شاب طموح بيدي الشغل وقت اكثر من

اللازم.. عيبه إنه عايز يرفع من مستواه ويبقى محامي مشهور.

صدقي: وده كلام برضه يا أبو مي.. ودي برضه عيوب يا راجل.. بالعكس دي حسنات تتحسب له مش تتحسب عليه ولامؤاخذة.. لا أسمح لي بقي بنتك دي بتتلكك.. أصلها مدلعة حبتين.. وماتز علش مني بالطريقة دي هاتميل بختها بإيديها.. ما تحاولوا تعقلوها يا ناس بدل ما يضيع مستقبلها على الفاضي والسنين بتجري وانت سيد العارفين.. عصفور في الأيد أحسن من عشرة على الشجرة..

يس: أتنبح صوتي معاها أنا وأمها.. يا بنتي ده عربس لقطه بلاش تطيريه من إيديكي.. يا بنتي الراجل شاريكي وبيحبك ومستقبله كويس..

### (مسمع)

ميّ: مش هاأتجوزه يعني مش هاأتجوزه..

الأم: ليه بس يابنتي ده الراجل بيحبك وشاريكي.

مي: بيحب نفسه وشغله بس.. ثم مافيش حد بيحب حد كــده لله فــي لله اكبــد طمعان فيّ.

الأم: مين قال كده بس يا بنتي.. ياستي طلعي الأفكار الغلط دي من نـافوخك وبطلى شك في عباد الله.

مي: عمايله وتصرفاته بتدل على انه مش بيحبني.. تقدري تقوليلي بيورينــــي وشه كام يوم في الأسبوع؟

الأم: مش اقل من تلات أربع أيام لو ماكانش مسافر وكل ما بيجي الحق يتقلل بيجي محمل هدايا بالشيء الفلاني..

مي: طيب ويقية الأيام؟

الأم: ما هو حسب ظروف شغله يا بنتي.. مسافر هنا.. مسافر هناك.. ما هــو شغل المحاماه كده والراجل يسافر لشغله مش مسافر يتفسح..

مي: وأنا أعرف منين يعنى كنت معاه وشفت بعيني؟

الأم: يا بنتي بطلي الشك اللي في طبعك ده.. أنور بيحبك بإخلاص.. ماتفرطيش فيه.. أنا أمك وأعرف مصلحتك اكتر منك.. صدقيني.

مي: لو بيحبني بصحيح زي ما بتقولي كان ييجي يشوفني كل يوم وكل ساعة ويبقى هايتجنن لو بعد عني لحظة.. لكن ده و لا على بالسه حاجسة غسير القضايا والمحاكم وبس.

### (مسمع۲)

أثور: مين قال كده يا عمي دي مي في قلبي وروحي .. أهم إنسانة عندي في الدنيا وأنا الود ودي أتجوزها وأعيش معاها تحت سقف واحد النهاردة قبل بكرة إزاي بس تظن غير كده وهي عارفة ومتأكدة أنها بأحبها أد إيه .. ده أنا بأموت نفسي في الشغل علشان أحوش وأقدر أخلص تجهيز الشقة وأحقق لها كل اللي نفسها فيه ..

يسي: عارف بابني عارف.. بس تعمل إيه في مخها الناشف ودلعها.. أسمع يا أنور يا ابني أنا شايف إن مي محتاجة شوية أهتمام أكتر منك.. معلسش أنا زي والدك وبأحبك زي مي وأكتر..

أثور: طبعاً با عمي.. وأنا بأعتبر حضرتك في مقام المرحـــوم بابــا وأكــنر صدقني.

يس: وعلشان كده لازم تاخد بنصبيحتي وتيجي على نفسك حبتين.

أثور: أيوه.. بس إزاي يا عمي؟

يس: خليك جنبها اليومين دول.. أظهر لها شوية أهتمام أكتر.. فهمها إن شغلك ومصالحك مش بيتعارضوا أبداً مع حبك وتمسكك بيها وإنك بتعمل كدده علشان توفر لها الحياة الكريمة المريحة اللي تستحقها.

### (موسیقی)

### (کعمسمع)

أتور: صدقيني يا مي.. لنتي عندي أغلى من كل كنوز الدنيا ومستحيل أي حاجة تشغلني عنك مهما كانت وكل ده علشان باحبك وسعادتي كلها جنبك.

مي: يا سلام.. طب وسفرك الكتير؟

أثور: مضطر يا ميّ.. ظروف شغلي كده.. وبعدين دي مصالح ناس وحقوق بأدافع عنها.. هو ده عملي وواجبي كمحامي. مي: ماليش دعوه مش عايز اك تسافر تاني وتسيبني.. رجلي على رجلك. أتور: أيوه يا مي بس أنا بأسافر لشـــغل.. بأخلصــه وأرجــع علــى طــول والموضوع ده هايكون صعب عليكي..

الأم: خلاص بقى يا أنور.. بناقص الكام قضيه دول يا سيدي اللي بيضط وك تسافر علشان خاطر مي..

مي: شفتي يا ماما.. مش عايز يضحي بحاجة تافهة زي دي علشان يرضيني. أتور: يا مي ده أنا أضحى بعمري كله علشانك.. ولا تزعلي.

الأم: شفتي يا ميّ أنور بيعزك إزاي.. فين أبوكي بيجي يسمع ويشوف يا حسره علىّ..

أنور: وعلشان ماتزعليش يا ستي.. أنا هاأسلم القضايا دي لواحد من زمايلي في المكتب هو اللي يباشرهم وأنا كفاية على القضايا اللي هنا مبسوطة بقه.

### (مسمع0) (صوت زغروده)

صدقي: ألف مبروك يا عم يسى.. وعقبال البكاري يا سيدي.

يست: الله يبارك فيك يا صدقى .. عقبال و لادك.

الأم: مبروك يا مي يا حبيبتي.. ربنا يهدي سرك يا بنتي.. مبروك يا أنور يا ابني. أنور: مرسى يا طنط.

الأم: مش هاأوصيك على مي.

أنور: مي في عيني وقلبي يا طنط.

يس: يللا بقى يا ولاد أتكلوا على الله.. تسافروا وترجعوا لنا بألف سلامة شهر عسل مبارك إنشاء الله..

الأم: أبقى اتصلى بئ يا مي وطمنيني عليكي يا بنتي.

الأب: يا ستي ارحميهم شوية.. خليهم يقضوا شهر عسل مــن غــير إزعــاج سافروا يا ولاد وأنبسطوا ونشوفكم لما ترجعوا بالسلامة.

### (موسیقی)

أتور: أنا أسعد إنسان في الدنيا يامي.

مى: وأنا كمان يا أنور.

أنور: معقولة.. خلاص أتجوزنا هانعيش مع بعض تحت سقف واحد طول العمر.

مي: بتحبني يا أنور؟

أتور: نعم ياختى .. إيه السؤال البايخ ده؟

مي: بايخ.. أخص عليك.

أنور: طبعاً.. ده أنا مش بأحبك وبس.. ده أنا بأموت فيكي.. ما أنتي عارفة.

مي: عارفة .. بس بأحب أسمعها منك دايماً.

أتور: هاتسمعيها مني صبح وضهر وليل.. هاأفضل أقول لك بأحبك.. باحبك لحد ماتزهقي..

مي: لما أشوف. أصلي كل الرجالة بيقولوها كتير قبل الجواز وبعدين ينسوا ما بيخرجش من بقهم غير الشخط والنطر والكلام السخيف والأوامر.

أتور: كل الرجالة كوم وأنا كوم لوحدي يا حبيبتي.

مي: المية تكدب الغطاس..

### (موسیقی)

الجرسون: تحبوا تشربوا حاجة يا بيه؟

أتور: تشربي إيه يا حبيبتي.

مي: أخد عصير ليمون.

أثور: أتتين عصبير ليمون من فضلك.

الجرسون: تحت أمرك يا بيه.

أثور: عارفة با مي .. من زمان وأنا كان نفسي لما أتجوز أقضي شهر العسل في الفندق ده..

مي: أشمعنى الفندق ده بالذات.. لازم لك فيه ذكريات حلوة.. مش كده.

أتور: أبداً بس جيته مرة زمان وعجبني.

مي: وجيته مع مين بقى ياسي أنور؟

أنور: مع واحد صاحبي.

مي: ولا واحدة صاحبتك؟ ولا يمكن خطيبتك اللي قبلي؟

أنور: ده أحنا بنغير بقى.

مي: أكيد مع بنت خالتك اللي كنت خاطبها قبلي وأتفقتوا لما تتجوزوا تيجـــوا تقضوا شهر العسل هنا مش كده؟

أنور: لا مش كده يا مي.

مي: أنا متأكدة من كده.. وبدل ما تكون معاك بنت خالتك بقيت أنا اللي معاك مش فارق..

أنور: يا مي أرجوكي وطي صوتك. الناس حوالينا.

مي: أنا طالعة أنام.

أنور: أستني بس يا مي .. ليه كل ده؟

الجرسون: الليمون يا بيه.

(موسیقی)

### (Veama)

مي: مين اللي سلمت عليها دي وأنت في البسين.

أتور: دي كانت زبونة عندنا في المكتب.. كان ليها قضية ميراث.

مي: زبونة ولا واحدة صاحبتك؟

أتور: وبعدين يا ميّ مش معقول كده.. أرحميني بقي.

مي: طب ماعرفتنيش عليها ليه؟

أتور: علشان قابلتها جوا البسين زي ما شفتي بنفسك وأنتي كنتي فوق تحــــت الشمسية.

مي: وعرفت أنك أتجوزت وجاي تقضى شهر العسل؟

أنور: ماجتش فرصة أقول لها.. ده كان يادوبك سلام وبس.

مى: ولا خفت تقول لها..

أتور: خفت ليه وهو بيني وبينها إيه علشان أخاف أو ماخـــافش. تكونــش دي اللي كانت بتيجي معاك هنا زمان.

مي: ويمكن تكون جاية وراك هنا مخصوص علشان تتقابلوا من ورايا.

أتور: صدقيني يا مي أنا قابلتها بالصدفة ماعرفش إنها جايه هنا.. ونازله في نفس الفندق.

فؤاد: مساء الخير.

أتور: مساء النور يافندم.

فؤاد: الأستاذ أنور المحامى مش كده؟

أنور: أيوه يافندم.

فؤاد: أهلا وسهلاً.. وأكيد حضرتها المدام.

أنور: أيوه.

فؤاد: واضبح انكم عرسان جداد في شهر العسل مش كده؟

**أنور**: أيوه.

فؤاد: ألف مبروك.. أسف ماعرفتكوش بنفسي.. أنا المـــهندس فــؤاد شــاكر وبرضه عربس جديد زيكم.

أتور: ألف مبروك تشرفنا.

مي: المدام؟

فؤاد: مدام هدى اللي قابلتك الصبح في البسين.

أنور: أه أهلاً وسهلا فرصة سعيدة.

فؤاد: أحنا يادوبك متجوزين من أسبوع وجينا نقعد هنـــا كـــام يـــوم وبعديـــن هانهاجر أستراليا.

أنور: تهاجروا.. إنشاء الله ربنا يوفقكم.. تحياتنا للمدام.

فؤاد: منشكر Happy Honey Moon عن اذنكم.

أنور: إيه مالك.. سكتى ليه.. مكسوفة؟

مي: وها أتكسف من إيه؟

أتور: من اللي سمعتبه وعرفتي منه اني مظلوم وكل اللي في دماغك أوهام في أوهام.

مي: أنا بأعمل كده يا أنور علشان بأحبك وبأغير عليك.

أتور: فرق كبير يا مي بين الحب وبين الغيرة المدمرة.. الغيرة اللــــي تضـــر صاحبها وتضر اللي حواليه..

مي: مافيش حب من غير غيرة يا أنور.

أثور: جميل أن الواحد يشعر بحب الطرف التاني له وغيرته وخوفه عليه.

مى: شفت أديك قلتها بعضمة لسانك.

أتور: بس الغيرة مش معناها الدمار.. مش معناها إننا ندمر الشخص اللي بنحبه بحجة إننا بنغير عليه وندمر جنبه حاجات حلوة وأوقات جميلة في حياتنا بحجة الغيرة زي مابتعملي.. مش معناها أننا نشوه صورة إنسان ونشكك في حبه وإخلاصه بحجة الغيرة مش معناها أن أحنا ندمر مستقبله وسمعته بحجة الغيرة ري مابتحاولي معايا.

مي: ده إيه الكلام الكبير ده.. طبعاً ما أنت محامى وشغلتك كده.

أتور: علشان أريحك وأزيل الشك اللي جواكي من ناحيتي أستغنيت عن مجموعة قضايا مهمة في حياتي كانت هاترفعني لفوق وتكبر أسمي في عالم المحاماه لكن قلت مش مهم علشان خاطر مي أضحي وبكره لمانتجوز هاتعرف مدى حبي ليها وإخلاصي وصدقي معاها وبدل ماتقف في طريقي وتعطلني بشكوكها وظنونها هاتشجعني وتقويني وتدفعني للنجاح بالحب والثقة. لكن يا خسارة واضح أن حساباتي كانت غلط. لأن الظن السيء والشك المدمر سيطروا عليكي وملوا دماغك بالأوهام والظنون وكله بحجة إنك بتحبيني. مش هي دي المحبة الحقيقيسة يا مي.. مش هي دي المحبة الحقيقيسة يا

### (موسیقی)

# حوادیت مصریة

# الكالعالية المحالية ا

### (مسمع ۱)

الحاجب: محكمه..

القاضي: بعد الاضطلاع على المستندات وبعد سماع شهادة الشهود في القضية رقم ٧٨٩٤. حكمت المحكمة حضورياً على المتهم بالسبن خمسة عشر عاماً مع الشغل والنفاذ.. رفعت الجلسة..

رجل ١: عملتها يا قاضى..

رجل ٢: رغم كل التهديدات اللي وصلته.

رجل ٣: والرشوة الكبيرة اللي عرضناها عليه..

رجل ١: دماغه ناشفه أوي يا جماعه..

رجل ٢: نكسرها لوحتى كانت صخر..

رجل ٣: واضح انه ما بيتهددش..

رجل ١: هايكون أحسن من مين يعني.. ما كل القضاه اللي قبلـــه اشــتريناهم بفلوسنا وحطيناهم تحت باطنا..

رجل ۲: بس ده مش زیهم..

رجل۳: ده ضمیره و اجعه حبتین.

رجل ۱: نریحه منه..

رجل ٢: صوت الحق والعدل جواه عالى اوي..

رجل ٣: نوطيه و لا حتى نسكته خالص..

رجل ١: تفتكر .. ده الحكم خلاص صدر ..

رجل ٢: لا.. لسا في استثناف ومعارضه.

(موسیقی)

### (مسمع۲)

### (صوت تليفون)

هاله: ألو.. أيوه موجود يافندم.. حضرتك مين.. هو عـــارف.. طـــب دقيقــة واحده.. بابى تليفون علشان حضرتك.

القاضى: ألو .. أيوه أنا .. أي خدمه ..

صوت رجل ٣: لا العفو.. ده احنا اللي تحت أمر سيادتك.. أنت تاشر واحنا ننفذ فوراً.. ياسيدة المستشار.

القاضى: مين اللي بيتكلم..

رجل ٣: مش مهم .. اعتبرني فاعل خير .. على الأقل لحد مانتفاهم ..

القاضي: نتفاهم في ايه يا أستاذ.. بص لو ماقلتش فوراً أنت مين وعايز ايه أنا هاأقفل السكة..

رجل ٣: اهدى شوية يا حضرة للقاضي.. الكلام أخد وعطا وأنت سيد المفهوميه. القاضي: اسمع يا حضره أنا مش فاضى للكلام الفارغ ده.. أتفضل اقفل السكة

بدل ما أقفلها في وشك..

رجل ٣: قلت لسيادتك أهدى شويه علشان نعرف نتفاهم.

القاضي: نتفاهم في إيه يا أستاذ.

رجل ٣: في الحكم اللي اصدرته.

القاضي: حكم إيه؟

رجل ٣: ال ١٥ سنة أشغال شاقة.

القاضى: الحكم صدر خلاص وملف القضية أتقفل..

رجل ٣: از اي ده لسا في استثناف ومعارضه.

القاضي: الحكم بالنسبة لي نهائي ومستحيل أتراجع فيه. م

رجل ٣: مش يمكن تكون غلطان..

القاضى: نعم ياحضره.

رجل ٣: ويكون المتهم برئ.

القاضي: مستحيل أصدر حكم مش متأكد من صحته.. دي مسئولية يا حضره إصدار الأحكام ده مش لعبه في شهود وإثباتات وبراهين وأدله قاطعــه

وفوق كل ده في رب هايحاسبني على أحكامي وفــــي شــرف مهنـــه أقسمت أنى أحترمه.

رجل ٣: ماتكبرش الموضوع أزيد من اللازم.. كل اللي بتقوله ده على عنينــــــا وعلى رأسنا من فوق بس كل حكم وله ظروفه و لا إيه.

القاضي: مش فاهم..

رجل ٣: يعني المتهم مش شخص عادي.

القاضى: عارف انه كان رئيس مجلس إدارة أد الدنيا..

رجل ٣: مش كده وبس..

القاضي: وانه جمع ثروته الكبيرة من الاختلاس والرشوة والغش التجاري.

رجل ٣: مش كده وبس يا قاضىي.. في حاجه أكثر من كده يمكن تكون غافلــــة على على سيادتك وماتعرفهاش..

القاضي: مايهمنيش أعرف أكثر من اللي عرفته وأصدرت الحكم بناءاً عليه الرجل ٣: إزاي بقى مايهمكش. حتى لو عرفت أن المتهم صديق شخصي لناس مهمين في البلد ليهم مصالح مع بعض..

القاضى: ولو.. مايهمنيش.

رجل٣: ماتبقاش دماغك ناشفه امال. فكر في مصلحتك يابن النساس الطيبين و وسيبك من المثاليات الفارغه اللي انت عايش فيها واللي ممكن في يوم من الأيام توديك ورا الشمس..

القاضي: اقفل السكة بسرعه والا هاأقفلها أنا.. أنا وراكم والزمن طويل (يغلق سماعه التليفون) قله حيا.

هالة: في إيه يا بابي.. مالك..

القاضى: ناس ماعادش عندها لازمه ولا ضمير (يغلق باب المكتب).

الزوجة: في ايه يا هاله.. بابا ماله..

هالة: الظاهر حد ضبايقه في التليفون.

الزوجة: ضايقه ولا بيهدده.. ما هي التهديدات ورانا ورانا من يوم ما أتعين قاضي في البلد دي..

**هالة:** علشان بيحكم بالعدل.

الزوجة: في زمن أعوج أوضاعه مقلوبة.

هالة: بس ميزان العدل هايفضل مضبوط عمره ما ها يخل طول ما في واحد زي بابي..

الزوجة: بس هما الأكثر والأقوى..

هالة: هما مين يا مامى؟

الزوجه: الناس الكبار اللي مصالحهم بتتعارض مع مصالح أبوكي.

هالة: باباى مالوش مصالح غير أن العدل باخد مجراه والمجرم يأخد جـــزاءه ويحمى البلد من فسادهم.

الزوجة: وهما مصالحهم يسرقوا وينهبوا ويستغلوا معانساه النساس الغلابسة ويجمعوا من وراهم الملابين بكل الطرق الغير شريفة.

### (موسیقی)

### (مسمع ۲)

رجل ٣: وبعدين يا رجاله.. أخرتها إيه في القاضي ده؟

رجل ٢: الموضوع ما عادش ينسكت عليه أكثر من كده...

رجل ٣: ببقى مافيش قدامنا غير حل واحد..

رجل ١: ايه هو؟

رجل ٣: نخلص عليه النهارده قبل بكره..

رجل ٢: عايز تودينا في داهيه.. ده قاضي.. حد يقتل قاضي.. دي سمعته ماليه البلد.

رجل ٣: ومصالحنا.. ومصالح المسئولين اللي ورانا.

رجل ١: النهارده سجن والعد .. بكره يسجن التاني والثالث ..

رجل ٣: ويهز صورتنا قدام النجار والأهالي..

رجل ٢: وما حدش هايخاف مننا ويعمل لنا حساب..

رجل ١: والا تاوات اللي كنا بناخدها بالساهل من التجار والاغنيا مش هـانقدر ناخدها غير بالعافيه وان خدناها كمان..

رجل ٢: ولا الأسعار اللي بنرفعها بمزاجنا على النجار اللي برضـــه بيشــنروا مننا بالسعر اللي نحدده.

رجل ٣: يعنى هيبنتا راحت في النراب يا رجاله.

رجل ١: واللي بنيناه في سنين جاي حضرته يهده في أيام.

رجل ٣: صدقتوا بقى اننا لازم نخلص منه..

رجل ٢: ماتفكروا في سكه تانيه يا اخونا. ده برضه أسمه قاضى.. راجل لـــه وضعه عدم المؤاخذة.

#### (موسیقی)

#### (کسمعع)

مسئول: إيه اللي بيحصل ده يا رجاله.. الشيك بتاعي ماوصلش في ميعاده ليه زي كل شهر.. احنا بنهزر

رجل ٣: مش في أيدينا يا باشا.

مسئول: أمال في ايدين مين؟

رجل ٢: السوق نايم اليومين دول والحال واقف حبتين..

مسئول: يا سلام.. من امتى النغمه دي بقى..

رجل ٣: من ساعه ما أتعين القاضى الجديد في البلد.

رجل ٢: البيه القاضي الجديد قارش ملحننا يا باشا.. ولا بدلنا في الدره مسئني لنا أي غلطه. واللي هايقع تحت أيديه مش حايرحمه.

مسئول: بس بلاش كلام خايب من امتى في حد بيقدر يهددكم.. انتوا ناسبيين مين اللي بيحميكم وواقف وراكم. تقبوا وتغطسوا. الشيك يوصلي فيي فلرف يومين... فاهمين.

رجل ٣: علشان كده لجأنا لك يا باشا.. انقذنا قبل الفاس ما تقسع فسي السراس وتروح في الكازوزه.

مسئول: فأس ايه وراس ايه.. ايه الكلام العجيب اللي بأسمعه منكم ده.

رجل٣: الراجل القاضى عمال يحفر ورانا.. مش ناوي بجيبها لــــبر.. قضيــــه رئيس مجلس الادارة وراها بلاوي متلتله وانت سيد العارفين يا باشا..

رجل ٢: عايز يجر رجلينا واحد ورا التاني.. يصطاننا زي العصافير.

رجل٣: ومين عارف.. مش يمكن يوصل لسيادتك والناس الكبار اللي وراك.

المسئول: وساعتها هاآدمره.. هاآحرمه.. هي حصلت حد يهدد مصالحنا احنا كبار البلد أنا هاأعرف شغلي معاه. القاضي المتفرعن ده.. لما اشوف إحنا و لا هو..

#### (موسیقی)

#### (مسمع٥)

الزوجه: شفت أخره مشيك ورا الحق والعدل وصلوك لفين.. أديك متهدد تتنقل لبلد في اخر الدنيا.. يعني هاينفوك وينفونا معاك لو مانفذتش طلباتهم وغيرت الحكم لصالحهم.

هاله: يا مامي أرجوكي كفايه... بابي مش ناقص حرام عليكي.

القاضي: سيبيها يا هاله تفضفض باللي جواها.. من حقها.

الزوجه: ياما حذرتك بلاش تمشي ضد الريح.. خليك مع الكبار تسلم.. وانست ياخويا مش أحسن من غيرك اللي أكبر منك ماشي على هو اهم.. وبينفذ كل طلباتهم وبستفيد وعلى رأي المثل يابخت من نفع وأستنفع والفلوس ياما غيرت نفوس.

القاضي: نفوس بس.. ده نفوس واخلاق وقيم وضماير وزمم.. عندك حق يــــا مدام.. أنا كنت غلطان ماحسبتهاش صبح..

**هاله:** لا يا بابي.. أو عى تضعف و لا إيمانك بنفسك يتهز.. أو عى تتخلى عــن العدل والحق.. أو عى كلام ماما يهز إيمانك.

الزوجه: بس يا بنت بلاش كلام خايب إلا يودي و لا يجيب خلينا بقه نقب على وش الدنيا...

القاضي: ها لسمع كلامهم وكلامك.. وادخل تحت باطهم.. وعلى رأيك أنا مش أجدع من غيري..

#### (موسیقی)

#### (مسمع۲)

مسئول ٢: برافو عليك عين العقل يا سياده القاضي.. والناس هايقدروا موقفك الشريف ده.. ومجهزين لك هدية عظيمه بعد حكم البراءه انشاء الله عن اننك لما أتصل بيهم وأفرحهم بالأخبار الحلوه دي.

#### (موسیقی)

رجل ٣: صديقنا سياده القاضى الرجل العظيم يا ألف مرحب..

رجل ٢: أهلاً بيك بين أهلك وأصدقائك المخلصين. ياسيادة جنساب المستشسار الكبير قوي.

رجل ١: سعدنا جداً بانضمامك لينا يا سيادة القاضى الهمام.

رجل ٣: نوعدك اننا نحقق لك كل أحلامك.أحلام سيادتك أو امر.

رجل ٢: هانوفر لك كل الحمايه لك والأسرتك.

رجل ١: هَانَتُرقَى وهاتكبر يوم بعد يوم.. عارف يمكن تمسك وزارة العدل فـــي التغيير الوزاري اللي جاي..

القاضى: وزير العدل حته واحده.

رجل٣: ورئيس وزراء لو حبيت.. البلد في جيبنا يا سياده القاضي. بس أنـــت تأمر وإحنا ننفذ.

رجل ٢: كل المسئولين اللي في البلد تحت باطنا. كرشهم. مليانة من خيرنا. القاضي: والمقابل؟

رجل ٣: بنعمل اللي على مزاجنا.. نسرق.. ننهب.. نقنل مايهمناش (ضحك) (موسيقى)

#### (کسمع)

هالة: مامى .. مامى ..

الزوجة: نعم يا هاله.. في حاجه.

هالة: قريتي اللي مكتوب في الجرايد النهارده عن بابا..

الزوجة: قريت.. والتليفونات مابطلتش من الصبح كله بيسأل على أبوكي.

هالة: بابا طلب من كل الصحفيين والمسئولين في البلد حضور جلسه الحكــــم النهارده.

الزوجة: ما خلاص يا هاله يابنتي أبوكي بقى في العلالي بقـــى تبــع الكبــار والقضية دي هاتنطقه لفوق لحد الكبار أوي ويمكن يبقى نائب عــام و لا وزير عدل هو قال لى كده..

هالة: وايه النمن اللي دفعه.. شرفه وسمعته وضميره.. مش كده..

الزوجة: يا شيخه بلاش أنعره فاضيه هو عمره كان يطم بالمناصب دي.. أنا اللي نصحته وعدلت دماغه. وعلى رأي المثل من جاور السعيد يسعد.

#### (مسمع۸)

رجل ١: اطمن يا باشا .. براءه انشاء الله.

رجل ٢: كله تمام .. القاضى بقى بتاعنا خلاص .. في جبنا الصغير ..

رجل ٣: اشتريناه زي الباقيين.. ماخدش في ايدنا غلوه..

الحاجب: محكمه..

القاضي: باسم هيئة المحكمة الموقرة بأرحب بكل رجل الصحافة والسياسة وأعضاء المجالس الشعبية في البلاد لحضور هذه الجلسة العلنية لسماع الحكم النهائي في القضية رقم ٢٨٩٤ لكن اسمحوا لي أولاً أسمعكم تسجيل لبعض الاعترافات التي تهمكم جميعاً وبعدها يصدر الحكم العادل.

## (تسجيل للحوار السابق بين القاضي والمتهمين) (موسيقى)

رجل ٣: مصيبه..

رجل ۲: رحنا في داهيه..

رجل ١: رحنا في حديد..

القاضي: وبناءاً عليه وبعد سماع الاعترافات.. أترك لكم وللشـــعب اصــدار حكمه العادل على هؤلاء المفسدين ليسود العدل والحق في المجتمع.

### حواديت مصرية

# 

#### (مسمع ۱) (صوت شاب عنده زغطه)

الأمير: وبعدين يا دكتور .. الزغطه مش عايزه تسيب إبننا الأمير..

الدكتور: دي حاجة عجيبة يا مولاي. حاجة عمرها ما مرت على قبل كده..

الأمير: نعم. نعم .. يعني إيه. مش ها تعرف تعالج إبني الأمير يا كبير الأمير الأطباء..

الدكتور: أعذرني يا مولاي. الزُغطه مرض مــش مــن تخصصـــي .. لازم تشوف له دكتور زُغطه مخصوص.

الأمير: وده أجيبه منين؟!

الدكتور: ايعت الإخوانك .. حكام وأمراء السدول .. تشسوف عندهـم طبيـب أخصائى زُغطه..

الأمير: وأنا هاسيب إيني بالشكل ده لحد ما ألاقي دكتور الزُغطه بتاعك ده؟ الدكتور: ما فيش في إيدينا حاجة نعملها .. ربنا يلطف به..

الأمير: يا وزير النحس..

الوزير: سمعاً وطاعة يا مولاي ..

الأمير: إعلن في كل البلاد إن اللي يقدر يشفي ابني الأمير فنكوش من مرضه له عندي مكافأه كبيرة..

(موسیقی)

#### مسمع (۲)

صوت المنادي: يا أهل الخير والثواب .. مولانا أمير البلاد بيعلن عن مكافأة كبيرة للي يقدم خدمة عظيمة ويعالج ابنه الأمير فنكوش من مرضال المنحوس والمكافأة لا تقدر بمال.. لما الأمير يبقى عال العال يأهل الخير والثواب...

#### مسمع (۳)

حارس: مولاي: - في واحد من عامة الشُّعَب طالب يقابل سموك.. الأمير: قول له مش فاضى .. يفوت علينا بكره... حارس: بس ده جاي في أمر هام يخصك يا مو لاي . .

الأمير: تلاقيه جاي عايز له شقة في المساكن الشعبية و لا عشان أعمـــل لــه واسطه وأدخل ابنه المدرسة قبل السن القانونية..

حارس: لا يا مولاي .. ده بيقول إنه يقدر يعالج سمو الأمير ابن سموك..

الأمير: ده أكيد دكتور الزُغطه .. هو فين .. دخله بسرعة.. مستني إيه يـابني آدم.

حارس: حاضر يا مولاي . أتفضل يا دكتور زُعطه.

الشخص: العفو يابني .. أنا لا دكتور و لا حاجة .. السلام لمو لاي العظيم..

الأمير: مش وقته .. فين شنطتك؟!

الشخص: شنطتي؟!

الأمير: اللي فيها السماعة وجهاز الضغط والذي منه.

الشخص: بس أنا يا مولاي مش دكتور.

الأمير: مش دكتور إزاي؟ أمال كدبت على الحراس وقلت إنك جاي تعالج إبننا سمو الأمير ليه..؟!

الشخص: أنا ما كدبتش . أنا قلت الصدق.

الأمير: مش بتقول إنك مش دكتور..

الشخص: يا مولاي.. إسأل مجرب ولا تسال طبيب. وده مرض بسيط وعلاجه سهل..

الأمير: إزاي .. ده أعظم أطباء الدولة فشلوا في علاجه..

الشخص: لكن أنا بإذن الله ها أقدر..

الأمير: لما نشوف .. بس خلي بالك لو فشلت ها يكون مصيرك الســــجن زي الله قبلك مفهوم...

الشخص: مفهوم يا مولاي .. تسمح لى أشوف الأمير المريض..

الأمير: ما فيش مانع .. يا زعبوله .. أنت يا زعبوله ..

زعبوله: بتزعق ليه .. هو أنا أطرش .. نعم يا سيدي عايز إيه..

الأمير: عايز ايه!! حسابك معابا بعدين يا زعبوله القله .. خد السيد...

الشخص: عبد الله..

الأمير: دخله عند سمو الأمير الصنغير .. وأنا ها استنى هنا ما أنـــا عــارف النتيجة آهو تضييع وقت على الفاضي.. شغل يابني الأتاري ألعب بيــه شويه.

#### مسمع (ک) (صوت زغطة الأمير)

الشخص: مساء الخير يا سمو الأمير.

الأمير الصغير: مس .. اء .. ال .. خير.

الشخص: إطمن إن شاء الله هاتبقى تمام..

الأمير الصغير: تما .. م ..م .. إز .. ز .. ا .. ي..؟

الشخص: يا أخ زعبوله .. من فضلك سيبنا لوحدنا..

زعبوله: مقدرش .. وأنا أعرفك منين مش يمكن تطلع إرهابي و لا حرامي..

الأمير الصغير: سيـ .. بـ .. نا .. يا .. ز .. عـ .. بو .. له..

زعبوله: أمري لله .. لما نشوف آخرتها إيه؟!! (صوت غلق الباب)

الشخص: تسمح لي يا سمو الأمير أطفى نور الأوضه..

الأمير الصغير: أ .. نا .. أ .. نا .. ب .. أ .. خا .. ف.

الشخص: كويس أوي .. أنا عايزك تخاف على الآخر.

الأمير الصغير: بس .. مش

الشخص: الدنيا دلوقتي عتمه كحل .. صبح.

الأمير الصغير: صد .. صد .. ح..

الشخص: عال .. لو أنت شاطر بقى .. حاول تمسكني في الضلمة..

الأمير الصغير: بس.. بـ.. س..

الشخص: يللا دي لعبة جميلة .. لو جدع تقول أنا فين .. أنا فين .. بخ. بخ. الأمير الصغير: يا ماما.. العفريت .. إلحقوني .. إلحقوني حرامي .. حرامي..

الشخص: حمد الله بسلامتك با سمو الأمير.

زعبوله: في إيه .. مين اللي بيصرخ .. إنت عملت فيه إيه يا راجل أنت..

الشخص: شفيته..

الأمير الصغير: زعبوله .. بابا فين ..

زعبوله: الله .. ده صحيح .. يا حلاوه يا جدعان .. الأمير بيتكلم مـــن غـــير زغطه.

> الحق يا مولاي اينك الأمير بيتكلم من غير زغطه. (موسيقي)

#### مسمع (٥)

الأمير: أنت عملت معجزه وشفيت ابنى الأمير.

الشخص: كله بإذن الله يا مولاي. هو الشافي المعافى..

الأمير: أنت عبقري. أنت فلته. أنت لازم تكون معايا على طول طبيب القصدو الخاص.

الشخص: كلنا خدامين سموك.

الأمير: أنا لازم أكافئك مكافأة عظيمة على اللي أنت عملته.. خلاص لقيتـــها. أنت هاتكون حكيم المدينة وصاحب الرأي والمشوره في البلاد.

الشخص: بس ده شرف عظيم ما إستحقهوش يا مولاي.

الأمير: يا زعبوله.. نادي بسرعة على الوزير النحس.

الوزير: أنا موجود آهه وتحت أمرك.

الأمير: اسمع يا وزير النحس..

الشخص: (يضحك) وزير النحس!!!..

الأمير: إعلن في القصر وفي البلاد . إنه من اليوم تم تعبين السيد عبد الله...

كبير حكماء البلاد وصاحب الرأي والمشورة فيها وإن أمر مطاع زيي تمام وجهزوا له جناح في قصرنا.. علشان يعيش في وسطنا وياكل أكلنا ويشرب شربنا ويلبس لبسنا.

الوزير: أيوه.. بس ده..

الأمير: إيه عندك مانع با وزير النحس..

الوزير (النفسه): بقى حتة الراجل الجربوع ده يبقى هو الكل في الكل .. ومين عارف مش يمكن يتعين رئيس الوزراء وأبقى أنا بكل سلطوتي وسلطاني مرؤوس له .. لا أنا الإزم أطيره قبل ما يطيرني ويكشف ملاعيبي وإستغلالي المنصبي .. أما أشوف أنا ولا أنت يا سي عبد الله.. بس الذكاء إني آخده الأول تحت باطي وأدي له الأمان من ناحيتي وبعدها أضرب ضربتي..

الأمير: إيه يا وزير النحس سرحت في إيه..

الوزير: أبداً يا مولاي .. ده من فرحتي بالسيد عبد الله حكيم الحكماء .. يا ألف مبروك وياريت يسمح لي مولاي بدعوة سموه والسيد عبد الله على الغدا عندي في قصري المتواضع النهاردة إحتفالاً بهذه المناسبة السعيدة..

الأمير: لا أنا مش فاضى .. روح أنت يا عبد الله وما نتساش ميعادنا بعـــد الغــدا علشان أخد رأيك في شوية أمور هامة في شئون البلاد والعباد.. سي يو. (موسيقى)

#### مسمع (٦)

عبد الله : الله ما الله ما فيش ألذ وأطعم وأشهى من كده..

الوزير: معقوله .. يعنى عجبك الأكل يا حكيم الحكماء..

عبد الله: أمال .. مافيش أحلى من كده .. ده ألذ أكل أكلته في حياتي..

الوزير: روح يا شيخ ربنا يجبر بخاطرك..

عبد الله: صدقنى كل حاجة أكلتها ألذ من التانية..

الوزير: أصلى الموضوع ده فيه سر..

عبد الله: سر .. سر إيه .. معاليك..

الوزير: أصلى كل أكلنا لازم نطبخه بالتوم..

**عبد الله: التوم!!** 

الوزير: هو اللي بيدي للأكل طعم وشهية ونكهة لنيذة..

عبد الله: فعلاً .. فعلاً..

الوزير: بس يا خسارة .. مولانا الأمير ما بيكرهش حاجة في الدنيا أد التـــوم وريحة التوم علشان كده هو رفض بيجي يتغدى معانا..

عبد الله: عجيبة أوي الحكاية دي..

الوزير: وما بيكرهش في الدنيا إلا اللي يبقى واكل توم وريحة بقه توم.

عبد الله: يا نهار مش فايت ده أنا..

الوزير: عارف.. وعارف إن عندك ميعاد بعد الغدا مع سمو الأمير.

عبد الله: طب وبعدين.

الوزير: بلاش تروح. سيبك منه.

عبد الله: إزاي .. ده ميعاد مهم.

الوزير: وهاتعمل إيه..؟!

عبد الله: مش عارف .. دي ربحة التوم شديدة أوي في بقي..

الوزير: يبقى مافيش غير إنك تحاول تخبي بقك كل ماتقرب من سمو الأمــير.. وعلى رأي المثل إن بليتم فأستترو.

#### مسمع (۷)

الوزير: مولاي، مولاي المعظم .. مصيبه يا مولاي .. مصيبة كبيرة وحطت على راس سموك..

الأمير: في إيه يا وزير النحس .. إنطق بسرعة مصيبة إيه..؟!

الوزير: إخص .. إخص وستين إخص على كده .. ده برضه آخرة المعـــروف اللي عملته فيه

الأمير: قصدك على مين يا وزير؟!

الوزير: اللي سموك فتحت له قلبك وبيتك وإئتمنته على أسرارك وعينته حكيم الحكماء وصاحب الرأي والمشورة في البلاد .. البعيد طلع قليل الأصل..

الأمير: عيب تقول كده على الرجل العظيم الطيب ده...

الوزير: عظيم وطيب .. ده سموك اللي طيب وساذج وعلى نياتك يا مولاي..

الأمير: بتقول إيه؟!

الوزير: السيد الحكيم بيقول لكل واحد يقابله من أفراد الشعب إن والامؤاخذه إن ريحة سموك وحشة..

الأمير: قصده ريحة البارفان بتاعي..؟!

الوزير: لأريحة جسمك.. وبالذات ريحة بقك ولا مؤاخذه يــــا مـــولاي.. زي ريحة القبر تمام.

الأمير: ريحة القبر.. إنت بتخرف بتقول إيه يا وزير الشؤم أنت.

الوزير: مش أنا اللي بأقول ده هو يا مولاي، حكيم سموك وصـــاحب الــرأي والمشورة في البلاد.

الأمير: اللي بأسمعه ده مستحيل.. أنا مش مصدق وداني.. طب ليه يقول علي ً كده.

الوزير: عايز يشوه سمعة سموك عند شعبك ... عايز يقرفهم منك عاشان يبعدوا عنك وما يقربوش ناحيتك .. عليز يعمل شرخ سياسي وإستراتيجي بينك وبين الناس .. ده أسلوب إستعماري إمبريالي ميناقيزيقي معروف من زمان.. فرق تسد.

الأمير: اثبت لى صدق كلامك يا وزير.

الوزير: بسيطة .. هو مش عنده ميعاد مع سموك بعد نص ساعة.

الأمير: صبح .. تمام كده..

الوزير: شوف هايعمل إيه كل ما تحاول سموك تقرب منه.

الأمير: ها يعمل إيه يعنى؟!

#### (موسيقى)

#### مسمع (۸)

الأمير: ايه يا حكيم .. مالك بتبعد عنى كل ما أقرب منك كده ليه قرفان؟ عبد الله: أبداً يا مولاي .. أبداً..

الأمير: وليه مغطى بقك ومناخيرك بكمك كده..

عبد الله: خير يا مولاي .. مافيش..

الأمير: وبتكلمني وإنت باصص في الأرض ومش عايز ترفع وشك ليه .. في إلامير: وبتكلمني وإنت باصص في الأرض ومش عايز ترفع وشك ليه .. في إيه يا حكيم .. مال تصرفاتك مش طبيعية ليه؟!

عبد الله: لبدأ يا مولاي . أصلي واخد برد عندي لنفلوز هو خايف أعدي سموك.. الأمير: يبقى أستدعي لك طبيب القصر علشان يشوفك.. هو عندي أغلى منن صحتك.

عبد الله: لا، لا يا مولاي مافيش داعي أنا ها أخد شوية ليمون ســخن وأبقــى تمام النمام..

الأمير: طب روح أنت أستريح دلوقتي وبعدين أبقى أشوقك. بعد ما تخف من الأمير: الانفلوزه ولا البطة اللي عندك.

عبد الله: بالإذن يا مو لاي..

الأمير النفسه": بقى هو ده آخرة المعروف اللي عملته فيك يا راجل يا خسيس.. أنا تقرف مني. أنا ريحة بقى زي القبر، طبب دي اللبانه الدكر مش بتفارقني لا ليل ولا نهار لدرجة إن شعبي بيدلعني ويقول على الأمير أبو لبانه دكر. هو ده آخرة الخير اللي عملته معاك يا خابن، عايز تشوه سمعتي قدام شعبي .. دي خيانة عظمي بستحق عليها الإعدام أنا لازم أدي له درس ويكون عبره لكل واحد يفكر لحظه إنه يقرف من مولاه بس مش أنا اللي أوسخ إيدي بدمه واشيل وزره .. أنا ها أتصرف.

الأمير: أخى العزيز الملك الجبار .. تحية طبية وبعد..

حامل رسالتي إليك رجل خائن .. أحسنت إليه فأساء إلىي .. برجاء سرعة إتخــاذ الــلازم نحـوه وإيداعـه السـجن مـدى الحيـاه.. وتفضلوا بقبول فائق الاحترام.. أخوكم..

زعبوله .. يا زعبوله .. روح أستدعى لي حكيم حكماء القصر ..

زعبوله: صاحبك وحبيبك مش كده؟

الأمير: روح وبطل رغي..

زعبوله: حاضر أديني رايح آهه.. ياترى عايز مني إيه؟

#### مسمع (۹)

الأمير: اسمع يا حكيم..

عبد الله: تحت أمرك يا مولاي..

الأمير: عندي رسالة خطيرة .. غاية في الأهمية والسرية ولأني ما بأنقش في حد غيرك هنا فأنا بأكلفك إنك توصلها لأبن عمي الملك الجبار ملك الصحر اوت والغابات والأدغال..

عبد الله: سمعاً وطاعة يا مولاي..

الأمير: بشرط إن ماحدش يعرف مضمون الرسالة دي أبداً .. حتى أنت إياك تقراها .. إوعدني يا حكيم..

#### مسمع (۱۰)

الحارس: وقاله خلى الموضوع سر بيني وبينك.

لوزير: برافو عليك يا حارس.. أحبك وأنت بتلمع أكر وتتجسس على مولانا الحارس: لو أنها عاده سيئه لكن كل ده بعمله علشأن سموك.

الوزير: بقه كده يا مولاي. طيب إيه رأيك أن محدش هايوصل الرسالة دي غيري وعلى جثتي لو خليت صاحبك يوصلها بنفسه. أنا هنا الكل في الكل (أكيد الرسالة دي فيها خير هايعم عليه).

الحارس: وهاتعمل إيه يا وزير النحس.

الوزير: أحترم نفسك معايا يا حارس.. وسيبني أفكر في المصيبة دي لوحدي خلي الواد الطباخ يعمل واحد نيسكافيه ساده. أعمل إيه.. أعمل إيه؟ (موسيقي)

#### مسمع (۱۱)

الأمير: أنت إزاي يا راجل أنت ما توفيش بوعدك . إزاي ما تسافرش بالرسالة .. إيه خلاص ما بقاش لي أي هيبه ولا احترام عندك .. ماعـــادليش كلمه عليك.

عبد الله: العفو يا مولاي .. بس اللي حصل.

الأمير: اللي حصل إني كان لازم أنفذ عليك الحكم بنفسي هنا .. بدون رحمة أو شفقة.

عبد الله: وعلشان إيه كل ده يا مولاي..

الأمير: أنت بتستعبط و لا فاكرني نايم على وداني ..

عبد الله: برضه مش فاهم..

الأمير: الزكام والبرد. والانفلوزه بتاعتك.

عبد الله: الحمد لله خفيت منهم بالأعشاب..

الأمير: زكام وبرد و لا قرفان تقرب مني وتشم ربحة بقي..

عيد الله: العفو يا مولاي مين اللي قال لسموك كده؟

الأمير: بقى أنا ريحة بقى زي القبر؟

عبد الله: ينقطع لساني لوقلت كده على سموك.. ده أنت ريحة بقك شهد وعنبر

الأمير: أنت تقرف مني أنت يا جربوع.

عبد الله: استغفر الله يا مولاي .. مين بس اللي قال سموك كده..

الأمير: تروح تشوه سمعتي عند شعبي بإشاعه كاذبة..

عبد الله: ده أنا رقبتي فداك با مو لاي .. ده أنا لحم كتافي من خسيرك .. إزاي اعمل كده .. مستحيل..

الأمير: الوزير النحس هو اللي قال لي كده وأثبت لي صدق كلامه .. فاكر لما جيت تقابلني وكنت مغطى وشك بكمك..

عبد الله: علشان ما أقرفش حضرتك..

الأمير: تقرفني .. من إيه .. ؟!

عبد الله: من ريحة التوم اللي سموك مش بتحبها..

الأمير: مين اللي قال لك كده؟!

عبد الله: وزيرك النحس .. أصله عزمني على أكـــل كلــه مطبــوخ بــالتوم وحذرني إني أقابل سموك وأنا ريحة بقي نوم .. ونصحني لما أقــابلك أغطى بقى بكمى علشان الريحة ما توصلش لسموك.

الأمير: أه فهمت .. لعبة خبيئة لعبها علينا إحنا الأتتين .. الوزير النحس هـــو فين .. أنا لازم أادبه .. لازم أسجنه..

عبد الله: أصله .. أصله..


الأمير: أصله إيه..؟! هو فين مختفى بقى له يومين ما شفتش وشه..

عبد الله: ما تزعلش مني يا مولاي .. أرجوك إغفرلي .. غصـــب عنـــي ده حصل .. الرسالة اللي سموك كلفتني أوصلها..

الأمير: آه مالها .. هي فين؟!

عبد الله: أخدها مني الوزير النحس .. قال لي إني هاأتوه في الصحراء مسش هاأعرف أوصل لمملكة الملك الجبار ولأنه خايف علي وعلى الرسللة السرية فتطوع إنه يوصلها بنفسه ويرجع على طول .. وطلب منسي أعتكف في جناحي وما أخرجش أقابل سموك لحد ما يرجع بالسلامة.. الأمير: (يضحك) المغفل أخد الرسالة .. المغفل أخد الرسالة وكمان هاياخد عقابه .. سبحان الله .. آدي آخرة الحقد والحسد والشر اللي ملا قلبك يا وزيو النحس .. صحيح من حفر حفرة لأخيه وقع فيها. فين التوم.. هاتولي توم، نفسى آكل توم.. ها.. ها..

# 



# 

هذا الفنان المصري، متعدد المواهب، الذي عرفته فنان كاريكاتير، وممثل ومخرج...الخ وهنا عبر هذا الصفحات يمارس دور الحكواتي، يحكي لنا مجهوعة من الحـواديت المـصرية، فـيها نسـمع ونـرى شخصيات مصرية صميمة ومواقف إنسيانية وعينات عجيبة من البشر: النداهة،المستهتر الأمير الفنان، أخص على دي الايام وغيرها يقدمها هذا الفنان المبدع في صورة == اتركك أيها المستمع، عفوا القارئ ال مع حوادیت منیر زخاري.

26 6